



萬歷仙居縣

志十二卷

長霖署檢



建國二十四年歲次乙亥春月傳
鈔吳興劉氏嘉業堂藏萬歷三十
七年原刊本並假國立清華大學
圖書館藏道光十八年王魏勝刊
本校印

重刊萬歷仙居縣志序

仙居有志始自萬歷繼之則有康熙光緒二志今行世者僅光緒志而已甚矣舊志之易泯滅也萬歷志爲崑山顧令震宇所纂計爲卷十有二爲目二十有七顧令以台郡無善手可付梨棗乃捐家貲刊於吳中載板以歸時爲萬歷三十七年洊經變亂流傳甚稀清道光十八年邑人王魏勝曾以聚珍版重印兵燹後又零落殆盡吳興劉氏嘉業堂藏書紀略載有仙居縣志十二卷五冊萬歷三十七年刊本足證爲世間秘笈攷光緒志例稱萬歷顧志簡而有法讀其錄文三十六篇皆有關世道之作康熙志多削而不載好古者有莫窺全豹之感光緒志雖加補綴然使不得顧刻原本印證則終屬憾事余宰仙之明年邑人士李鏡渠等搜集鄉先哲遺箸有仙居叢書之刊遠于江右覓得顧志原本付印嫻嫻舊籍得復流傳其津逮後學豈淺鮮哉鏡渠寓書索序予喜其用心勤劬勉爲一言以志嚮往抑更有進者光緒志自甲午重修迄今又四十餘年滄桑變革制度遞嬗尤不能萬歷仙居縣志

劉序

仙居叢書

不冀邦人君子及時計議重修庶幾勿使後人有文殘獻缺之嘆則又區區之所企望也是爲序

中華民國二十有四年歲次乙亥春月湘潭劉風謹撰

萬歷仙居縣志序

不佞成小築於麻姑之麓製荷紉蘭僻嗜默坐俄邑侯顧君纂邑志竣事徵序於不佞不佞謝曰鉛槧業已敝帚久之何能綺語艷此志雖然市塵事販者熟之川莽事髦野者識之况仙居予世廬舍侯之政實予稔親記斯志之成予實所欣慕焉可無言以處之聞之陳壽范曄二君子學傾西室才落文河何所不騁猶不敢輕作志以郡邑之志卽朝家之史難言之也借兩司馬之神撫虛摹影太失之浮一班失豹一隙缺二曜之明覺失之簡否則拾其柱脚如山林水鳥較詳遺其大要如人物徭賦風化烈俠反置不問是何體貌志豈乏三長者可染翰乎仙居古稱安洲自宋令古靈陳先生以上醇之政完標枝之風民朴政修邑志僅有涯略至嘉靖壬子天吳翔幟鮪浦烽紅海寇一炬邑里盡爲焦土凡林府藏牒胥夷而志籍已付祖龍燼矣遷延數十年如盲者之迷於轉徑幸天惠一方獲遇顧君係全吳世家縮銅墨長此土廣心汪度綽有古循良風以慈愛續鞭示以撫字代催

萬歷仙居縣志

應序

仙居叢書

科以鳩緝新疊序以淡漠厭摠迎一時途歌巷舞已如嚴寬陽城再司世云琴清花竹爰搜邑藏不難折節延問如山中之簡拾童牧之謠咏無不攜攜出瓜懸之沫遂付梓人齊民宴不知也予披是而讀之竟簡支分節析綱舉目張山川之辨封邑之自物曲之纖禮俗之概田賦之常人物之次不俚不略不濫不誇誠如營新豐者宮室雞犬一一皆肖允可垂來世而徵實錄矣豈如鍾離君之夢安洲或對或失僅寫其形影已哉不佞飲君之醇則忘其醉按君之志時游之惺聊紀其歲時姓氏爲之弁以鐫不朽則遺其拙若日以雕龍繡虎業爲紀錄光當捫心退矣侯名震宇姑蘇之岷山人

萬歷己酉春三月賜進士出身嘉議大夫太常寺卿奉誥進階通議大夫邑人應存卓頓首拜書

萬歷仙居縣志序

古者周官掌邦國四方志而志始傳邑之有志猶國之有史司馬文正公集古今治忽之蹟命之曰資治通史夫志非一國資治之史歟史是非之衡公議之府也趙宣不得改董狐之筆崔氏不得改南史之簡劉知幾曾鞏其人率難之仙之志兵燹祖龍久矣茲刻則自御史大夫吳公從弟文學攜撫舊聞前令顧君嘉與二三博雅更綜數四始一就事攜吳中付殺青余聞之函請以歸四月版至展而讀之疆域則職守有書山川則險易有書圖籍則國計有書吏治則官箴有書人物則臧否有書可以觀可以勸可以懲蓋百代信史直藻麗文章已哉得此浣劇思矣予承乏茲土自揣無補獨於賦役庠序昕夕拳拳且會當攢造之期稔知仙之綦困不愛爲民均一編里蕲庶幾十年無蓋而資之墜仙多譽髦久曠予卽不敏數給廩餼率諸章綵爲文日晏繼炬不倦迺頃已超曠風翔瞻斗矣更鑄鼎大成重新啓聖葺諸名賢列祠靡匪冀以鼓振化風惟諸人士勉爲嘉巖川贈色爲茲

萬歷仙居縣志

鄧序

一一

仙居叢書

志光左氏曰古人有不朽者三立德立功立言予何敢居第業有仁賢胥事且多藉以闕斯傳於不朽是所爲資予治乎長是邦者僉榮矣僉榮矣遂書此爲文致附

萬歷壬子十一月文林郎知仙居縣事廣陵鄧應璧謹叙

皇明萬歷三十六年歲次戊申秋八月

日

仙居縣知縣 顧震宇 編輯

儒學訓導 王湛 同輯

儒學教諭 吳維翰

儒學訓導 張崇聖 校讎

主 簿 楊安

典 史 鄭同文 同校

萬歷仙居縣志

卷一

仙居叢書

萬歷三十七年夏四月

日鐫板

萬歷仙居縣志目錄

卷之一

建置

疆域

里市

城郭

卷之二

山川

風俗

戶口

卷之三

田賦

萬歷仙居縣志

目錄

一

仙居叢書

卷之四

食貨

卷之五

公署

附廨舍橋梁津渡
倉廩舖舍壇壝

卷之六

學校

附祠坊

卷之七

寺觀

塚墓

卷之八

官屬

卷之九

選舉 附封贈恩
蔭監生

卷之十

名宦

名賢

卷之十一

忠義

孝友

貞節

隱逸

厚德

仙宗

釋氏

萬歷仙居縣志

目錄

二

仙居叢書

僑寓

卷之十二

詩文

紀遺

萬歷仙居縣志目錄終

萬歷仙居縣志卷之一

建置

台州府領縣六仙居其一也天文屬牛女之分當禹貢揚州域春秋戰國時爲越地秦屬閩中郡至漢屬東甌國東甌內徙始以其地爲回浦縣屬會稽東漢初改爲章安興平四年析章安永寧而置松陽始平晉太康元年復更始平爲始豐永熙三年析始豐置樂安宋孝建元年析揚之五郡爲東陽州樂安與焉唐武德四年置台州樂安隸之八年廢入臨海上元二年復置錢氏霸吳越改爲永安宋太平興國三年始有其地景德四年改爲仙居元及國朝仍其舊夫邑不改土而廢興沿革人浸閱焉覽者可以推古今之變矣

疆域

先王畫野分州立百里之國萬區仙于越爲瘠壤截長補短猶然稱邑焉其間廣輪延袤統轄所至以備職方氏之採擇者此有司所當詳也然地非都會崇山縮帶蒼嶺一綫僅通閩道而車轍罕至商賈之路亦絕則何以致天下之貨而阜其財求乎故履四封而思衣食之原卽計然之策亦窮矣

萬歷仙居縣志

卷一

仙居叢書

縣距府西九十里東西一百二十里南北一百四十里是爲提封之境東三十里界嶺入臨海縣西九十里風門入縉雲縣南一百里道赭山人永嘉縣北五十里黃榆山人永康縣是爲四正之境東南一百五十里五部山人黃巖縣西南一百里界繞山人縉雲縣東北八十里盧坑山人天台縣西北一百十五里郭坦山人永康縣是爲四隅之境多陸程南大溪自縣西五十里至石姥嶺東南入臨海界此水程也

七百里至杭州一千八百七十三里至南京五千八百一十八里達於京師

里市

夫里夸九陌市侈五都人物駢闐若合烟雲豈不盛哉然四方所輻輳往往遷徙不常轉而他之猶虛國也入仙居之里閭景蕭然至動行惻乃士食舊德農服先疇聚族而居者百年無改庶幾有古風乎且享其土之所入而願欲無奢市亦不

數數會焉又其儉也守土者時其豐凶而惠養將世世生聚殷庶之風與山川並永可也

遂寧鄉 一都至七都管里二共圖八里長八十名甲首八百戶有奇

懷化 赤城 以山得名

清風鄉 八都至十三都管里八共圖六里長六十名甲首六百戶有奇

永昌 薦正 甘泉 皈政

紫巖 以出產紫草名 辛昌 溫泉 明教

開元鄉 十四都至二十三都管里六共圖一十二里長一百二十名甲首六百戶

羌山 以山神靈驗名 莒溪 元文 高遷

靈峯 折桂 以吳蒞子姪相繼登第名

昇平鄉 二十四都至二十九都管里六共圖六里長八十名甲首八百戶有奇

永欣 白水 以水得名 新建 石牛 以溪中有石似牛名

萬歷仙居縣志 卷一 仙居叢書

狀元 以宋胡濂魁武科名 孝義 以宋呂沆孝行名

慶雲鄉 三十都至三十七都管里三共圖八里長八十名甲首八百戶

浮都 斑溪 甘露 以後漢葛元煉丹而甘露降慶雲生故鄉曰慶雲里曰甘露

歸仁鄉 三十八都至四十五都管里八共圖十里長一百名甲首一千戶

清湖 以湖水清而名 隱賢 清河 石感

武德 誠信 吉陽 崇教 以宋翁森授徒故名

東西隅 東五坊西五坊共十坊坊長一百名甲首一千戶

縣市 大街東街 下角市 縣東二里 石姥市 東縣二里 步路市 縣南十里 石井市 縣西十里

白塔市 縣西三里 廣業市 縣西六里 西市 縣西一百二十五里 田頭市 縣西三十里 潘灘市 縣西五十里

城郭

易曰王公設險以守其國險之時用大矣哉王荆公謂城郭之不設甲兵之不戒雖有智勇不能勝一日之變可以釋險義矣仙居舊為土城延袤六百餘步創於

唐之上元至宋宣和間就毀統制姚平仲張思正駐師于此因更築焉闢東西南
三門各冠以樓東樓嘉熙四年所建也西南二樓一建于紹定一建於淳熙東樓
在學宮之左故顏曰登龍至元易爲文明其西南兩樓俱廢於火故址蕪沉不復
可考惟文明樓巋然獨存物之興廢存亡蓋有數云嘉靖丙辰令姚本崇欲易茲
城以石業請之兩臺有成命矣版築未就而島夷突來并故所存者焚無孑遺姚
以戍去嗣後同知毛德京董其役拓城西地周五里廣三丈高四丈悉礮石爲之
三十丈立一舖五十丈立一臺列五門門上有樓下爲斗門以便民時戎事未寢
督責傷急築者皆新土未固陟經霖潦半爲傾圮于是德京復論罷矣功之難成
如此至推官蕭文清代之三越月乃始報竣城東門曰迎暉樓曰啓明城南門曰
來薰樓曰宣澤城西門曰慶豐樓曰惕庚城北門曰拱辰樓曰思蓋小南門曰省
耕無樓是役也費十萬鑑邑藏爲空語曰利不百者不變常以此傷財財奚傷焉
以此勞民民奚勞焉後之蒞斯土者可不追締造之艱而塵復隍之慮也哉

萬歷仙居縣志卷之二

山川

先王辯形勝以名邑蓋有取義焉仙僻且隘宜無稱者乃括蒼韋羌安洲紫籜諸山相錯如繡而溪水縈穀若澄練時乎千峯回翠掩映於殘霞落照之間方壺蓬嶠不在遠矣彼鑿山振屐選勝事者不稱此何耶請以竣考古者

馮師山

縣西二百十里舊傳馮氏女學道於此

界坑山

縣西一百四十里脉起永嘉重巒疊嶂延于安仁廣福之間

金峯山

縣西九十里峯有九峯次第起伏至第九峯時以金星蒼翠鬱然

東山

縣西北五十五里裏山一名芝巖外山一名紫巖宋林放隱于此

萬竹山

縣西南四十五里絕頂曰新羅九峯回環道極險隘嶺上平曠幽窈自成一村落

韋羌山

縣西四十五里險絕難升上有石壁刻科斗篆文晉義熙中周廷尉領郡造飛梯以蠟模之莫識其義後守阮錄攜衆往觀雲雨晦冥日不見下有綠筠亭郭三益詩紀其勝

掛榜山

縣西四十里巖壁橫亘青紫蔚然

臥旗山

縣西北四十里峯巒偃伏如旗

穀堆山

縣西南四十里

翠屏山

縣西四十里蒼翠鬱蔥頗稱勝概

道赭山

縣南一百里道通溫州

張阜山

縣西北三十五里

萬歷仙居縣志

卷二

仙居叢書

紫籜山

縣北三十里舊名竹山唐玄宗夢一人紫服而朝自稱竹山神來呈瑞鳳已而果有鳳翔遂賜名建廟

福應山

縣東二里陰陽家謂其居邑龍首得地之勝居人建浮圖其上自是青紫不乏有盡美亭蔣景修爲之記

放光塔山

縣北二里一名綵切周顯德間僧德韶淑浮圖於上

安洲山

縣南五里一名九旬山唐武德中僧灌頂講經於此時山在水中波瀾四絕漁者甚衆頂勸止之忽一夕風雨大作旦則成洲矣萬歷間知縣汪夢說建塔於上又名新塔山

浮石山

縣南三里下有石屹溪中視之若浮

獅子山

與浮石相連

括蒼山

縣東南五十里高一千五百丈延亘三邑

樸頭山

縣東三十里

石龕山

縣東一十五里上有石室深三丈廣一丈相傳神靈棲焉

石龍崆山

縣西南十五里多巨石玲瓏可愛

靈山

縣西二十里以禽鳥不棲故名

項羽山

縣西五十里相傳項羽少時駐馬于此有石馬跡存焉

孟溪山

縣北十里

彭溪山

縣西北四十里

枕溪山

縣南九里

白巖山

縣西南十五里

三井山

縣北三十里中有三龍湫

枕海山

縣西六十五里其趾插海

赤城山

縣西七十里土石俱赤

曹官山

縣西八十里

石疊山 縣南三十里

玉几山 縣南五十里

圭峯 縣北十里一名青尖萬山四合此峯巖然特秀若王侯秉圭而立

南峯 縣南三里上有浮屠曰南塔又有桃花洞

蒼嶺 縣西九十里高五千丈周廻八十里險峻為浙東之最宋陳公輔詩云回頭却望重崗處得似人心險也乎

古通嶺 縣西北八十五里

黃榆嶺 縣南七十里

馬鬃嶺 縣北十里

東嶺 縣東二里

十丈嶺 縣南五里國朝王一雷八歲過此口占云帥手撥開天上雲五湖四海堪一望

大峽嶺 縣南十五里一名峽山

界嶺 縣東三十里

五部嶺 縣東一百五十里

三十六峴嶺 縣西九十里

周觀巖 縣西八十里

景鳳巖 縣西南七十里

天柱巖 縣西五十里

飯甑巖 縣西四十里

水簾巖 縣西南四十五里懸瀑如龍下有石室可容千人六月寒侵肌膚

景星巖 縣西南五十五里上有鹿景巖旁有一穴幽深巨測投石有聲名曰響巖宋吳芾詩云天近雲隨步林深翠滴衫國朝吳時來詩云覓路天邊步尋僧雲裏逢

麻姑巖 縣東三十五里麻姑訪王方平蔡經于此

觀音巖 縣西南二十里

萬歷仙居縣志

卷二

濡巖洞 縣西南三十里相傳其洞有龍禱雨輒應

括蒼洞 縣南三十里旁有禮斗壇道書第十洞天吳詠詩云桃源花漲門前水石壁雲流洞口風

湯公洞 縣北三里涵虛清敞

北塿 縣西北十里

竹家寮 縣北五十里地介三邑

永安溪 縣西二十里大小二源小源出馮師山東流百里至曹村淺不可舟自曹村而下廣二十步勝小艇又東至妃姑與大源會廣一十步又東六十七里而南勝二十石舟

曹溪 縣西九十里源出括蒼嶺南流四十里入大溪嶺上有潭曰曹潭宋淳熙間縣令蘇光廷禱雨有物蜿蜒而出一黑一黃以糝承之躍而入迎止於潭下翌日大雨先是光廷夢有黃姓者手二小龍而至及是符其夢遂翔堂以祀

棹溪 縣西二十里源出處黎溫三州旋至蓼溪入大溪孟大武詩云樵斧砍雲春谷暗漁榔敲月夜溪寒

彭溪 縣東二十里源出天台南流三百十里入大溪

杜蜀溪 縣南二十里蜀王廟前頗幽險俗名杜濁

南溪 縣西南二十九里源出永嘉杉崗北流五十里入大溪

蓼溪 縣西三十里源出永嘉杉崗北流一百十里入大溪

班溪 縣東五十八里源出天台竹山東流五十里入大溪

白水溪 縣東二里源出天台竹山東流一百里入大溪

瞿溪 縣西七十里源出東陽南流三十里入大溪

馬嶺溪 縣西北六十里源出東陽南流三十里入大溪

土瀆溪

縣西八十里源出紫巖
山北流五十里入大溪

石井溪

縣西二十里源出東陽南
流一百二十里入大溪

朱溪

縣西一百六里一名木溪源出括蒼
嶺南流四十里入大溪

哈裏溪

縣西一百六里源出括蒼
嶺南流三十里入大溪

左溪

縣西一百七十里源出永嘉
杉崗北流四十里入大溪

眞溪

縣西一百七十四里源出馮
師山東流四十三里入大溪

方溪

縣西一百七十八里源出永
嘉北流一百三十里入大溪

慈溪

縣西一百八十里源出括
蒼嶺南流四十里入大溪

石牛溪

縣東十五里
中有石如牛

任家溪

縣北西五里
唐任昉居此

張阜潭

縣西北四十五里深峻處有石潭垂崖飛瀑林木森然後崖石摧隨復于山顛湧一沙潭龍
徒於此乞水者自石潭以次而升夜息潭側日則迎水而去每潮漲則沙潭之水湧溢潮退
平復

平復

柘溪潭

縣西北六十里其水
隨潮盈縮乾則有雨

孟溪山潭

縣北二十里曰老公潭二十五里曰山王潭三十五里曰孟梳潭三十里曰桂坑潭馬
藤潭藤雨輒應陳襄報雨詩二十韻有靈泉汲坎宿仙仗下嶙峋雷斧潛噴樹天波忽
灑塵

灑塵

彭溪潭

縣北四十里支派疏
爲四堰溉田甚衆

三井潭

縣北三十里窈深石測時發光怪宋陳
襄報雨詩云蘋蘩朝薦廟風雨夜離山

天井潭

縣西南二十五
里禱雨立應

西菴

縣西南
五十里

萬歷仙居縣志

卷二

三

仙居叢書

馬鞍山潭

縣東六
十里

左溪右溪潭

縣西南九十
里韋光深處

蒼山潭

縣西南
一百里

九峯潭

縣南八
十五里

深澄湖

縣東十五里相傳宋時有漁于此者巨魚長可二三
丈以物撥之獲一鱗如杯自是出入不常蓋龍宅云

相湖

縣東十五里四時不涸管子網中得石刻相湖二字
有題於湖上者半篋修竹翠含雨一鑑澄湖冷浸秋

磬湖

縣東二十五里相傳常
有磬浮水上光采奪日

尊湖

縣東二
十七里

黃赤湖

縣東南二十里修廣皆數丈水四時如沸夏飲寒
浸毛骨冬飲則如湯相傳宋時嘗有龍出沒云

小西湖

縣西二十里宋吳芾所
創延袤數里旁有亭館

烈女湖

縣東三十五里舊名坐口湖顧氏女死難於此改今名國朝秦鳴雷詩云
自從惜寶捐軀後坐口湖更烈女湖大節直同天地老芳名不共海田枯

千頭湖

縣南二十五里唐有盧姓者
手及黃巢賊黨千級投湖中

蔡經井

縣東十七里舊傳井有九汲其
一則八皆波動兵燹後存其五

七井

一在縣前一在學前一在縣東巷一在縣
南巷一在官倉巷一在市橋巷一在縣西

葛井

縣西北四十五里相
傳葛玄煉丹于此

瑤崩瀑

縣西五十里玉几山北出源頂羽山流爲二潭潭之下巖三面壁
立瀑緣壁而下或雨初霽則飛流濺沫廣至十丈餘蓋奇觀也

僊洞瀑

縣西九十里如銀河飛灑四時不斷

西巖瀑

縣西四十五里

清水塘

縣西二十七里修廣淵深足以濟旱一方賴之

南溪塘

縣西南十五里宋鄭雄飛所鑿二塘相連冬夏不竭

朱公塘

縣北五里文公所鑿以制火患

下角塘

縣東三十里周園里許

昊天泉

縣南三里廣五十步

離泉

縣南二里

葉亭泉

縣西北二里

紫泉

縣北二里

張阜堰

溪上堰

孟溪石藤堰

上礅堰

了溪堰

以上俱昇平鄉

彭溪坑堰

厚奢堰

以上俱慶雲鄉

圳口感德堰

王潘道堰

祝塢堰

緒光堰

北山秋成堰

高遷雷垣堰

赤城巖湖堰

萬歷仙居縣志

卷二

四

仙居叢書

蓼溪新堰

潘溪堰

張支湖堰

以上俱開元鄉

深鼻堰

才塘堰

洋前堰

柵岸砂溪堰

板橋吳橫堰

湖村陳道堰

以上俱清風鄉

湯歸堰

歸仁鄉

上畝堰

未舟後洋堰

橫溪堰

重渠堰

以上俱遂甯鄉

風俗

俗之善敗民爲之也而君子之德司其風雖然當其俗之既成而欲破久據之壘而更方新之轍爲之風者戛戛乎其難矣夫善人教民百年而後可以勝殘去殺今之有司遠者五六年上復以文法從事掣其肘而摯其足卽欲化民成俗豈可得哉仙居當漢晉時僻處荒服風氣未開至宋令陳襄訓以詩書民始釋袒解耒

興於文物士多負氣抱節不爲羶趨富貴歸故鄉者絕跡公府愚民悶然耕食鑿飲其俗之善如此顧山居野處之性簡嗇不知禮節惜嫁女之費生輒溺之卜營宅兆遠至數十年不埋其親於慈孝之義謂何男子娶婦羣聚肆謔謂之打郎女子一爲媵則終身不獲配此二事尤可怪也習俗移人賢者不免况愚民耶夫禁之勢逆化之勢順吏卽能禁更歲月將復然矣史稱王烈居鄉爭訟屏息涵濡倡率所望於良縉紳焉

元旦拜天地謁祖祠親友鄉鄰交相展賀元夕張燈放炮神社設醮祈年清明祭墓插柳端午食角粽飲菖蒲酒中元祀先中秋賞月重陽登高賞菊飲茱萸酒冬至祭祖拜冬除夕守歲前數日掃宇舍各備肴果以爲獻春之需此一歲之大略也

戶口

周禮大司徒獻民數於王王拜受之以厚下安宅也仙之戶口視高皇帝臨御時

萬歷仙居縣志

卷二

五

仙居叢書

不啻減半矣夫以二百年休養安集而凋敝愈甚何也夫亦島夷肆侵役築之後賦斂煩脂力竭歟自行條鞭法民稍稍有起色而百孔千瘡療之匪易劑救生聚之方不能不望於司國計者

宋嘉定間額數

主戶二萬七千九百一十

人丁及幼丁廢疾五萬七千七百六十四

客戶一萬八百五十

人丁及幼丁廢疾一萬三千一百三十一

元至正間

南北諸色戶二萬七千一百八十一

國朝洪武二十四年

戶二萬七千三十五

口九萬三千八百八十

永樂十年

戶二萬一千九百五十五

口五萬八千四十六

宏治五年

戶一萬一十三

口男婦共三萬四十五

萬歷九年

戶一萬一十一

口與宏治五年同

萬歷仙居縣志

卷一

六

仙居叢書

萬歷仙居縣志卷之二

萬歷仙居縣志卷之三

田賦

書曰咸則三壤成賦中邦所以辯土之肥瘠而輕重賦之也仙于台稱下邑而供億之煩與他邑埒有司拮据支吾億已乃一邑中原隰交錯肥瘠異土而竟課爲一則使樵青山之雲耕沙中之石者與圯壤共賦役焉不其病瘵與倘循行阡陌相土田而裒益之庶有瘳乎然解紘更調縣令之權未敢輕議也

宋嘉定間額數

官民學寺田三十二萬四千九百六十八畝二十七步一角

地一十二萬六千四百六十八畝四萬九千二十二丈五尺

山二十四萬六千二十六畝二角

稅錢糧米赤城舊志五縣總載本縣額數無考

元至正間

萬歷仙居縣志

卷二

官民田三千二百三十四頃五十畝七分三釐五毫地一千三百八十四頃二

十三畝六分七釐

山二千二百九十頃八分五釐

塘一百一十一頃一十二畝二分二釐

夏稅中統鈔一百八十七錠一十兩七錢六分一釐

秋糧三千八百三十八石四斗七升一合六勺

國朝洪武二十四年

官民寺田地山塘河四千二百六十四頃五十九畝六分二釐

田二千八百頃六十二畝六分八釐六毫

地八百八頃五十六畝四分四釐

山六百二頃六十九畝三分三釐

塘五十二頃六十一畝五分四釐

河九畝六分三釐

夏稅麥五千四百四十八石二升六勺九撮

秋糧米八千六百三十七石六斗四升五合

稅鈔貨鈔五百六十錠一貫九十七文

永樂十年

官民寺田地山塘河四千二百六十五頃三十八畝七分三釐六毫

地與洪武年同

山六百二頃八十五畝三分三釐

塘五十二頃六十四畝五分四釐

河九畝六分八釐

夏稅麥五千五百二十三石九斗三升五合

秋糧米一萬一千七十石一斗七升五勺

萬歷仙居縣志

卷二

二

仙居叢書

稅鈔貨鈔五百九十六錠三貫三百一十四文

宏治五年

官民寺田地山塘河與永樂十年同

夏稅麥正耗五百八十八石七斗七升九合一勺

租麥正耗一百六十六石二斗一升三合一勺

苗麥四千七百三十九石五斗五合一勺

秋糧米正耗六千七百四十九石九斗二升四合一勺

租米正耗二千五百七十五石六斗一升七合一勺

貨鈔九十四錠一貫八十二文

稅鈔四百八十四錠一百五十一文

宏治六年

夏稅麥五千四百八十六石四斗九升八合一勺

鈔五百七十四錠三貫七百七十七文

秋糧米九千三百二十五石

鈔三錠三貫三百二十文

鹽米一千一十九石四斗四升六合五勺

鈔二千二百四十四錠

萬歷九年

官民寺田地山塘河舊額與宏治五年同丈出田地塘一千一畝八分共四千

二百七十五頃四十畝五分三釐六毫

官田一百八十五頃四十一畝二分四釐六毫

寺田一百二十八頃八十四畝七釐

民田二千四百九十頃二十三畝二分八釐

地八百一十四頃九十七畝三分九釐

萬歷仙居縣志

卷二

三

仙居叢書

山六百二頃八十五畝三分三釐

塘五十二頃九十九畝五分四釐

河九畝六分八釐

夏稅麥五千四百八十六石四斗九升八合五勺內抽存留本府永盈倉運納

本色麥八百九十一石九斗二升九合二勺五抄

類入條鞭折銀追徵解給麥四千五百九十四石五斗六升九合二勺

夏稅鈔五百七十四錠三貫八百八十五文折銀五兩七錢四分七厘六毫

秋糧米九千三百二十五石五斗四升一合八勺內抽存留本府永盈倉運納

本色米三千六百六十九石六斗七升九合九勺

類入條鞭折銀追徵解給米五千六百五十五石八斗六升一合九勺

秋租鈔三錠三貫二百文折銀三分六厘四毫

人丁鹽米九百四十石九斗一合二勺五抄內抽存留永盈廣盈二倉運納本

色米一百七十一石六合四勺七抄五撮

類入條鞭折銀追徵解給米七百六十九石八斗九升四合七勺七抄五撮

魚課米四百二十石一斗一升八勺

舊係漁戶自行辦納至萬歷十年本縣署印主簿吳正大因漁戶逃絕偏累申詳類入條鞭徵解

條鞭以前項麥米折銀并三辦徭壯類入一項追徵分項解給內

起運銀一千五百三十八兩九錢二分五毫

存留銀三千一百七兩二錢九分一毫九絲

額辦銀三百二十六兩一錢六分四厘四毫六絲

坐辦銀一千二百二兩一錢二分六厘五毫五絲

雜辦銀一千五百九十三兩五錢八分二厘六毫九絲

馬價驛傳銀一千六兩二錢四分六厘八毫五絲

兵餉田地銀一千六百四十三兩一錢六分九厘一毫五絲

均徭銀二千四百一十二兩七錢二分八厘四毫

民壯銀一千三百九十二兩八錢

共碑額銀一萬四千二百二十三兩二分八厘七毫九絲內

解京銀二千六百四十六兩六錢五分二厘四毫一絲

存留起解各衙門銀七千八百八十四兩二錢八分四厘三毫七絲

本處支銷銀三千六百九十二兩九分二厘一絲

課程宋制不可考元則歲辦中統鈔六百二十六錠七十兩五錢八厘國朝本

縣歲辦舊額二千二百三十一錠一貫四百一十九文魚米四百二十石一斗

一升八勺

雜賦宋土貢見赤城舊志元見新志國朝歲辦額數段正顏料等項折銀一百

五十兩七錢一分農桑絲絹六十九疋一丈四尺四寸造弓三百張箭三千枝

弦一千五百條翎毛四萬根雜色皮張六百一十張烏藥五百觔台芎九十觔

猪牙皂角一斤粟壳十斤半夏麩二斤生地黃三十一斤猪二十七口折銀四

十五兩九錢鵝一百七隻折銀三十二兩一錢至嘉靖間按臺龐公行條鞭之法於是有額辦坐辦雜辦一切皆括於其中矣

萬歷仙居縣志卷之四

食貨

先王不貴異物賤用物重土毛也赤城志川澤衍沃有水陸之珍仙何以稱焉其地礪其俗嗇無雕鏤纂組之奇故農事不害女紅不傷使悉一方之力供一方之用登俎充篋者未始乏也入其郊而田野豐機軸發維民之勤與惟有司之良與

穀屬

六十日

黃巖早

藍溪白

縮頭紅

金裏銀

溫州青

霜下晚

黃扁糯

冷水清

長稈紅

早糯

晚糯

香糯

大麥

小麥

蕎麥

黃芝麻

油麻

胡麻

白芝麻

黃荳

黑荳

藁荳

赤荳

雞腎荳

清明荳

羊眼荳

蠶荳

紅荳

棗

萬歷仙居縣志

卷四

仙居叢書

黍

粟

蔬屬

蘿蔔

油菜

白菜

菠稜

蒼蘆

絲瓜

苦蕒

蒿苳

金瓜

黃瓜

冬瓜

稍瓜

茺葵

芥菜

木耳

薑

芋

蒔

葱

蒜

茄

莧

匏

笋

芥

蕓

蘇

葦

蒿

蕨

菓屬

李

桃

橘

橙

柚

杏

梅

栗

榛

柿

棗

榧

梨

菱

芡

藕

金柑

花紅

枇杷

楊梅

櫻桃

荸薺

蓮子

西瓜

甜瓜

甘蔗

銀杏

葡萄

石榴

木屬

松

桂

柏

檜

梧

柳

樟

楓

梓

榆

椿

栲

杉

檀

練

檮

羅

金荆

黃楊

皂莢

冬青

竹屬

方竹

雷

猫

水

棕

董

笙

斑

苦

茅

箭

萬歷仙居縣志

卷四

二

仙居叢書

火

石

淡

紫

筋

桃絲

花屬

牡丹

海棠

巖桂

薔薇

丁香

杜鵑

石巖

玉簪

凌霄

水仙

山茶

鹿苑

鷄冠

蜀葵

鳳仙

秋葵

芙蓉

紫荊

紫薇

瑞香

一丈紅

滴滴金

百合

玉甌

決明

剪春蘿

夏蘿

菊

老少年

十樣錦

木槿

芍藥

畜屬

牛

馬

騾

驢

猪

羊 犬 貓 雞 鵝
鴨

獸屬

虎 豹 豺 狼 鹿

猴 猿 狐 獺 兔

鼠 犴 野猪 山羊 香狸

鼠狼 栗鼠 豪猪 刺蝟 田狗

猪獾

禽屬

鵲 鷹 鳩 鶯

鳧 燕 鶯 雉雞 竹雞

山雞 郭公 畫眉 啄木 青絲

萬歷仙居縣志

卷四

三

仙居叢書

白雪 伯勞 青翠 黃頭 鶉鴝

鴛鴦 子規 烏鴉 白頭翁 十二紅

黃雀 鷓鴣 八哥 黃鸝

魚屬

鯉 鯽 鮭 鱒 鱧

鱖 鮓 鮒 鱖 鱧

鮓 鮓 鮓 鮓 鮓

螺 蚌 烏鮓 烏路 楊花

水雞

貨屬

綿 苧 蠟 密 茶

皂

藍靛

紅花

紫草

草屬

芝

蘭

萱

茜

艾

蒲

藍

萍

蓼

蘆

茅

菅

蕒

三白

燈心

馬鞭

仙掌

芭蕉

鳳尾

竹節

龍鬚

鼓錘

藥屬

茯苓

芍藥

白朮

蒼朮

南星

白芷

枳殼

薄荷

荆芥

瞿麥

香附

山查

香薷

苦參

天麻

黃連

卷柏

菴葶

茵陳

台芎

萬歷仙居縣志

卷四

四

仙居叢書

金漆

菖蒲

嬰粟

茴香

桔梗

糖櫻

烏藥

半夏

乾薑

枸杞

車前

白匾豆

川山甲

何首烏

山梔

飛山鳥

蒲公英

豬牙皂角

天門冬

麥冬

杜仲

厚朴

萬歷仙居縣志卷之四

萬歷仙居縣志卷之五

公署

附解舍橋梁津渡倉廩舖舍壇壝

詩曰君子攸躋又曰君子攸甯匪以侈安也國家挈百里之地命一人南面而聽之出治退食俾有甯處此何為哉夫飯封祿之粟歸然蒞于丹楹碧棟之間而甕牖之下風雨淒其非所以稱在宥也以此思敬敬可知矣几席之上牘紛如絲軒楹之下吏沸如縻毫髮不周而六馬且佚以此思懼懼可知矣誠使民歌廉懷召欣欣焉幸庇于宇下其無負設官建署之意乎不然則怨之阱而罪之府矣

縣治舊在花井街北晉羊忻遷之青圭前宋陳襄拓而新之歷宣和靖康景炎至正凡四經寇亂燬而更建國朝嘉靖年間烏夷竄匿四十餘日而縣治焦土

矣攝縣事同知毛德京重葺之

知縣馬濂增修有記

大門三間

上為護樓

申明旌善二亭

在大門內

寅賓館

在大門內東應存卓為記

縣獄

在大門內西

儀門三間

土地祠

在儀門東

萬歷仙居縣志

卷五

仙居叢書

戒石亭

在儀門內

正堂三間

幕廳

在正堂東

東西庫二所

左右司吏房十六間

後堂三間

知縣衙

在後堂東北

縣丞衙

在後堂東今廢萬歷丙午知縣顧震宇因舊址創中堂三楹名河陽館有記

主簿衙

在後堂北

典史衙

在後堂東南

廨舍

布政分司

縣西二百步

按察分司

縣左二十步今廢

府廳公館

陰陽學

醫學

惠民局

僧會司

道會司

巡檢司

河泊所

革

稅課司

革

教場

縣西一里

養濟院

縣治北

漏澤園

縣西二里

橋梁

縣橋

縣治前

迎恩橋

縣東六十五步以嘗迎詔故名

市橋

縣西一百三十步以處市中故名

石井橋 縣西十里

慶雲橋 縣東十里

社橋 縣西二里以在社壇側故名

杜橋 縣西三十里以杜氏建故名

彭溪橋 縣東二十里以接彭水故名

官路橋 縣西二十里

丞相橋 縣西三十五里丞相吳堅所建

板橋 縣西四十里後改整以石

鳳仙橋 縣西六十五里

新坊橋 縣西十五里

廣業橋 縣西六十里

長橋 縣西二里以水自孟溪入大溪故名

苦竹橋 縣西四里以旁多苦竹故名

斷坑橋 縣東十五里

白水橋 縣東一百五十步邑橋皆宋時建而此獨以浮水漲急屢屢圯萬歷間主簿曾學周董其

折桂橋 縣西三十里以在折桂里故名

成功萬歷三十六年知縣顧震宇捐資重建

下角橋 縣東三十里

三橋 縣西三里王存中為之記

搖頭橋 縣西三十二里

津渡

釋溪渡 縣西二十五里

趙塢渡 縣南十五里

廣業渡 縣西六十里主簿曾學周捐俸所造

清口渡 縣南八里

河頭渡 縣南三里

石牛渡 縣東八里

萬歷仙居縣志

卷五

一一 仙居叢書

倉廩

東倉 廢

西倉 廢

南倉 縣治南

河頭倉

白塔倉

淨樂倉

界嶺倉

學倉

宋有學田夏崇桂為之記國初入官撥米六百石貯倉以給師生永樂間尙給三百六十石以後無考倉亦廢

舖舍 二十五所舖司兵共七十四名

縣前總舖

慶雲舖 縣東十里

黃橋舖 縣東二十里

界嶺舖 縣東三十里

白水洋舖 縣東四十里

管山舖 縣西十里

枰溪舖 縣西二十里

開平舖 縣西三十里

金像舖 縣西四十里

蟠灘舖 縣西五十里

清風舖 縣西六十里

遂甯舖 縣西七十里

栢溪舖 縣西八十里

戴村舖 縣西九十里

蒼嶺舖 縣西一百里

壇壝

山川壇

社稷壇

縣東南二里

縣西一里

城隍廟

邑厲壇 縣北
三里

鄉厲壇一十二所

萬歷仙居縣志

卷五

三

仙居叢書

萬歷仙居縣志卷之五

萬歷仙居縣志卷之六

學校

語曰師道立則善人多又曰師嚴而後道尊蓋其重也而秉鐸者輒委于權輕而尸之夫蘇湖懷州豈異人任與我國家繩士之典具在顧振之者謂何耳若夫廣厲學宮崇飭坊表以求標影之直者則上之功令又不啻嚴矣

宋令陳戩創立文廟至陳襄即其地營學宮屢遭兵火獨文廟不燬成化間知縣劉志方為塞水塘建號舍規制始廣萬歷間鑄造三字

董其事

先師殿五間

東廡五間

西廡五間

戟門五間

櫺星門三間

大門三間 在櫺星門左

明倫堂三間 在殿後萬歷三十六年知縣顧震宇重修推事黃景星為之記

居仁由義二齋各五間

敬一亭 在堂後

祭器庫 在堂左廢天啓三年謝汝嘉重建

萬歷仙居縣志

卷六

仙居叢書

頒胙所 在堂右廢天啓三年謝汝嘉重建

教諭衙 在亭後天啓三年謝汝嘉重建

訓導衙 在東西居仁山義齋後

號房十二間 廢

射圃 廢

文明樓 在門左通衢成化間重修楊守陳記

啓聖祠

土地祠 在櫺星門左天啓三年謝汝嘉創建

名宦祠 祀晉令羊忻宋令陳襄劉光主簿崔縱尉徐默成我朝知縣曹廷桂教諭吳泰主簿元卿

鄉賢祠 祀宋通判蔣且龍圖吳希待制郭磊卿侍郎鄭雄飛提刑陳庸縣尉吳亮孝子鄭憲顧王文吳處仁國朝侍郎盧迥知縣鄭恕少師王一甫學憲王純封編修應昌贈主事張概贈尙書

應匡希御史李一瀚尙書應大猷○三祠皆太學生朱鵬捐地俱在學後

朱子祠 福應山之畫美亭

古靈祠 南峯上隆慶六年知縣趙善政重修有記

遺愛祠 在縣東祀宋令陳公襄以國朝知縣余城趙善政周裔登署縣事周思稷俞霑鄒通配吳時來撰周公均田頌

雙忠祠 南峯上祀盧鄭二公

忠烈祠 縣治東祀鄭公及其二女

三處士祠 南峯上祀林放呂微之翁森

顧烈女祠 縣治北祀惜寶阿香

趙長官祠 安洲驛右祀趙善忠今廢

湯公祠 縣治東祀湯公聘尹

王公祠 東嶺祀王
令明整

汪公祠 縣治東即義學
祀汪令夢說

坊表

狀元坊 武科
吳謙

狀元坊 武科陳
正大

折桂坊 吳芾吳謙吳詠
吳凌吳津吳驥

青雲坊 陳庸
陳章

聚魁坊 進士蔣
應雷

正諫坊 右正言
郭磊卿

正諫坊 左正言
張次賢

闡科坊 乙科梅
廷瑞

棣華坊 右科王孫
進兄弟

毓秀坊 文進士張朴武
進士張一飛等

孝義坊 趙幼聞
吳沆

友于坊 郭世卿以
上宋時建

文英坊 鄉科吳瓊李
世迪暨仁壽

牧愛坊 縣治
前

皇家麟鳳 通邑進士
舉人歲貢

父子開科進士 王凌用
王一甯

父子兄弟進士 應大猷應大桂
應存性應存卓

內臺總憲 左都御史
吳時來

奕世上卿 贈都御史吳
榮贊吳炳臺

大文宗坊 提學
王純

萬歷仙居縣志

卷六

一一

仙居叢書

進士坊 郎中
蔣泮

大諫議坊 給事中
吳廉

少方伯坊 參政
張儉

司寇尙書 應大
猷

憲藩坊 應大桂應存
性應存卓

攀龍附鳳 進士林
應麒

諫垣潘泉 給事中
顧宏燾

柏臺坊 監察御史
盧明章

忠孝坊 吳仲修吳
燾吳圻

歷朝科甲 梁宋進士吳全智吳芾等
國朝進士吳炳庶吳時來

奕世簪纓 宋吳
洪等

翰臺坊 庶吉士監察
御史戴宏演

柏臺 御史王
存忠

進士坊 郎中金
克厚

旌節坊 應存儒
妻陳氏

鄉進士坊 通判
尹彥

烈女坊 顧氏惜寶阿香
應存卓爲之記

百歲坊 義民張
朝瑞

孝節坊 孝子吳榮璧吳炳
庶節婦潘氏金氏

大文宗坊 提學
應良

臺憲坊 副都御史
李一瀚

天官尙書 應大
猷

萬歷仙居縣志卷之六

萬歷仙居縣志卷之七

寺觀

儒者之言曰夫道一而已矣乃柱下竺乾卒鼎立不可廢豈流派則殊於教人為善之旨無二宗歟夫二氏諄諄以地獄恐人人且不忍至於焚修供養好言達舍其望福之心更有深於怖禍者甚矣民之貪而愚也仙之梵宮寶閣皆勗自往昔今無建者故室美而新室惡可以徵民力之衰矣

顯慶寺

縣治西舊在紫籙山下名顯元梁天監二年建隋大業元年廢唐貞觀十年重建天寶六年有神光現今址遂徙之改為光明山會昌五年廢大中二年重建宋祥符元年改今額國朝

嘉靖二十七年重

修林應麒為之記

金像寺

縣西三十五里五代時韋氏捨宅建以其初斷地得石佛故名歲久無碑惟石幢歸然唐垂拱三年也舊傳自海上浮至色如乳人取其屑以愈疾

廣慶寺

縣北三十里紫籙山上

殊聖寺

縣西南五十里舊名奉國宋治平間改今額

福延院

縣西南四十五里天禧三年建舊傳僧清徹卓錫於此有猛虎馴伏焉

萬安院

縣西南四十五里

崇相院

縣西南二十五里舊在西平坡名雲峯宋天禧間圮於水移今址

護聖院

縣東南五十里前有二塘號雙鑑其水足灌寺田

萬歷仙居縣志

卷七

仙居叢書

興道院

南峯上有涵清亭藍光樹稼二軒下瞰大溪為放生池

奉聖院

縣西南十里宋隆興中建舊傳僧宗秀誦蓮經有蓮葉自地湧出俗稱蓮堂云

東寶相院

縣東十二里舊名普勝塔院宋天聖間改今額

三學院

縣東二十里

多福院

縣東二十五里宋慶歷三年建

宣妙院

縣西北三十里五代時建宋紹興間重修

法明院

縣西南四十里舊名景星宋治平三年改今額

殊聖院

縣西北五十里舊名奉國宋治平間改今額

西寶相院

縣西五十里舊名梁興梁天監間建宋祥符元年改今額

治平院

縣西七十里舊名廣業唐建中間建宋祥符元年改今額

慈安院

縣東北三十里宋建炎三年建

興化院

縣西北三十里宋開寶八年建

廣巖院

縣東十里宋慶歷三年建

集福院

縣北十里宋天聖二年建

崇教院

縣南二十里宋靖康元年建

淨梵院

縣西南十五里梁天監中建

大興院

縣東十五里宋開寶中建又名石頭寺

正覺院

縣東南七里舊名珠頭嚴宋開寶中建治平三年改今額

精嚴院

縣西三十里舊名靈泉唐乾符間建宋治平三年改今額

普勝院

縣東北三十里五代間建宋治平四年賜額

鷲峯院

縣東南三十里宋靖康元年建

淨居院

縣西北四十里宋僧行機重建

善因院

縣南五里唐廣明間建宋治平三年賜額

正貞院

縣東南五十里宋紹興二年建

淨樂院 縣西七十里唐咸通間建名

廣福院 縣西一百四十里宋咸平間建

明聖院 縣西十五里宋景祐中建

清修院 縣西二十五里宋開寶中建開禧元年重修

寶積院 縣東南三十里宋治平三年建

慧門院 縣西三十五里宋景祐五年建

梵巖院 縣西十里宋元祐六年建

普光院 縣西南八十里

淨勝院 縣西南五十里唐陳長者建宋治平三年賜額

大仁院 縣西南四十五里宋紹興中建

明覺院 縣南三十里宋紹興中建

普信院 縣西四十里宋開寶八年建治平三年賜額

福應院 東山上 有浮屠

佑聖真君廟 縣西二里宋淳熙間建

應瑞侯廟

縣東二十五里麻姑巖祀唐管供奉初管奉詔詣洞官設醮而麻姑見管不知也歸與階行中途忽化鶴飛入麻姑山而去管嗟望墜馬死有司以開封而祀之至宋紹定間

蕭德藻赴南宮夢神告以必中間何神曰瑞應侯也上帝徵我為監門官故相告耳既登第注仙居俯視圖牒有侯廟遂首祭之

慈感廟

縣北六里祀杜氏二女初隋大業末二女家鬻湯餅市笄喪父母庖人挑之二女憤激殺庖人而去之孟溪隱焉會溪漲溺死唐天寶初鍾離介者寓長安夢二女揖曰吾家孟溪君今

中第尹吾邑矣已而果然入境見二枯骨望膝上卽之道阻斧藤藤流血斷石石亦流血及舉其骸鈎連有聲遂取以回有樵夫告之曰此石藤石發二夫人鎖子骨也語竟忽不見介嗟異塑其

骨祀之至宣和間民避寇其中寇望山中草木皆兵懼不敢犯慶元二年令趙幼開以聞遂賜額禱雨輒應國朝萬曆三十年知縣陳學繼重修為之記

萬歷仙居縣志

卷七

二

居仙叢書

紫籙廟

唐天寶中建 祀其山神

三井廟 祀其潭神

彭溪廟

祀其潭神

靈康廟

縣治東舊名仁濟國朝正德間廢萬曆三十二年重建

韋羌廟

祀其山神

杜蜀王廟

縣西三十里

項羽廟

縣東三十五里

支將軍廟

縣東七里俗傳支與黃巢戰死而顯異故祀之

赤城廟

祀其山神

石龕廟

縣東十五里 祀其土神

大營廟

縣東南二十五里相傳宋時大營小營兄弟戰死而顯異故祀之

韋大將軍廟

縣東三里

石橋廟

縣西八十里宋時建祀胡四郎

龍王廟

浮石山上國朝萬曆三十一年建

枕海廟

縣西六十里 祀其山神

蒼山廟

縣南四十里祀吳將軍朱剛

白巖廟

縣南七里

靈山廟

縣西十五里

張阜廟

縣西二十五里

孤山廟

縣南八十里

陳九郎廟

縣東二十五里

關王廟

一在縣西三十里一在縣治東

葛公廟

縣西三十里

忠烈廟

祀元吳仲修

東嶽廟 縣西二里

石室王廟 縣東十里又有石藏石感各有廟相傳皆其伯仲也

麻姑廟 麻姑巖上

蔣仙廟 縣東南二十五里

純熙觀 括蒼山下羣峯迂抱溪水潺湲舊名峽山吳時葛玄建初玄至此山有景雲覆西北遂築室為煉丹之所事聞詔建侯神館仍賜號焉今丹井尚存唐末觀之龍虎神見夢於吳越王復

加崇輯宋慶歷中邑人吳用堯修堂殿廊廡道士胡道崇創

吳天閣政和中用堯裔孫請改今額後毀紹興五年重建

凝真宮 括蒼洞唐天寶七年有慶雲覆洞因建宮焉宋天禧二年賜額光宗書瓊章寶藏賜道士陳會真填之

隱真宮 縣東南二十里舊名隱元梁天監中建本吳蔡經故宅先是有王遠者得道飛昇三國時遊括蒼過經家謂曰汝有仙骨而不知道以金丹餌之及辛舉棺甚輕啓視無有越四年復返

妻益少謂家人曰七月七日王真人當來及期果至駕五色雲龍旌節導從甚都召經父兄見之又邀麻姑至曰不接奉五百年矣乃迭進香膳皆金盞玉華王以酒一斗勺水五升飲經家人後

盡室上昇今有石存杵存焉事聞詔建宮以奉之

塚墓

嗟乎世閱人多矣杯土隆然賢愚俱盡此雍門彈而孟嘗涕也雖然賢人君子之墓往往軼世猶存豈有陰爲之守者乎抑民之不能忘也仙之遺塚纍纍志之以佐碑碣之窮令無沒則已焉

萬歷仙居縣志 卷七 仙居書叢

唐宰相任昉墓 縣北五里有溪曰任家溪

諫垣蔣琰墓 金像寺前

梁祭酒吳全智墓 始在下磯遷葬東山

後唐大中大夫張文伏墓 在兆

宋顯謨韓昭墓 縣南五里管竹村

龍學吳芾墓 縣西十里申與

通判蔣旦墓 縣東

提刑陳庸墓 三十二都白雲庵

安撫郭晞宗墓 縣南蓮塘山

待制郭磊卿墓 縣南南峯

縣尉吳諒墓 縣南馬蹄山

教諭應灌墓 下角

司諫張次賢墓 後嶺

忠烈張華宗墓 塔山灣

布衣吳福墓 山名顏婆墓

隱士林放墓 東山

國朝知府朱季用墓 東嶺下

少卿張容墓 田市西

御史顧大奇墓 夏山頭

監丞王浚用墓 井坑

太子少師王一寧墓 縣東符箕山景泰中遣官營造

御史戴宏演墓 五都月山

御史王存忠墓 十都埠頭

提學王純墓 東嶺山

孝子應昌墓 觀音巖

教諭應匡墓 麻姑巖 萬松山

教諭張概墓

尙書應大猷墓 峽宮隆慶 遣官營造

別駕余世英墓 前涯頭

參政張儉墓 大戰口

方伯應良墓 觀音巖

參議吳廉墓 縣南營山

郎中蔣泮墓 縣南綵紐山

都御史李一瀚墓 東村山隆慶 遣官營造

宮保吳時來墓 大林萬歷 遣官營造

知縣張壤墓 十七都湖頭

顧烈女墓 懷仁

御史盧明章墓 縣東斷橋

副使吳炳庶墓 下洋

知府應存性墓 下芝

參政顧宏潞墓 隱真宮

同知林應麒墓 東旗山

知府應大桂墓

郎中金克厚墓

布衣余壤墓 東陳垸

經府余學孔墓 小水街



萬歷仙居縣志卷之八

官屬

令之親民尙矣一言之祥兆姓蒙潤一言之側閭左茹荼此未可與褊心淺慮者道也高皇帝重其任翼以丞尉帥以廣文蓋居然有百里七十里五十里之寄焉使按册而論其世考其人惟民有口百代有心其誰得而誣之詩曰民之父母書曰同寅協恭可不念哉

晉令

羊忻有傳

陳長官失其名今為罇浦神

徐履之見徐羨之傳

陳令

袁子雄見續高僧智顛傳

唐令一員

縣丞一員

萬歷仙居縣志

卷八

仙居叢書

主簿一員

縣尉一員

學長史一員學生二十五人

令

鍾離介天寶間任見慈感廟記

主簿

竇崇

縣尉

俞少府失其名見蘇頲集

辛少府失其名見張籍詩

後晉令

陳廓睦州青溪人天福二年任見嵯縣樽浦顯應廟記赤城志無攷疑即晉令陳長官

宋令一員

縣丞一員

主簿一員

縣尉一員



主學一員 初以令佐兼領學事後始專設又有學正學錄直學學諭無定員

令

朱去奢 端拱二年任

張禹錫 淳化四年任

耿平 咸平元年任

楊固 咸平五年任

趙服膺 景德二年任

郭易直 景德四年任

李中孚 祥符二年任

王阜成 祥符五年任

聶復 祥符七年任

李中德 天禧二年任

蔡辯 天禧五年任

陳戴 天聖元年任

李仲卿 天聖四年任

趙樵 天聖六年任

劉化成 天聖九年任

孟有祥 景祐三年任

秦康 景祐四年任

朱貽孫 寶元二年任

萬歷仙居縣志

卷八

一一 仙居叢書

陳襄 有傳

韓曄 皇祐三年任

李訓 嘉祐元年任

薛之彥 嘉祐四年任

陳齊 嘉祐六年任

盧昉 治平元年任

汪詢 熙寧元年任

張景玉 熙寧三年任

宋敏中 熙寧五年任

張輝 熙寧八年任

石景 熙寧十年任

梅昌符 元豐三年任

鍾離淵 元豐六年任

石景術 元祐元年任

何稟中 元祐五年任

孔延祖 元祐七年任

劉光 有傳

郭三益 有傳

蘇敖 建中靖國元年任

朱獻 崇寧四年任

楊審 大觀元年任

鄭南 大觀四年任

虞詢 政和三年任

晁昌之 政和六年任

王照 宣和元年任

杜綜 宣和四年任

朱大初 宣和六年任

張亨 建炎二年任

呂安中 建炎三年任

祝旦 紹興元年任

張闕 紹興三年任

林師蘇 紹興四年任

徐昌齡 紹興五年任

楊筠 紹興十年任

袁之才 紹興十六年任

杜思日 紹興十九年任

蘇諤 紹興廿三年任

梅克明 紹興廿五年任

陸潛 紹興廿七年任

徐楷 紹興三十年任

徐涓 紹興三十二年任

趙伯昌 乾道元年任

留立賢 乾道三年任

趙良臣 乾道六年任

諸葛餘慶 乾道八年任

陳大順 淳熙元年任

萬歷仙居縣志

卷八

三

仙居叢書

唐仲溫 淳熙六年任

莫洸 淳熙七年任

蔡興世 淳熙六年任

徐杲 淳熙十一年任

蘇光廷 淳熙十四年任

朱藻 淳熙十五年任

彭松 紹熙二年任

陳永叔 紹熙三年任

趙幼聞 慶元元年任

尤棐 慶元四年任

林岳 嘉泰元年任

趙汝達 嘉泰四年任

姚偃 開禧三年任

楊寮 嘉定二年任

董履道 嘉定五年任

吳千龍 嘉定八年任

潘剛中 嘉定十年任

許景龍 嘉定十年任

趙善惠 有傳

沈悉 嘉定十年任

林有宗 寶慶元年任

姜粲 紹定元年任

程士龍 紹定二年任

章敏子 有傳

張 儼 端平二年任

趙善正 嘉熙二年任

梁應龍 淳祐元年任

梁 約 淳祐四年任

夏 嘉 淳祐十年任

李 翱 淳祐十年任

劉定之 淳祐十一年任

聞人仲修 寶祐二年任

徐 燭 寶祐五年任

趙涇夫 開慶元年任

戴 鑫 景定二年任

趙崇蒲 景定五年任

宋 燭 咸淳二年任

孫元發 咸淳五年任

葉桂發 咸淳七年任

陳夢實 咸淳八年任

沈盤老 咸淳九年任

縣丞

沈 舒 宣和七年任

崔 縱 有傳

楊 綦 紹興十二年任

任作哲 紹興十五年任

萬歷仙居縣志

卷八

四

仙居叢書

黃 份 紹興十七年任

葉 仇 紹興二十年任

李 行 紹興廿四年任

盧 迨 紹興廿七年任

黃直諒 紹興三十年任

高子演 隆興二年任

周大椿 乾道三年任

李延傑 乾道五年任

薛 偉 乾道八年任

吳 薦 淳熙二年任

牛嗣寧 淳熙五年任

楊 浩 淳熙六年任

王 泉 淳熙九年任

趙善宿 淳熙十年任

王 柄 淳熙十四年任

楊奇卿 淳熙十五年任

沈 偉 淳熙十六年任

胡殆庶 紹熙三年任

張 燧 慶元元年任

李 悌 慶元三年任

馬 珪 慶元五年任

繆景仁 嘉泰二年任

趙汝佺 開禧元年任

楊公普 嘉定元年任

牛斗南 嘉定二年任

王憲 嘉定四年任

趙彥政 嘉定七年任

蔡籥 嘉定九年任

周思成 嘉定十年任

黃涑 嘉定十年任

劉 厚 嘉定十七年任 脩學置田

陸 衍 寶慶二年任

尤 煒 寶慶四年任

諸葛寅 端平元年任

趙希爍 嘉熙元年任

蔣介春 淳祐二年任

趙汝籥 淳祐五年任

趙介壽 淳祐八年任

劉 怡 寶祐三年任

邢翔鳳 景定四年任

沈慶孫 咸淳三年任

方 端 咸淳六年任

趙時洩 咸淳九年任

主簿

王友元 嘉定元年任

趙彥愴 嘉定五年任

萬歷仙居縣志

卷八

五

仙居叢書

戴 渠 嘉定九年任

張 垣 嘉定十年任

梁允恭 嘉定十年任

楊時升 寶慶元年任

王介修 寶慶三年任

蕭德藻 紹定三年任

陸 錫 紹定五年任

趙汝涑 端平元年任

李 萃 嘉熙二年任

趙與保 淳祐元年任

陳震孫 淳祐四年任

蔣 曉 淳祐九年任

左 鼎 寶祐元年任

方 岳 景定二年任

楊昌期 咸淳三年任

趙若檠 咸淳十年任

尉

朱 濟 天聖六年任

王 振 皇祐四年任

沈 權 嘉祐五年任

方安行 元豐元年任

馮 兌 元祐四年任

李惟德 崇甯四年任

許操 政和元年任

徐默成 有傳

呂奉 建炎三年任

劉詮 紹興八年任

趙緯 紹興十四年任

趙祖啓 紹興二十年任

王昌期 紹興廿九年任

阮先 紹興三十年任

余閔 乾道四年任

姜楷 淳熙五年任

王必進 淳熙十一年任

何次常 淳熙十五年任

萬歷仙居縣志

八

蔣興詩 紹興四十年任

錢撫 慶元六年任 專主教事

錢子立 嘉泰二年任

趙崇絳 開禧元年任

石子筠 嘉定二年任

孟必萬 嘉定元年任

施義榮 嘉定十七年任

王煥 紹定二年任

潘驥 紹定六年任

吳立之 嘉熙三年任

阮應得 淳祐六年任

趙巖詎 寶祐四年任

張綬 政和六年任

翁兌 建炎二年任

鮑常 紹興五年任

黃拱 紹興十年任

馮世寧 紹興十七年任

林元祖 紹興十六年任

葉翥 紹興三十年任

曹說 乾道元年任

陳得所 乾道七年任

萬儀 淳熙八年任

錢石 淳熙十四年任

林子發 紹興元年任

六

趙伯駿 慶元三年任

楊祐之 嘉泰元年任

楊拱辰 嘉泰三年任

王擇 開禧三年任 以上俱兼簿

李孝筠 嘉定五年任

趙汝愚 嘉定十三年任

徐驛 寶寶二年任

孫折 紹定四年任

潘驥 端平二年任

黃演 淳祐二年任

張自期 淳祐十年任

季真翁 景定七年任

趙次普 景定四年任

陳景輝 咸淳二年任

趙汝祺 咸淳四年任

楊濤 咸淳六年任

侯鑑 咸淳八年任

裘楚 咸淳十年任

儒學主學

林宓

呂咸

陳穎

王杰

張居仁

侯欽

朱永

陳飾

張萬

元達魯花赤一員

尹一員

縣丞一員

主簿一員

縣尉一員

典史一員

萬歷仙居縣志

卷八

七

仙居叢書

教諭一員

訓導二員

達魯花赤

王徵 至元十八年任 重建縣治

索蘭 至元廿一年任

茶婁 元貞三年任

牙海牙 大德五年任

稚合稚 大德八年任

瞻思丁 大德十一年任

阿爾思蘭 至大三年任

撒都丁 皇慶元年任

廉寧安海牙 延祐三年任

亦福的哈兒丁 至治元年任

馬合某沙 至治三年任

別都魯丁 泰定三年任

明里 天歷二年任

阿里沙 至順二年任

哈散沙 至順五年任

縣尹

連虎臣 宋臣降元至元十八年任

王章 至元廿三年任

陳文魁 至元廿五年任

盧俊民 元貞元年任

趙璧 大德四年任

邊邦恩 大德十年任

曹質 皇慶元年任置學田

牟應魁 延祐六年任

呂清 泰定二年任

孫琳 至順元年任

武斌 至正二年任

林阿索魯法 至正十年任

蔡國賓 至正廿一年任

常滋 至元廿七年任

趙敏中 大德元年任

朱叔麟 大德七年任

耶律重禮 至大二年任

崔子恭 延祐二年任

李德讓 至治三年任

李宜孫 天歷元年任

王淵 至順二年任

袁整 至正元年任修學校建櫺星門

戴元輔 至正二十年任

陳天吉 至正廿三年任建文明樓

縣丞

萬歷仙居縣志

卷八

八

仙居叢書

顏明 至元十八年任

杜繼良 至元廿一年任建明倫堂

孫德裕 大德五年任

楊繼賢 大德九年任

潘思永 至大三年任

劇伯顏 延祐二年任

牟仲信 至治二年任

俞焯 天歷二年任

方國璋 至正二十年任死于寇

主簿

李世傑 至元十三年任

洪春 至元廿五年任

趙適 至元十九年任

柴高明 至元廿六年任死于寇

劉裕 大德六年任

呂溥 大德十年任

林韶 皇慶二年任

劉元輔 至治元年任

班賢 泰定三年任

薛阿兒刺台 至順元年任

應玉 至元十八年任

楊德 至元廿九年任

王禎 大德二年任

趙嗣龍 大德七年任

沈謙 大德十年任

雷孛蘭奚 至大二年任

蘇秉鈞 皇慶元年任

葛逢辰 延祐四年任

宋仁 延祐七年任

郝禮 至治二年任

教化 泰定二年任

周溥 天曆元年任

潘原 至順三年任

徹知篤 至正二年任

縣尉

張用 至元十年任

謝得賢 至元十年任

韓成 元貞元年任

鄺思 大德三年任

王瑄 大德六年任

張甫 大德九年任

趙子成 至大元年任

衛良臣 至大四年任

張伯祥 延祐四年任

別禿魯思 延祐六年任

萬歷仙居縣志

卷八

九

仙居叢書

蠻速魯丁 泰定二年任

李克明 泰定三年任

董宗德 至順元年任

何震 至正二年任

儒學教諭

黃道履 至元元年任

陳紹商 至元十年任

鄭士達 至元十年任

盧宇 正元二年任

鄭殷 至元廿四年任

袁一雷 至元廿八年任

胡桂叟 至元三十一年任

高裕 元貞元年任

謝寅炎 大德元年任

袁次中 大德二年任

陳紹開 大德四年任

施機 大德六年任

王祥 大德八年任

戴震 大德十年任

盧永詔 至大元年任

陳士民 至大二年任

吳辛 皇慶元年任

潘舜卿 延祐九年任

俞仁長 延祐五年任

蔣翬 延祐六年任

金鉞 至治元年任

朱枋 泰定二年任

吳英 天歷元年任

王剛中 至順元年任

董石 至順三年任

魏良輔 至順十年任

國朝知縣一員

縣丞一員 萬曆七年革

主簿一員

典史一員

吏戶禮兵刑工六房司吏六名典史十二名舖長司司吏一名承發科典史一名。皂隸十名禁子七名弓兵三十名
陰陽學訓術醫學訓科僧會司僧會道會司道會各一員巡檢司稅課司河泊所官吏並革

教諭一員

訓導二員

廩膳生員二十名增廣生員二十名附學生員不拘名數 司吏一名 齋夫四名膳夫十名門子四名庫子一名斗級一名

知縣

任繼先 人才本縣人洪武四年任時法令嚴峻繼先畏之六年歸隱於下黃

王從古 明經洪武七年任修文廟

萬歷仙居縣志

卷八

十

仙居叢書

王應鍾 賢良洪武九年任

周臣 方正洪武十一年任以不職解京作城役

熊釗 明經濟甯人洪武十四年任

劉成 新州人洪武二十四年任

張約 監生費縣人永樂九年任賦性純篤蒞事公勤民懷其惠

劉忠 舉人江陵人永樂十年任

林質 舉人丹徒人宣德四年任

林廣 舉人南平人宣德六年任

倪緯 監生山陽人正統四年任

郁尙寅 監生吳縣人景泰二年任純厚篤實政尙廉平見王文通公傳

張翔 人才崑山人景泰五年任清介不苟善楷隸工詩文終瀘州知州所至有政績

劉銀 舉人懷陽人天順八年任

程佺 歲貢巴陵人成化元年任

彭鼎 舉人新會人成化六年任

劉志芳 舉人上高人成化十三年任循學治百姓懷之又塞水塘以廣學宮

陳字 舉人侯官人宏治四年任

李經 舉人新會人宏治九年任

錢世資 舉人祈陽人正德元年任

童仁 舉人桐城人正德七年任

李中 舉人增城人正統九年任

梁東之 舉人德慶人正德十一年任

曹廷桂 舉人正德十五年任有傳

姚相 舉人江陰人嘉靖八年任

周瑞 進士莆田人嘉靖十四年任留心學校加惠編氓去後人咸思之

况一經 舉人高安人嘉靖十七年任蒞政精明下不敢欺

邱桷 舉人麻城人嘉靖二十三年任

謝德聰 舉人安福人嘉靖二十五年任

馬濂 進士嘉靖二十年任

姚本崇 舉人福清人倭變謫戍

朱邦臣 舉人太倉人嘉靖三十七年任

姚服璜 舉人荆門人嘉靖三十八年任

余城 舉人嘉靖四十年任

黃議 舉人莆田人隆慶元年任

宋邦達 舉人莆田人隆慶四年任

趙善政 進士隆慶五年任

周裔登 進士萬曆二年任

羅文煒 舉人浮梁人萬曆六年任

金凌漢 舉人高安人萬曆八年任

王寵麟 舉人麻城人萬曆九年任

湯聘尹 進士萬曆十年任

沈道光 舉人華亭人萬曆十六年任

王明愨 舉人萬曆十年任

汪夢說 舉人貴池人萬曆二十六年任禮士愛民政績可紀

陳學繼 進士都昌人萬曆三十年任

顧震宇 舉人崑山人萬曆三十三年任

鄧應璧 選貢儀真人萬曆三十八年任

莫是豹 舉人清浦人萬曆四十一年任

萬歷仙居縣志

卷八

劉泮 舉人麻城人萬曆四十三年任

曾學一 舉人瓊山人萬曆四十四年任

余震 舉人莆田人萬曆四十七年任

陳起龍 舉人海澄人天啓二年任修舉曠典振作斯文士民懷感建祠祀之

縣丞

黃勉 監生餘干人洪武五年任當法令嚴密之時清以勵已勤以任事陞順天府治中

左弼 監生江陰人永樂五年任

王賢 選貢南充人成化六年任

丁性 監生臨清人宏治元年任

史焯 監生高淳人宏治十年任

萬里 監生鉛山人正德三年任有法術歲早能動五雷立致雲雨民皆感之

戚和 監生丹徒人正德十三年任

張時舉 溧水人嘉靖元年任

陳志元 歲貢萊州人嘉靖十九年任

徐範 吏員無錫人嘉靖三十一年任

蔣琬 恩生全椒人嘉靖三十二年任

黃輔堯 監生莆田人嘉靖三十五年任

鄔橘 監生費縣人嘉靖三十八年任

王臣 監生進賢人嘉靖四十二年任

龔寶 吏員江都人隆慶元年任

盧登 監生潁州人隆慶六年任

程汶 監生餘縣人萬曆三年任

陳理 歲貢貴池人 萬曆七年任

主簿

趙監 監生乳源人永樂元年任公 清自守役富安貧士民懷之

孔鏗 監生當塗人正 德十六年任

邱聰 監生南昌人 嘉靖十年任

邵山 監生高安人嘉 靖十六年任

黃堂 監生江西人嘉 靖廿一年任

馬琛 監生濟南人嘉 靖三十年任

馮鑛 監生東阿人嘉 靖三十一年任

戴錫 監生蒙城人嘉 靖三十四年任

張佑謙 監生曹州人嘉 靖三十六年任

張元卿 監生平度人 隆慶三年任

盛時 監生崑山人嘉 靖四十五年任

謝策 監生平度人 隆慶三年任

徐良輔 監生濟南人 隆慶五年任

胡一松 監生廬陵人 萬曆五年任

吳正大 有傳

李一清 吏員曹縣人 萬曆十年任

支一元 歲貢茂州人萬 曆二十年任

韓雨仲 監生婺源人萬 曆十三年任

曾學周 有傳

戴世用 吏員南昌人萬 曆二十三年任

萬曆仙居縣志

卷八

十一

仙居叢書

曹經野 監生南昌人萬 曆二十六年任

程鳴臯 監生婺源人萬 曆二十九年任

林萬豪 監生龍溪人萬 曆三十三年任

吳道遴 吏員同安人萬 曆三十四年任

楊安 吏員平度人萬 曆三十七年任

典史

唐伯逸 監生南昌人洪武七年任嘗謂取民財 如取鷲鷲股上肉誠心愛民一塵不滓

周諫 吏員南昌人正 德十六年任

梁早

徐映

陳祐 吏員當塗人嘉 靖十年任甚得

杜鳳 吏員黃岡人嘉 靖十八年任

朱科 監生華亭人嘉 靖二十一年任

俞大基 吏員當塗人嘉 靖二十五年任

尹瓊

楊仕立 吏員嘉靖三十五 年任城陷逃去

江沐 吏員麻城人嘉 靖三十六年任

陳嘉言 吏員龍溪人嘉 靖三十八年任

王越 吏員南昌人嘉 靖三十九年任

周清 吏員崇安人嘉 靖四十三年任

黃閣 吏員順天人嘉 靖四十五年任

黃子中 吏員南昌人 隆慶元年任

夏希尹 承差福清人 隆慶四年任

王 棖 吏員句容人 萬曆五年任

潘世全 吏員德州人 萬曆十三年任

張敬遠 吏員南豐人 萬曆十七年任

曾 份 吏員崇安人 萬曆二十一年任

張大恩 吏員無錫人 萬曆二十四年任

葛 楨 吏員蕪湖人 萬曆二十九年任

王守禮 吏員保昌人 萬曆三十二年任

鄭同文 吏員延平人 萬曆三十五年任

儒學教諭

高 侃 舉人吉安人 洪武十年任 嚴章程 勤考課 士子歸心 陞國子監博士

吳陽保 舉人福建人 永樂十七年任 德性 純厚 敷教有方 自是科第始盛

趙以端 舉人本縣人 永樂十八年任

陳 昂 舉人本縣人 宣德二年任

李 猷 舉人本縣人 正統十年任

應 行 舉人無錫人 景泰二年任

蘇 璞 舉人福建人 宏治十年任

史 智 潮州人 正德四年任

周 南 上元人 正德八年任

吳 泰 有傳

周天錫 舉人丹陽人 嘉靖四年任

吳 清 歲貢東宛人 嘉靖十二年任

萬歷仙居縣志

卷八

十三

仙居叢書

曾茂卿 舉人長樂人 嘉靖十八年任 長于文學 作興士類 尋登進士

章 紹 舉人南海人 嘉靖二十年任

洪 烱 歲貢歙縣人 嘉靖二十四年任

曾可耕 舉人廬陵人 嘉靖二十九年任 工詩 善書 振作士風 諸生向慕 尋擢主事

黃虞臣 舉人豐城人 嘉靖三十二年任

方 輅 歲貢漳浦人 嘉靖三十五年任

吳良貴 泰之子 嘉靖三十七年任

施大受 歲貢金壇人 嘉靖四十年任

賴 治 舉人永豐人 嘉靖四十一年任

胡 潛 舉人無錫人 嘉靖四十三年任

楊重俊 舉人進賢人 隆慶元年任

黃桂芳 歲貢漳浦人 隆慶二年任

吳大紳 歲貢宣城人 隆慶四年任

林際揚 歲貢南安人 萬曆元年任

馮 韶 歲貢會稽人 萬曆二年任

劉 穩 歲貢分水人 萬曆七年任

周 允 舉人會稽人 萬曆十一年任

謝 裳 歲貢當塗人 萬曆十四年任

胡 濂 舉人浮梁人 萬曆十九年任

陳學禮 有傳

詹 芹 歲貢常山人 萬曆二十六年任

周大時 舉人侯官人 萬曆二十九年任

金 鍾 歲貢會稽人 萬曆三十一年任

吳維翰 舉人青田人 萬曆三十五年任

訓導

王叔英 有傳

王元桂 洪武間任

鄭顯則 明經本縣人洪武二十年任操履端方學問精粹誘掖士子務盡其心陞通判

張廷璧 儒士本縣人洪武二十八年任穎悟絕倫工詩善書尋入翰林

吳元諒 歲貢洪武三十二年任

趙古銘 賢良本縣人永樂元年任

朱棨 明經本縣人永樂三年任

謝敷 歲貢臨海人永樂十五年任

劉鐸 歲貢福州人成化元年任與知縣劉志方塞塘水廣學宮以振勵斯文

鄭敏 歲貢莆田人成化十五年任

羅綸 舉人正德十一年任

李麟 歲貢金壇人正德十一年任

陳中正 歲貢同安人嘉靖四年任

羅瑞 歲貢萬安人嘉靖八年任

郭文晤 歲貢建甯人嘉靖十一年任

李坤 歲貢上饒人嘉靖十四年任

梁隆 歲貢東莞人嘉靖十六年任

蕭遷 歲貢高安人嘉靖二十年任

梁廷璧 歲貢橫州人嘉靖二十三年任

孫東序 歲貢杞縣人嘉靖二十六年任

萬歷仙居縣志

卷八

十四

仙居叢書

俞鏡 歲貢貴溪人嘉靖三十一年任

張子毅 歲貢武進人嘉靖二十四年任

尹華 歲貢虹縣人嘉靖三十六年任豈弟作人士習不穢尤長于詩兼工草隸

張文學 歲貢江陰人嘉靖四十年任

王仁民 歲貢雲南人嘉靖四十一年任

陳龔 歲貢杞縣人嘉靖四十二年任

王傑 歲貢橫州人隆慶元年任

林士升 歲貢莆田人隆慶元年任

梁春和 歲貢巴縣人隆慶五年任

鮑良鎮 歲貢鄞縣人隆慶六年任

劉宏基 歲貢商城人隆慶六年任

謝暄 歲貢晉江人萬歷元年任

袁桃 歲貢分宜人萬歷四年任

鄭昌國 舉人福甯州人萬歷五年任

鄭應銘 選貢分水人萬歷十年任

陳伯俸 歲貢永嘉人萬歷十年任

陶應儒 歲貢泰順人萬歷十二年任

金湯 歲貢龍泉人萬歷十二年任

寶永貞 歲貢滁州人萬歷十六年任

呂性祖 歲貢秀水人萬歷十九年任

馬效成 歲貢海鹽人萬歷二十二年任

黃世廉 歲貢星子人萬歷二十六年任

洪墳 歲貢定海人萬歷二十九年任

張崇聖 歲貢樂清人萬歷三十四年任

王 湛 恩貢閩縣人萬
歷三十四年任

續
補 教諭

李 浚 歲
貢

劉翔鯤 歲貢福建人萬
歷四十二年任

楊成教 歲貢餘姚人萬
歷四十三年任

吳 溢 歲貢慶元人萬
歷四十五年任

柳宗孔 歲貢九江人萬
歷四十七年任

謝汝嘉 歲貢無錫人泰
昌元年任有傳

萬歷仙居縣志卷之九

選舉

先民有言制科未必盡得士士固在制科中矣明興初辟選與科舉並重其後專重科舉之學士之奮躍天衢建經文緯武之略未有不由茲起家者如仙居僻處萬山中偉人碩抱遘會標奇可按而數也邇年以來入彀之彥幾如晨星而要以山川之氣鬱而必振則夫養之以需其成此其會矣易曰君子藏器於身所願與諸士勗焉

明經科

唐乾符 年

蔣

琰 歷縣令諫垣累疏不用致政

進士科

唐乾甯 年

萬歷仙居縣志

卷九

孫

郃 字希韓見赤城志方干詩序

梁開平二年

吳全智

歷官銀青光祿大夫

懋蜚卿

後唐天成元年

張文伏

累官大中大夫賜二品服所著有曲江藟言

宋政和五年何桌榜

蔣

旦 有傳

應

灌 有傳

宣化三年何渙榜

范

醇 字希孟歷大理寺丞湖南安撫司參議知南安軍朝請大夫

建炎三年李易榜

吳

謙 字多益歷知嚴處二州終朝請大夫

紹興二年張九成榜

吳芾有傳

紹興五年汪應辰榜

吳詠字永言終宣教郎知南安縣有西安集

紹興二十年趙岐榜

陳庸有傳

紹興二十四年張孝祥榜

吳浚字仲達謙之子終南外陸親院教授

紹興三十年梁克家榜

王若字若夫終淮東安撫司參議

隆興元年木待問榜

李由字民載終朝議郎知玉山縣

應振字伯起灌之子終儒林郎

陳澤字澤民終宣教郎

李遂夫字良夫由之子終宣教郎

萬歷仙居縣志

卷九

乾道三年蕭國梁榜

應策字衍仲終宣教郎

乾道五年鄭僑榜

吳津字仲登芾之子知南康軍

吳驥字仲魯詠之子終定海縣主簿

淳熙五年姚穎榜

胡括字釋之終石城縣丞

蔣文會字仲友終主管崇道觀

郭晞宗字宗之提舉福建路市舶瓊管安撫未行卒

張嗣明涇縣主簿

淳熙八年黃由榜

陳章有傳

淳熙十四年王容榜

楊祖堯字述甫歷國子監簿著作佐郎兼權吏部郎官知信州

紹熙四年陳亮榜

張次賢 有傳

慶元二年鄒應龍榜

鄒翰夫 字宗甫終尤溪縣丞

嘉泰二年傅行簡榜

郭明卿 字子宿宣教郎湖廣總領所幹官

開禧元年毛自知榜

梅廷瑞 字祥梅終漢陽軍教授

嘉定元年鄭自誠榜

吳煥 字堯卿嶽麓山長

嘉定四年趙建大榜

林仍 字因可紹興府教授

嘉定七年袁甫榜

萬歷仙居縣志 卷九

郭磊卿 有傳

趙時著 字仲昭翰夫子監行在左藏庫

李衛 字子文

嘉定十三年劉渭榜

葉秀發 字叔英朝奉郎有黃山詩稿

嘉定十六蔣重珍榜

顧周卿 字成子終朝奉郎

寶慶元年王會龍榜

趙時觀 字仲謙宗室

趙若煉 字叔虎終衛州推官

趙必昇 字允道宗室

郭存中 字道南晞宗之孫終江西路安撫司幹官

紹定二年黃朴榜

沈宗文 字純叔終南劍府教授

蔡朴 字質夫終朝散大夫知永州

周企 字叔望知銅陵縣尉

紹定五年徐元杰榜

朱浦 字彥南終奉議郎知鄞縣

端平二年吳叔吉榜

鄭雄飛 有傳

吳諒 字直翁梅卿之子終慈谿尉

淳祐元年徐儼夫榜

周或 字文叔終彬州教授

鮑雷 字仲發終六合尉

淳祐四年劉夢炎榜

吳堅 字彥愷煥之子左丞相降元

淳祐七年張淵微榜

呂震卿 字子貞終涇陽縣尉

淳祐十年方逢時榜

陳紹求 字仲辰終通判揚州

萬歷仙居縣志

卷九

寶祐元年姚勉榜

蔣應雷 字省已終知吳江縣

趙與鈺 宗室

寶祐四年文天祥榜

陳紹大 字仲實歷將作監丞知真州

趙若焯 字叔明宗室江西都司幹官

潘天與 字景仁潭州錄事參將

陳紹商 字會之監行在和濟局

開慶元年周震炎榜

趙若伉 字伯仁宗室泉州府市舶幹官

趙時父 宗室建康府推官

景定三年方山京榜

鄭憲 有傳

項震 字季省終奉議郎知連江縣

趙與諤 宗室

趙炊 宗室

咸淳元年阮登柄榜

張朴 字從文秘書監丞

吳賁 字文成松溪縣尉

咸淳四年陳文龍榜

王珏有傳

金渭字景望瑞州教授

趙時栗有傳

蔣彥聖字愚仲紹興監倉

王墳字仲和永康主簿

咸淳七年張鎮孫榜

金運字定國

海丹邱字成卿終殿學

咸淳十年王龍澤榜

趙嗣溼宗室

翁從龍字文炳教授

特科

宋政和五年

孟灝字世功終嚴州司戶參軍

紹興二十四年

萬歷仙居縣志

卷九

五

仙居叢書

應權字偉節終知寶應縣

隆興元年

應宗謙一名良字若虛終衡陽縣主簿

趙彥瑗字仲玉宗室平江府觀參推官

乾道二年

趙彥敏字懋功宗室建康府分司

乾道五年

陳愿字子愿終承議郎賜三品服致仕

乾道八年

方斲字子木終嘉州文學

淳熙二年

孟維翰字宗卿終通直郎

葉元憲字世則終縉雲縣丞

方剛字抑強終通直郎

淳熙八年

應士廉 字簡仲權之子
終新城縣丞

淳熙十一年

李介石 字正仲終
承議郎

金師軻 字仲醇終
道州文學

淳熙十四年

吳汲 字進仲謙之子
溫州司戶參軍

徐三復 字克孝終
監南嶽廟

紹熙元年

陳炳 字文夫終
監南嶽廟

楊浹

金三德 字克家終
涇縣主簿

紹熙四年

陳三省 字少曾終
承務郎

慶元二年

萬歷仙居縣志

卷九

六

仙居叢書

林有聞

金作就 字叔治監
南嶽廟

慶元五年

陳南 字南仲終
六合縣丞

戈之奇 字穎父湖
口縣丞

謝彪 字文伯處
州推官

顧牧 字謙之常
山縣丞

嘉泰二年

潘浹

開禧元年

陳穎 字叔秀終監溫
州贈軍酒庫

陳洪 字子良庸之子
桂陽縣主簿

金達 字士貴終
道州文學

嘉定十年

湯廷俊 字正卿終
揭陽縣丞

陳次新

嘉定十三年

吳洋 字次顏 修職郎

姜應龍 字升之 監南嶽廟

嘉定十六年

呂咸 字宗顯 泉州助教

楊煥然 字晦之光 子終承務郎

吳梅卿 字清叔 終忠州文學 著經說語錄 授徒講學

紹定二年

吳夢飛 字宗英 錢塘縣尉

吳嗣亮 字希叔 定海縣尉

陶朱冶 字良父 溧水縣尉

顧蠓 字子振 牧之子 德清縣尉

顧如川 字子清 銅陵縣丞

王簡 字謙文 江都縣丞

端平二年

張同甫 字孟莊 方正寡諧 託疾歸隱

方一新 字更之 湘鄉縣丞

陳夢祥 字吉甫 長溪縣尉

陳夢周 字成之 平陽縣丞

嘉熙二年

萬歷仙居縣志

卷九

七

仙居叢書

陳薰 字伯南

蔣洪懿

吳應高 字子如 陽江縣令

嘉定三年

李居安 字子深 嵎縣丞

咸熙元年

李豈潛 字顯父 浦江縣丞

咸熙四年

張克嘉 字斯美 海豐縣丞

吳暨 字彥勤 嵎縣丞

咸熙十年

楊光 字子顯 知昭州 立山縣

元皇慶二年

翁復吉 字原善 黃巖州判官

至正二年

張惟清 終揚州路教授

至正五年

張惟吉 湖南嶺北道經歷正義大夫

國朝洪武十八年乙丑丁顯榜

王峻用 歷教諭國子監學錄光祿寺丞國子監監丞

永樂二年甲申曾棨榜

戴宏演 改庶吉士預修大典授監察御史廉介自持仁慈御下督運營造所至有聲

永樂十六年戊戌李麒榜

王一寧 有傳

成化十七年辛丑王華榜

王純 有傳

萬歷仙居縣志

卷九

八

仙居叢書

成化二十三年丁未費宏榜

王存忠 歷御史知府無錢買靴詩云分付兒曹休指望好將芒履印蒼苔其清苦如此

正德六年辛未楊慎榜

應良 有傳

正德九年甲戌唐臯榜

吳廉 有傳

應大猷 有傳

張儉 有傳

正德十五年庚辰楊惟聰榜

蔣泮 有傳

嘉靖二年癸未姚涑榜

金克厚 終部郎中居官以廉潔稱

嘉靖五年丙戌龔用卿榜

應大桂 歷工部主事湖廣黃州山東登州兩府知府

嘉靖十四年乙未韓應龍榜

林應麒 歷吳江知縣廣東惠州府同知學富才宏未究其用

嘉靖十七年戊戌茅瓚榜

李一瀚 有傳

嘉靖二十九年庚戌唐汝楫榜

吳炳庶 歷主事知府雲南按察司副使

顧宏潞 歷行人給事中湖廣按察司副使

嘉靖三十二年癸丑陳謹榜

吳時來 有傳

嘉靖三十五年丙辰諸大綬榜

應存性 授工部主事清介自飭奉法無私坐忤權貴出知荊門州陞知府致仕

嘉靖三十八年己未丁士美榜

萬歷仙居縣志 卷九

九 仙居叢書

應存卓 歷貴州左布政使太常寺卿

嘉靖四十四年乙丑范應期榜

盧明章 有傳

萬歷十七年己丑焦竑榜

應朝卿 任監察御史參政按察使

萬歷二十三年乙未朱之蕃榜

應汝化 任工部郎中陞江西參政

鄉貢

元至正五年

柯謙 字自牧浙江路教授其子九思工于詩尤善以書法作竹木官至奎章閣博士

張國珍 慶元路教授

舉人

國朝洪武十七年甲子科

王峻用 字應天 中式進士

洪武二十六年癸酉科

鮑貴 字沅 陵縣知縣

洪武三十二年己卯科

吳集義 字廣 元縣知縣

永樂元年癸未科

戴宏演 字進士

潘叔正 字濟甯州同知治河有功民德之立祠祀於河側終梧州府同知

永樂六年戊子科

鄭準 字子衡坐與鄭恕同族被戮

王廷瑁 字

永樂九年辛卯科

萬歷仙居縣志

卷九

十一 仙居叢書

張景悌 字明孝寧德訓導

陳子寶 字安訓導 南

楊孟瞻 字應天中式徽州府通判

永樂十二年甲午科

王一寧 峻用之子進士

趙綬 字

永樂十五年丁酉科

陳恕 字

袁定 字寧訓導 永

永樂十八年庚子科

趙以端 字本縣教諭

方瑞玉 字

宣德元年丙午科

陳昂 字本縣教諭

正統九年甲子科

李猷中 字本縣教諭

景泰元年庚午科

應暄字

景泰四年

吳瓊字秀 王府紀善

暨仁壽

李世迪字

成化十三年丁酉科

王純字進士

金桂字

成化十九年癸卯科

王存忠字進士

宏治五年壬子科

潘龍字

宏治十四年辛酉科

萬歷仙居縣志

卷九

十一

仙居叢書

應良字元忠 進士

王存彝字日 照縣知縣

正德二年丁卯科

應大猷字匡 之子進士

吳廉字 進士

正德八年癸酉科

吳榮賀字 歷安仁等 郁餘干三縣知縣

張儉字暨 之子進士

正德十一年丙子科

蔣泮字祿 之子進士

嘉靖元年壬午科

吳榮泰字

金克厚字 進士

嘉靖四年乙酉科

林應麒字進士

應大桂字匡之子 大猷之弟進士

嘉靖七年戊子科

李一瀚 字進士

嘉靖十六年丁酉科

余世英 字應天中式歷知縣通判

嘉靖二十二年癸卯科

應存性 字大猷之子進士

嘉靖二十五年丙午科

顧宏潞 字進士

嘉靖二十八年己酉科

蔣中穆 字泮之子

吳炳庶 字榮賀之子進士

吳時來 字進士

嘉靖三十一年壬子科

盧明章 字進士

萬歷仙居縣志 卷九

十二 仙居叢書

嘉靖三十四年乙卯科

尹彥 字應天府通判

戴瑞 字應天中式宜黃知縣

嘉靖三十七年戊午科

應存卓 字大猷之子進士

嘉靖四十年辛酉科

應存初 字大猷之子應天中式歷知縣評事南京刑部主事

萬歷元年癸酉科

吳時驥 字炳庶之子應天中式

萬歷七年己卯科

應世科 字存性之子順天中式將樂知縣

萬歷十年壬午科

吳錫德 改名迪甫字安義縣知縣

萬歷十六年戊子科

應汝化 字存卓之子進士

應朝卿 字存素之子進士

萬歷二十五年丁酉科

應鳴時

歲貢

國朝洪武

楊文宗 歷經

孔子久 刑部主事

謝廷桂 主事

張六成 縣丞

陳清 都察院司務

盧迥 有傳

張容 初名十五御賜今名字子顏歷監察御史大理寺左少卿

吳炫 歷給事中江西按察司副使

呂成章 訓導

鄭恕 有傳

趙克俊 樂平知縣

萬歷仙居縣志

卷九

十三 仙居叢書

王通真 教諭

陳德 訓導

顧大奇 初入見太祖以顧大哥呼之歷監察御史江西按察司副使

張存晦 衛知事收流賊有功陞通政司知事副使趙象立牌以紀其績

張慶 主簿

金伯球 湖廣大治縣知縣

永樂

應得浩 江西大庾縣知縣

阮仲志 僉都御史畏法自陳改教

盧參 主簿

汪惟澄 漳浦縣知縣清謹著績

應仲義 刑部主事

陳宗翰 縣丞

孔宗祀 德化縣知縣

楊孟瞻 詳鄉科

潘文通 衛經歷

陳洪

沈玉

盧貴重 訓導

潘杲 訓導

方高

鄭茂興 訓導

柳原理 府照磨

夏斐知縣

陳同倫問理

張惟德詹事府主簿

張伯厚歷主事府審理長史

王道正教授

鄭文廉穎上縣知縣祀穎上名宦

洪熙

陳文忠府同知

宣德

王載縣丞

張宗翰恩貢訓導

陳士節廣信府同知有惠政循聲

王懷忠教授

金進德

金希厚官推

鄭暲知事

楊宗潤

鄭滔教授

金璧教諭

沈孟範都督府經歷應天府治中

萬歷仙居縣志

卷九

十四

仙居書叢

正統

應明訓導

陳廷璧審理

吳同志通判

潘奇知縣

周旋知縣

錢愷訓導

周宏彥知縣

李忠知縣

周果知縣

周仁一名介知縣

林宗盛主簿

錢永典史

陳密知事

陳悌訓導

景泰

葉遠斷事

陳通教諭

王諭教諭

蔣輝福州府同知居官有政績

天順

吳叔正訓導

應燉縣丞

王環主簿

蔣祿安溪縣知縣
清苦著稱

成化

張叔新吏目

吳叔深府經歷

張成德有傳

徐謙訓導

張汀教諭豈弟作人
祀京山名宦祠

項像知事

張概訓導捐俸周
貧士心歸向

徐普教諭

吳洪寧訓導

蘇綱訓導

吳洪賜廣東
州知州

楊煥經歷

宏治

周惟德訓導

潘密教諭

張雲知事

王潛教諭

萬歷仙居縣志

卷九

十五

仙居叢書

應匡孝友孚于宗族仁厚洽于鄉閭未仕
而卒子孫簪祖相承蓋盛德之報云

金祥

顧欽訓導

張輦訓導

徐恕推官

正德

王濟教諭

吳榮璧有傳

陳采教諭

張詠終國子
監生

應大經學正

張壤湖廣藍山縣知
縣致政歸養

張埴選貢感恩
縣知縣

陳顯奇

嘉靖

余世忠魯府
紀善

林鶴

張瑗訓導

陳存明訓導

蔣瓊訓導

陳鏡

潘崇奎訓導

王南教諭

潘廷章訓導

王槐訓導

戴瑞應天中式

潘崇本

李一潮訓導

吳炳漢有傳

陳良金訓導

吳子龍有傳

應木訓導

王涵教授

王汝乾訓導

徐崇點教諭

陳大節通判

顧宏法訓導

隆慶

吳時驥恩選詳鄉科

王銀訓導

張問明

萬歷

萬歷仙居縣志

卷九

十六

仙居叢書

朱明吉

應存魯恩科歷知縣通判

王臣訓導

吳炳正善記

吳炳思教授

應存弼選貢饒州府通判

尹廉教諭

應存素訓導

吳時遂訓導

應來訓導

吳錫鳳選貢州判

余鼎善紀

楊先春選貢

朱良翰訓導

王懋岑

應存光恩貢訓導

陳時璉

蔣澤隨

薦辟

元至正

吳里仁增城縣主簿

吳嗣宗來賓縣主簿

潘維 字重綱寧國路教授

張國衡 字可權奎章閣參書

方志道 字成之越州蘭亭文學

吳揚 有傳

國朝洪武

張熙 國子監學正

張伯原 工部主事

應宗毅 上蔡縣知縣

鄭貴遠 教授

潘森 平樂府通判

應得浩 大庾縣知縣

吳原亮 味縣訓導沈靜方嚴動必以禮明正學以開後進及病與僚友諸生共談恬然而逝

鄭丙文 教諭

黃聞見 主簿

吳得晦 鉛山縣知縣

鄭文遠 刑簿員外郎

朱季用 福州府知府

張宗顏 授行人差訪賢才

顧碩 有傳

周彥宏 新會縣知縣

張子太 州知州

陳源清 縣知縣

萬歷仙居縣志 卷九

張子恭 徽州牧

翁深遠 國子監學正

鄭顯則 訓導

胡宗諒 府知府

鄭興泰 桃源縣知縣

張允修 簿主

潘原美 龍泉縣知縣

朱焯 太常寺少卿

趙古銘 教諭

顧濬 博羅縣知縣

陳郁 吏目

吳炬 曲沃縣知縣

朱斐 訓導

張挺 兵部主事

永樂

尹道真 縣丞

陳倫 理問

吳埤 宿州通判

姚原禮 縣丞

葉湜 周府紀善曹國公南征為參謀官有詩名

吳填 利津縣知縣

張宗福 勅房中書

戴象 縣知縣

封贈

王愷 以孫一寧貴
贈太子少師

王峻用 以子一寧貴
贈太子少師

王懷廣 以子純貴封
按察司僉事

張諤 以子成德
貴贈郎中

張景舒 以子伯厚
貴贈審理

金廷 以子克厚
貴贈郎中

吳珪 以子廉貴贈
禮科給事中

張概 以子儉貴封
工部主事

應匡 以子大猷貴
贈刑部尚書

蔣祿 以子泮貴贈
工部主事

應昌 以子良貴贈
按察司副使

吳榮贊 以孫時來貴
贈左都御史

李鐸 以子一翰貴
贈監察御史

吳叔深 以子榮賀
貴贈知縣

吳榮賀 以子炳庶貴
贈工部主事

吳炳臺 以子時來貴
贈左都御史

林世謙 以子應麒
貴封博士

顧昭 以子泓濤貴贈
按察司副使

尹夫問 以子彥貴
贈知縣

應存素 以子朝卿貴
封監察御史

應大建 以子存相貴
封京衛經歷

卷九

恩廕

王宇 一寧之子
子知府

王顯 一寧之子
中書舍人

吳兆昆 時來之孫
國子生

監生

王盤 主簿

吳夢龍 縣丞

應大悅

應大賀

吳炳熙

朱鵬 嘗捐園地
以廣學宮

林應雷

張澤

應本

尹宗賢

應存初 詳鄉科

王虞圭

應存遠

金學孔 萊州經歷服官
清慎民愛戴之

張振英

顧義模

顧力行

顧力檄

應存相經歷

應世科詳鄉科

應世功任光祿寺監事

應世燁

吳錫庚

盧明教府檢校

盧應振衛斷事以上俱由生員

尹大齡

尹大祚以上由俊秀

萬歷仙居縣志卷之十

名宦列傳

晉羊忻永和三年初置樂安公以廕補令移縣治於青圭前有創始之勞史稱公起家輔國參軍嘗詣領軍劉琨琨拂席改衣而後見由此知名然莫詳其治樂安狀也

宋陳襄字述古閩之侯官人政尚德化去鞭箠之威與民休息事無冤抑者初邑人未興于文公闢黌宮勸社學仍爲勸學文歲首父老入賀命門人管師宣讀之自是弦誦相聞而人才蔚矣擢侍御史薦司馬光呂公著等三十人于朝並極一時之選力詆王安石乞罷青苗法竟爲所擠出知陳州終樞密直學士學者稱爲古靈先生

劉光 人政務簡惠黎民懷之後選台州守郡人喜其來焚香載道墨吏多聞風解印去及代男女巷哭閉城使不得去

萬歷仙居縣志

卷十

仙居叢書

郭三益 人爲政寬和又能以嚴佐之民畏且愛與劉光齊名陳公襄後稱賢令者必曰劉郭

趙善悲字民如子歲侵賑給親自料理無問窮鄉僻壤撫循不倦民至今尸祝之

章敏子天性精敏湔剔夙弊吏不敢欺後令夏嘉治倣敏子凡不便民者釐革殆盡並著聲績稱爲章夏徐默成博綜墳籍約已恤民爲尉募年值呂師襄亂忠義奮激與巡檢鄒進力戰死之

崔縱爲丞未幾進承務郎金人以二帝北去前後通問者率爲所斃衆皆憚行公毅然請往不屈死之

國朝曹廷桂直隸武進人性廉潔不苟爲令七年案無留牘有便民者朝計而暮行之綽有成績國初循吏推公爲首

馬漉直隸無錫人曉暢吏事悉下情民依之如慈母嘗存靖難死節鄭公恕之

後而復其產嘉靖壬子倭寇焚黃巖將犯仙居公率兵邀擊之賊越嶺而遁尤著清節去之日父老歌曰民送兩行淚官行一擔書

余城江西鄱陽人嘗寇燹後城市蕭條人民逃竄公撫字有方流逋四集民復安堵爲人廉倨不肯媚要津務絕豪右之干請竟中萋菲以去于時張元卿者以簿攝行縣事其治倣余公其節尤苦綽有循聲

周裔登廣東南海人平易近民蒲鞭不施釜餽常有塵處民歌之曰官之清民之福昌其後崇其祿先是趙善政爲令禮士愛民頌聲日起未久改令東陽公代之治聲益著

湯聘尹直隸長州人前左給事中歷左參議以誣誤出爲仙居令爲治務節冗費并里甲濬水利改舖舍有利於民者圖之惟恐不及後入覲主簿吳正大攝行縣事一遵公約束民稱便焉其并課清丁二事尤爲時論所褒

王明罄閩侯官人與古靈先生同鄉蒞政之日慨然懷往每事追踪先生而時

有主簿曾學周殫心輔令公修學宮曾入山採木戴星還公營平政橋曾出橐金助役經理不倦令與簿相得有成號稱一時之

王叔英字原采黃巖人爲訓導以忠孝節義最諸士多所成立歷官翰林修撰靖難師迫公奉詔募兵聞金川門不守遂自經于廣德州詳見吾學編及赤城新舊志

吳泰閩延平人爲學諭豈弟作人尤加恩饗士歲時俟其至輒手俸金以授之曰若苦桂玉聊以資旦暮受者感泣陳學禮亦閩人勤訓誨躬行不忘士心向之其去也止石以志思焉

周思稷麻城人令臨海兩臺檄公于仙居履畝并圖公嚴明精審汰消耗董詭冒減圖一十有五積弊爲之一洗奸猾束手辱民沐其恩歌呼載道又推官俞霽通判鄒通皆以掌縣著績民咸思之

論曰徐默成殲身寇難崔縱隕身虜庭何遭時之坎與余城雖褫有餘榮矣

其餘談笑剗剗號稱良有司乃考其持節並有懸魚瘞鹿之風蓋身者政之本也意微自潤事輒頽然解矣景行行止是在後賢
名賢列傳

宋蔣旦字澹然政和五年與應灌同第進士先是邑之文學未振自旦與灌以力學顯士始慕而效之歷通判越州承議郎監石灰場懋著清節灌字仲宣終衡州教授子姓科第蟬聯世濟其美

吳芾字明可紹興二年進士官終龍圖閣直學士高宗欲還臨安公請駐蹕建康詔告中外使知不忘中原之意疏人不報朱子謂當紹興之季天子憤金虜之憑陵痛神人之羞辱慨然收用耆俊以遂中興之烈其所引拔以爲諫諍議論之臣者多得直諫敢言之士而吳公又其偉然有聞于時者也史稱王十朋吳芾歷詆奸幸直言無隱惜其不盡用焉

張次賢字子齊紹熙四年進士歷監察御史右正言兼侍講多所啓沃常揭古萬歷仙居縣志 卷十 二 仙居叢書
今治亂之由實以國家修短之驗爲書二十卷名曰監察錄又陳恢復之策動中機宣中外傳爲碩書尋遷左司諫抗節直言不避權幸劾時相史彌遠章九上彌遠銜之極力排劾公不爲動嘉定中擢殿中侍御史將大用之公力辭無何疾作卒謚文康公博學多聞千言立就而天性孝友居官廉潔妻謝氏丞相深甫之女于皇太后爲姑故累朝眷注甚厚公心澹然尤爲時所欽慕

郭磊卿字子奇嘉定七年進士居諫職彈劾無所畏避理宗懷余天錫定策之恩擢至執政公上疏曰臣聞鷓鴣入林鳳凰遠去豺狼當道鷓鴣自藏不仁而在高位則抱道懷德之士莫之敢近矣陛下欲聚羣賢以興邦治而股肱喉舌之任乃使庸邪廁迹其間是却行而求前也章三上天錫竟罷去史嵩之怙權不法公具疏俟朝對奏之而爲嵩之耳目所得亟除公起居郎公憤不得言徑出國門求去遂悒悒而卒時公與侍從徐元杰等號端平六君子天下方想望其風采而相繼以歿上亦念之特謚正肅立正諫坊以旌之

陳庸字時中紹興間進士終江西提點刑獄每辭官歸惟圖書數卷其子章歷官光祿大夫清介能繼父志爲時所稱卒諡忠簡

鄭雄飛字景淵端平間進士累官秘書少監戶部侍郎清譽著聞景定中太學生金渭等請祀公及縣尉吳諒于學宮稱六賢堂

國朝王一寧字 年十三能詩文隨父峻用官京師獻陵在東宮聞而召之試詩稱旨賜以金綺遣肄國學第永樂十六年進士授工部主事蒞事湘湖以廉介自持景陵求文學詞翰之士有司以公名聞召見命賦神京八景及嘉禾詩善之尋轉吏部主事以母老疏乞歸養不允改翰林修撰侍經筵正統改元兼修宣廟實錄擢禮部右侍郎督餉湖廣時苗蠻蠢動運道不通公擘畫有方民不勞而餉足回部轉左侍郎兼翰林院學士入內閣加太子少師公歷事四朝賞賜優渥主會試一主鄉試二詩文秀雅襟度坦夷獎成後進惟恐不及休休焉有古大臣之風卒贈太子太保禮部尙書諡文通

萬歷仙居縣志

卷十

四

仙居叢書

張成德字 成化六年貢爲南充知縣南充人好訟往往骨肉相殘公創諭俗亭作戒三篇月令父老申諭第其善敗而勸懲之風俗爲之一變又創五經書院延名士爲弟子師捐俸以資其費春秋久無傳習公親爲講解士皆悅服稱爲張夫子尋應聘爲雲南考官時山賊猖獗他邑禦之輒北公設奇應變遂蕩平之量移通判饒州百姓如失父母遮道泣送者萬計至今尸而祝之公遂謝病歸家居十年所著有史略竅言遜志存稿

王純字宏文成化十七年進士起家工部主事時太子少保工部尙書王恕忠亮端方朝廷倚以爲重直諫忤旨內批令致仕公言恕社稷臣宜留用以光聖德上怒下公詔獄謫思南推官尋起爲湖廣提學僉事公謹矩度先行誼抑浮競士類翕然嚮風未竟其用而卒衆咸惜之

應良字元忠正德三年擢南宮逆瑾方張威鉗文士公憤恚而歸聞王文成倡良知之學亟往從焉六年殿試二甲第七人改庶吉士授編修時逆瑾雖誅羣

奄用事公恥于脂韋竟乞終養肅皇嗣統起公田間議大禮忤旨杖闕下幾死尋奉使冊封唐王悉却贖餽已出爲山東提學副使歷陞廣東布政使致仕卒所著有南洲集藏于家

吳廉字 正德九年進士授禮科給事中時郭武定張壽寧以勳戚貴幸衆爭阿附公獨疏其罪惡武皇欲幸西北公偕同官上疏懇留跪午門外三日巡撫王某怙權恣肆公論斥之力薦王守仁堪代其任中貴畢眞鎮守江西受寧庶人金薦其孝行于朝公引祖訓駁之事遂寢大駕還京公請郊天策士以迨帝王之盛節轉戶科右給事中世廟嗣統首陳四事曰正君德開言路時經筵近儒臣上嘉納之自是直聲振朝廷柄國者忌之出爲四川參議公至輒糾重臣之使蜀殃民者民賴以安然衆皆憚而嫉之矣公不能媮阿瓦合乃三疏乞休簪冠芟服徜徉於雲蘿烟水之間翛然適也有許遊擊者以事餽公千金公正色却之又獨請於當路建雙忠祠以祀盧鄭二公其剛正類如此

應大猷字邦升正德九年進士授南京刑部主事公智識絕人宸濠之變廷議紛紜公獨策其必敗曰是何能爲不三日濠擒而捷書至矣已而果然衆皆歎服轉吏部主事尋出參政江西晉廉使布政使公清慎自飭內恕外嚴吏畏民懷望日重擢副都御史巡撫雲南地當交趾之衝夷情叵測公明法制時教閱繕器械選將士凡塞堡要害無不嚴爲之防諸夷懾服民賴以安轉吏部侍郎進刑部尙書並著聲績爲時名卿嘉靖 年致仕公歷官五十餘年其端方之度廉潔之操仁恕之心始終如一士有片言急于游揚家無餘資樂于施賑人皆德之朝廷賜存問者三卒年九十有七弟大桂子存性存卓孫汝化朝卿皆登進士大桂存性爲良二千石存卓以九列辭榮望高朝野汝化朝卿方駿駸大用其鄉薦及貢歷曹郎守令者又數人冠裳濟美甲于一郡

張儉字

正德九年進士除工部主事尋改南刑部稍遷員外郎大禮議起

公抗疏被杖垂死出爲江西僉事豐城水溢公親行視築堰以殺其患民歌之

名爲張公堰調福建僉事陞四川副使銅梁盜賊騷動公悉計剪除一境肅然陞福建參政未幾罷歸所著有圭山近稿

蔣泮字

天性廉潔力學安貧父祿令安溪甌磨釜魚嶠然不滓卒於官當

路賻贈二百餘金泮恐傷父志悉辭不受巡撫錢公鉞賢之檄所過州縣皆爲設祭以表揚之第正德十五年進士授工部主事權稅荊州痛懲奸吏百弊漸剔嚴立條款悉蠲常例立石以垂永久江陵驛日具支應銀二錢七分公行州貯庫以備賑荒光澤王重公雅操及公回部贈之詩云清風千古人難並白日歸鴻數卷書陞員外郎督理倉廩中貴楊某欲交驩公公弗與款狎楊憾之思欲中傷已而察公所爲益加敬憚言于侍郎董公曰數年以來未有廉能如蔣副郎者稍遷郎中再使湖廣卒於蘇州囊橐罄懸無以爲殮知府胡纘宗倡僚屬經紀其喪

李一瀚字源甫嘉靖十七年進士初令安福創審編之法釐革宿弊下不能欺

擢御史巡按江西食不重味一意便民而風裁肅然貪墨斂迹累遷副都御史屬纊之時囊無長物司空朱公衡稱公廉潔之操一塵不滓有趙清獻之風後二十一年左都御史吳公時來遺書郡守楊公道會曰李都憲天下第一流人物迄今未與鄉賢子孫貧也楊亟爲申請祀于學宮

吳時來字

嘉靖三十二年進士起家松江府推官值倭寇猖獗華亭上海

之民奔就郡城守者閉不納公坐城上洞開諸門聽民奔入甫盡而寇至矣全活萬計擢禮科給事中奉使册封琉球時嚴分宜竊政其子世蕃贖貨無厭將臣解體南北騷然公疏請黜嵩以正國體誅世蕃以杜亂源永陵震怒謫戍廣西昭陵卽位以遺詔復官歷陞都給事中操江副都御史吏部右侍郎都察院左都御史卒贈太子少保

盧明章字

嘉靖四十四年進士授行人擢監察御史巡鹽長蘆負稅被繫

者久或瘐死獄中公奏蠲其十之八又陳利弊六事商民德之改按巡天剖決

冤滯覆盆者有二天焉尋復命會鄉人金崇厚者辦事於京以邑丁消耗欲請并圖於上公力主其議竟得請邑又困於鹽牙往往蕩產以償公遺書當路歸其牙於商民困始蘇未幾疾作而卒

余世英字明卿嘉靖十五年選貢入南雍丁酉中應天王諷榜任山東堂邑知縣清介自持愛民猶子堂饑公捐振濟活以萬計堂民謠曰余父慈來何遲蚤來省百姓饑既而陞松江通判民又謠曰余父慈去何之一度思量一度悲公生而穎異七歲能書大字爲刺史重長兄諱世忠亦以選貢任宿遷教諭一時政教齊魯公父母偕老九旬欲迎養未得居松晨夕思慕僅八月而疾作未竟其用衆共惜之

論曰天下皆鄉也匯鄉而成天下問其鄉之靈氣必以其人考之而天下之大觀備矣僂無殊絕奇麗之產聞於天下而考論人文其大者多策奇樹偉磊落不可窺較而次者清修絕俗嶠然不滓於時自宋迄今若比肩而立蓋

天下之士非獨一鄉之善而已也吾是以著其傳俾作史者有考焉

萬歷仙居縣志卷之十一

忠義列傳

宋王珪字叔寶咸寧四年進士德祐丙子太后詔台州降元公時以太學博士權知州事與陳仁玉築城浚濠倡民堅壁以守城既陷公赴泮橋水死之元兵至

欲取首級以獻功其侄賓服珪冠帶自戕以全珪屍

一云珪臨海人

趙時栗字寬甫咸淳四年進士授海鹽主簿與元兵對壘旬餘食盡力戰死高申甫字字宣卿由武科除景陵縣元兵至格鬪而死張華宗者教授杭州及揚州臨江所至有聲開慶間元兵壓境欲火文廟華宗挺身翼之曰寧殺我毋使先聖無依也遂遇害

元吳揚字仲修以字行素以勇力聞至正間辟巖州同知時處陸溪洞寇侵仙居仲修率民捍禦于羅漢潭賊不敢進會有內應者凌晨襲其不備衆遂潰散仲修獨挺身格鬪手刃數人而死其子吳燾吳忻復率鄉兵擒賊并內應者剖心

萬歷仙居縣志

卷十一

仙居叢書

以祭其父有司以聞詔表其門曰忠孝立忠烈祠于縣南以祀仲修燾與忻加官有差

國朝盧迥少豪舉酒酣輒歌不屑曲謹洪武間貢入太學太祖微行觀燈窺聽書聲問曰今宵花市何不往觀迥曰雙親遠離功名未就思之悚然奚暇遊翫因與共談至午夜應對詳明日日召授戶部主事歷官侍郎靖難兵至抗節不屈延頸就刑長歌自若聞者壯之

鄭恕字本忠工詩善書聚生徒談經爲時宗所慕洪武間貢爲鄞縣訓導陞蕭縣知縣靖難兵至城陷遂死之

顧碩洪武間以通經儒士授山西石樓知縣授吏部主事文皇入金陵卽帝位召之不赴棄官逃去爲富家牧牛每至山椒水湄輒飲泣微咏每出牧携一竹筍緘膝甚密暮歸卽枕之臥或問此中何所有珍之乃爾輒悶悶不答至永樂二十一年盡赦諸死義家公聞之輾然歌曰騎牛緩緩過前阿手執牛繩口歎

歌牛飽人饑欲歸去幸何幸何幸幸何乃關笥出衣冠服之別主人而歸詢其詳始知爲碩也

張約字存博邑諸生每以忠義自許嘉靖丙辰倭寇犯境約率家人禦於光明山之麓爲寇所執刼導入城厲聲罵曰恨不斫賊奴萬段肯爲汝鄉導耶賊割其舌約以血噴之罵不絕口而死郡守譚公綸詣約死所爲文以弔之

論曰宋元諸君子臨難抗節九死靡移有不俟生而存者我朝建文諸臣蹈白刃甘赤誅若合符節其名與天壤俱流矣顧公晦名匿迹忍垢茹荼卒保其身以全其宗尙矣至嘉靖之季張公乃以青衿罵賊而死亦烈矣哉

孝友列傳

宋吳沆歷知昭靖二州母老乞祠以武經大夫主崇道觀割股和藥以愈母病縣令趙幼聞立純孝坊以旌之名其里曰孝義

鄭憲官大學博士德祐間元兵壓境憲奉母以逃遇兵欲殺其母憲抱持號泣

以身翼之曰甯殺我遂俱遇害時有順玉文者元兵至台而父被執玉文捍之頸被數刃與父俱仆移時復甦支離得免退居事母孝養彌篤吳處仁父爲元兵所驅巡山呼其子索銀以代死處仁趨而語之曰銀吾所藏也容歸取以贖父及發窖則已爲人所得矣乃曰銀已失吾戴吾頭來以代父死其弟淵詣前抱持亦祈代兄衆愕然義之遂俱獲免詳見翁森三孝傳

國朝朱煦父季用洪武中知福州有詔盡革官吏之爲民害者季用與焉輸罪作城役嚴償重日費數十緡季用謂煦曰吾貲力何以堪此且夕且死汝取吾骨歸葬耳煦惶懼不敢離左右時同役告枉者甚衆令益嚴告而被極刑者四人矣與同役謀曰吾無術以脫吾父訴不訴等死萬一吾父以訴獲免吾死何恨遂陳其情于上上乃赦季用而復其官緣煦訴而得復官者十四人皆拜季用謝曰微君有孝子吾儕爲城下塵矣已而煦以病死十四人者哀之如己子而季用感傷病益甚亦死編修王叔英作孝子傳以表之

張宏宗少失父事母孝養備至嘗再刲股和藥以進性輕財好施有老嫗坐負官錢幾死乃傾囊贖之又有少年遺十金而哭於市亦如數與之所司以孝廉聞於上徵之不赴

戴彥信父養原饒於財比鄰陳某坐籍歿而無貲詭言寄百金養原所遂并繫獄彥信痛父無辜訴于上願以身代父死詔釋養原而彥信竟死于獄朝野咨嗟稱爲孝子

應昌少孤事母至孝母死勺水不入口哀毀踰禮蔬食三年廬於墓側寢地久遂得痲疾時年已六十餘矣每遇親諱日輒涕泣不食如此者終其身焉

吳榮璧孝于父母百計圖維以供甘旨每父母食必與妻竊視之父母色喜方敢退而嘗食及居喪哀毀寢地徧身薰黑三年不入私室其兄強之以肉出而哇之其從子炳漢孝行純篤酷類榮璧既貢當謁選而不忍別親其親強之曰吾望汝祿養汝不行何由得祿不得已赴京選如臯訓導將迎養而其親死炳

漢聞訃捶胸痛哭嘔血數升不食七日而卒

張援父祿爲匠者所構提赴京師援從行父于舟中患痢援焚香告天願以身代日夕扶抱至手掬其臭穢既抵京例以朝廷興作民間占庇工匠者罰工彌重援入事其父出任其勞未嘗少懈事竣南還溺於吳江而死聞者悲之

楊治卿天性純孝父病閉結以指挑出之父死哀痛迫切臥棺下者三年母死亦然出入必告於親之靈以詩授生徒至蓼莪章未嘗不三復流涕也嘉靖間縣令姚公本崇給匾以旌其孝

論曰洪武初新樂劉氏別股奉姑詔旌其門已江伯兒割脇殺子上聞震怒遂著爲令嚴禁之蓋毀不滅性禮也然較路人其親者何如哉昔人有言禮者聖人所以化性而起僞其然豈其然歟然吾觀田野之家一饘一粥直呼其親而致之融融然樂也而鳴鐘鼎食志養缺如蓋其禮明者其意衰故有然矣

貞節列傳

宋吳氏女年十八有殊色呂師夔亂竄匿山谷賊遇之脅以爲偶拒不從纏其髮於柱而支解之

彭氏張華宗之子公德妻也華宗事具忠義傳公德蚤世無子彭氏矢志貞守四十餘年會詔錄忠臣後節婦事上聞封孺人表其閭曰忠節世家

元吳氏女至元間兵亂父攜之避于山菴寇執而欲私之曰從則生不從則死女拒不從於是先刃其父以刼之女大慟曰父緣我死尙從汝耶抗顏受刃以死國朝鄭氏二女父恕見忠義傳有旨夷其族千戶某以兵至豔其姿欲納之二女佯許乘間赴井死

沈氏孝子戴彥信妻也彥信代父死或謂沈曰可以嫁矣曰吾頭可斫志不可轉也奉姑教子終其身云

裘氏徐仲成妻也年二十餘寡有遺腹紡績撫孤始終無玷

王氏舉人暨仁壽妻也年二十仁壽死貧而無子矢志節終身不二

顧氏女名惜寶年十五嘉靖間倭掠懷仁女與父妾阿香被執賊艷之迫以刃女佯順之給賊行至坐口湖層崖百尺下囀深淵女語香曰吾得死所矣曰爾能死吾豈獨生遂俱投于湖而死

陳氏應宗儒妻也宗儒死二子曇昌尙襁褓有利其財者多方撓之值歲饑陳指倉困歎曰此禍本也悉散之家由是貧而矢操彌勵有司以聞詔表其閭陸氏張惟本妻惟本死時陸年二十斷髮誓守孀居六十餘年邑令親詣其門獎之侍郎盧公迥詩曰冰操泣鬼神丹衷昭日月事姑兼訓子凜凜真超越其見重如此

應氏林世珍妻年二十寡且無子攻苦茹荼矢志堅守詔旌其閭

吳氏年十九適生員尹德衰甫二年衰死遺孤方一歲父母欲奪其志曰是利吾奩耳悉以嫁時衣飾還之以死自誓舅姑繼亡室如懸罄苦節彌堅

潘氏年十七適吳炳用年二十二炳用死一男甫三歲未幾亦死舅姑欲嫁之曰吾知有節安知無兒臥夫棺側者廿年聞者嗟異侍姑疾手掬臭穢無強色倭寇薄城其兄弟邀與俱逃曰有舅姑在吾忍去乎於是兄弟昇其舅姑偕行潘徒步從之人皆曰甯獨潘氏賢也其兄弟並有國士風矣

金氏者炳用之族弟生員炳徵妻也炳徵死金年二十有三撫遺孤事舅姑盡孝無媿於潘炳用任時永亦早析妻金氏年十九寢不離棺行不踰闔遺腹數月艱辛撫育底於成立三氏萃於一族俱稱貞孝而潘無子尤爲苦節

兩王氏者一蔣伸妻一蔣弼妻與蔣熠妻張氏俱二十而寡冰蘖自守以完節終

尹氏廩生張桴妻也桴病尹氏籲天請以身代夕夢神人以烈女傳授之覺而夫死時尹年方二十一植節終其身督學萬公潮獎之曰金石之守之死靡他冰玉之操垂老無玷

博士應賓妻鄭氏生員王懋統妻朱氏吳元龍妻蔣氏俱二十四歲而寡矢志植孤並稱完節

王氏張澄妻也年二十三嘉靖倭入城翁老見執澄挺身全父遇害王氏痛夫死孝矢志冰節代養植孤紡績不輟年登七十知縣湯聘尹立匾揚之

王氏生員吳錫年妻年二十五錫年卒慟絕復甦召族人爲夫置嗣事畢從容自盡知縣顧震宇匾其門曰貞烈

論曰詩頌君子偕老本支百世婦人備此稱榮幸焉乃身膺榆翟之寵而泯沒不自見者比比是矣彼夫剔面薙髮殞巖瀕淵以成其志而茹酸一時流爍千古夫豈不幸與仙雖小邑而矢志抱節暉映後先蓋山川之所鍾亦其培植之者有素也倘埋光沉彩阨於上聞而旌揚之所不及乎則守土者有深懼焉

遺逸列傳

宋呂達時字原道少受經本邑陳令襄入太學與鄭獬友駙馬都尉錢景臻師之欲奏以官辭後隱于白巖山羅提刑適舉以孝廉亦不就

林放字達本元祐中將上禮部以親死廬墓側後築艸堂于東山隱焉大觀中詔求八行縣欲以放應放不憚去之二十里其高臥東山詩云三間老屋青山幽清風洒洒寒颼颼脫巾坦腹臥其下此身直與淵明儔老松飛翠落夏簟六月不暑涼如秋人生百年一夢幻世間萬事空悠悠一聲老鶴忽驚惺山爐活火茶烟浮

蔣晉仕不得志歸隱於柘澹葛山之下吳康肅稱其仕不殞身去不忘君忠智迥出尋常云

張會龍以武翼郎通判雷州宋亡遂幽棲巖穴不肯仕元有蔣仲班者以文行為鄉人所重亦深自沉冥屢徵不起

呂徽之號六松博學工詩宋亡不仕居萬山中以漁樵自給一日大雪攜楮幣

易粟于富家聞其分韻賦詩有得藤藤二字者苦吟不就覺失笑主人恠而延之援筆立成曰天上九龍施法水人間二鼠嚼枯藤鷺鵝聲亂功收蔡峽蝶飛來妙過滕衆皆驚服復以曇字請則云竹委長身寒郭索松埋短髮老瞿曇問其姓名不答與之粟曰吾豈受不義之財者必易之卽刺船而去從而尾之路甚迂僻雪晴往訪見艸屋低小松蘿翳然忽米桶中有人聲則徽之妻也詢其所之曰溪上捕魚耳詣之果然隔溪謂諸公曷先至舍待我乎少選携魚換酒而歸盡懽別去他日再往則業已遷居莫知其處

翁森字秀卿隱居教授取朱子白鹿洞學規以爲訓從遊者前後至八百餘人有一瓢稿行于世初陳剛中與森善及奉使西川乃悉屏騶從葛衣而造之森迎而笑曰斯吾昔日剛中乎促坐劇談而別時論兩高之

元吳淳字世英清介自持不樂仕進與周志吳得和原善輩設義塾延張廷玉爲之師以教其鄉之子弟自是儒風益振初里中惟陸種淳率衆開白馬堰引水

灌田至今受其惠云

論曰君子治則龍見亂則鴻冥宋元之際悲哉其爲世也士雖不沉淪自甘奚可得哉其才無所施而復隳守解節士何取焉易曰天地閉賢人隱此之謂也

厚德列傳

宋吳福天性純厚括有鉅賈留千金于其家久之不至福爲賈遷得贏及賈之子至悉以歸之賈曰向者吾父留千金贏則君自致吾敢覲乎互相遜決之縣縣上之郡使中分其息福仍不受乃以其半歸之僧廬時福尙無子賈之子感其義購得顏氏女納之遂生子奉奉樹德赴義綽有父風其孫允昭尤善施賑歲饑鄉人戲榜其門曰旦日大施遠近聞之扶攜就食允昭欣然曰此助吾爲善者也傾廩以賑全活甚多後子孫日昌冠裳相禪鬱爲名族

吳渭生一歲而孤母葉氏矢志守貞以勤儉致富然樂于賑施貧乏涓體母心

建層樓可望十里雪中有不舉火者潛令人以粟遺之自括蒼至海涯悉造磚甃路以便往來客贈之詩云雪暗無人遺積粟月明有客步康衢值歲大饑散私錢二百萬發粟二千石所濟甚衆諸父康肅公詩曰吾家渭侄非常兒讀書事母成家肥此心但欲濟鄰里身外浮名非所希欲以致仕恩廩與之力辭郡欲上其事又辭朱文公爲常平使者以名聞補其次子椿文學

張慧字彥智盛夏時有客憩于其門遺數十金而去其子拾其金以告彥智曰得非過客所遺乎汝藏之以俟其返已而客至遂還之

張樞字廷英天性孝友有妹未嫁而卒樞以二百金遺妹之夫或止之曰吾父與諸叔分田輒以膏腴讓之吾繼父志耳弟櫓遇虎危甚樞奔而救之惟持一傘挺身奮擊幾爲所噬已而鄉人稍集虎逸而去

吳子龍少參廉之子也有友人欲爲子締婚于子龍蘊而不言已而友人死遂以女妻其子曰向者吾以心許之矣子龍以序當貢其次老而貧遂慨然讓之

後爲滁州訓導將之任寄三百金于族人比其反也族人匿其金子龍付之一笑其德量如此

論曰陸務觀云爲善自是士人常事今乃邀身後福報若市道吾實恥之今吳福等好施市義出于素性豈念及福與名哉夫天道無親常予善人厚人者所以自厚也書此以示勸焉

仙宗列傳

漢徐來勤字元和按本際經云昔在赤明劫一百八身爲道士濟生度死後白晝乘火上昇至東漢時爲太極法師隱括蒼洞詳見寶藏名山記

王遠字方平東海人舉孝廉歷官中散大夫明天文圖讖逆知盛衰吉凶桓帝召見不言但題數百字於宮扇其後皆驗留太尉陳耽家三十年忽自言當死既死而殮復失其所後至括蒼洞與蔡經會焉

吳左慈字元放葛玄之師也赤烏二年與玄游括蒼洞鍊九華丹服之得道

萬歷仙居縣志

卷十一

八

仙居叢書

葛玄字孝先洪之從祖遊括蒼洞遇左慈授以祕訣符籙戲幻之術赤烏七年尸解而去爲太極左仙公宋封冲應真人

晉平仲節河中人入括蒼山受業宋君存心鏡之道積四十五年後乘雲駕龍上昇

羊愔邑令忻之弟也以峽江尉罷歸隱括蒼山一日與道士飲忽仆而寢云有人自稱靈英邀入洞中須臾石間迸出一物曰此青靈芝也愔食之甚美自是覺身輕骨鳴時往省兄朝去暮還後入羽山莫知所終

宋王溫素好善能造夾紵像一日有二癩者踵門溫憐之謂有藥可愈乎癩者云得新酒浸其中卽愈耳溫家釀適熟遂聽之越宿癩者出則皆美少年也謝而去酒有異香溫與妻孥飲之其糟以食雞犬遂拔宅上昇時宋景德四年也縣之改名以此社壇卽其遺址

論曰秦皇漢武雄心猛鷲牢籠一世而思蛻跡羽化難矣哉俗儒輩緣此詆

爲幻妄則又何也夫以玉階金穴爲眞其必以瓊池瑤島爲質矣有能割榮剪嗜冥心外形其仙乎其仙乎

釋氏列傳

晉曇蘭青州人支姓日誦三十萬言嘗憩赤城有神長數丈屈膝自言願推宰相奉世傳爲韋羌山神也

唐灌頂章安人吳姓字法

章安禪師聆智顛說法了無遺忘嘗入都講演晉

王遣使送之還山爲造國清寺今爲天台第五祖師武德中卓錫于安洲山

宋清徹戒行高潔天禧中嘗截一掌爲衆祈雨立應菴前猛虎馴伏及示寂鄉人塑像祀之

妙機陳姓母初娠夢神僧告之曰當生賢子及生有奇相落髮事雙林昌師後歸林下通判章憑因行縣謁之問如何是妙曰點鐵成金如何是機曰百發百中章尊事之又有行機者號蘭堂操行尤潔後居國清寺趺坐而化世稱大機

小機云

國朝道固臨海人住護聖寺不出關二十五年壽八十以生死同日作偈趺坐而化

文瀚臨海人研究經旨永樂間應詔預校永樂大典後還陽峯與僧德貴講圓覺經至四大各離處恬然而逝

論曰自昌黎氏闢佛老世遂操戈法范以自飾其淺謬夫下者以聲色求道及墮頑空者固無取焉若夫安禪守律不壞佛門相而成出世法其悟入與吾儒所得孰深乎 英嘗謂吾學佛然後知儒旨哉斯言此未可與淺淺者道也

僑寓列傳

宋薛昂字啓明錢塘人歷官門下侍郎資政殿大學士建炎中避金人之難寓於萬竹山

韓昭字用晦真定人丞相縝之曾孫官至直顯謨閣自號大同居士紹興初避地於安洲山焉

論曰詩有之瑣兮尾兮流離之子傷旅食也夫士生斯世至於輕去其鄉豈情也哉豈其中有深隱大痛不得不韜晦其迹以寄其有爲有待之軀而竟於功成名遂聲施後世者此未可於常人中求之也攷流寓於仙居得薛昂韓昭二人焉



萬歷仙居縣志卷之十二

詩文

夫驚塵逝電之迹莫能留也記之篇章者後世猶將考信焉邑故無乘吾悲其蕪散者多矣今拾故老傳聞并搜剔斷碑殘碣之際得詩文若干首附載於是庶幾存什一於千百俾夫巡行者備歌風之義游涉者興弔古之思云爾

題仙居

劉光

仙居山水自巉絕往往聲高壓東越三溪水從天上來十洞復與人間別紫籙修峯半雲雨韋羗怪石藏日月地靈鐘鼓鎮奇英人瑞何年起豪傑我來正值西風高晴空萬里分秋毫山明水綠快心目登臨不覺筋骸勞

萬竹山

薛昂

萬竹山中數百家重重流水遶桑麻飽餐鼓腹成何事桃李春風任自華

韋羗山六首

陳襄

萬歷仙居縣志

卷十二

仙居叢書

去年曾覽韋羗圖云有仙人古篆書千尺石巖無路到不知科斗事何如盤盤英氣自紆餘宛有神仙此地居天子正求伊與呂如何不見起樵漁山鞠精靈久貯儲中間豪傑出無虛鄉民世世家居此爭奈兒孫不讀書峭壁回環幾百區其間巖石可耕鋤何時得片山如此白首相將老母居古意崢嶸與世疏一官羈絆可歸與此山未及西山好下有仙人結草廬四友之賢世莫如白頭終作一鄉居此山不惜將錢買歎息無因結草廬

綠筠亭

郭三益

道人棲碧山雲居在空曲千年海潮音利物緣已熟更尋妙高頂超然具幽築古木插空青寒雲抱巖綠時携貝葉書步入深林讀雲衣冷蕭條靜對含烟玉客來境非喧客去境自足宵眠護禪虎書引啣花鹿菴中三昧語藥我嗔貪毒何時脫雙鳥藜杖追高躅

紫籙山

王畿

竹山絕頂古招提景異相將竺國齊靈鷲雄吞台嶽小瑞峯高壓斗牛低雲深怪石宜僧隱山靜林幽樂鳥啼記得當年封紫籙只因丹鳳此中棲

紫籙山

錢 竽

雲鎖藤蘿石路深旃檀林裏有叢林萬山重疊雨添翠一水灣環風漾金午飯欲陪龍象住夜眠要聽鳳凰吟更求竹罽安禪處老却平生名利心

福應山盡美亭

張景修

南亭不減北邙高美景因公見一朝已看溪山如在畫更傳風雅似聞韶栽桃定有仙家住種竹甯無隱者招秀氣當爲多士福木應都放與漁樵

福應山盡美亭二首

楊 密

清風送月上欄杆雲雨溪流破玉寒我有三峯高興在漫堂暉作畫屏看醉後愁生任數奇僧牕借夢入新詩覺來著意尋桃李除去春風總不知

南峯山

趙善政

萬歷仙居縣志

卷十一

一

仙居叢書

山上青天山下溪白雲流水兩相宜丹成共爾南山老采采松枝亦療饑

南峯桃花洞

楊 密

水縛山腰點萬松雲扶翠岫插寒空此溪定入桃源去時見波間有落紅

桃花洞

王 湛

憑高試一望秋色滿平蕪山缺藉雲補崖傾倩石扶渴虹遙飲澗怪鳥自呼雛坐覺斜陽盡峻嶒塔影孤

桃花洞

余世忠

放懷桃洞更何時一片溪流勝習池好鳥乍啼花影亂遊魚高跳釣船移無邊藍豔饒詩景不次風光促酒卮棋局尙留仙子跡老僧揮杖鶴歸遲

桃花洞

張 埴

小洞能藏萬斛春桃花數點照衣新江山隨處行吾樂魚鳥忘機見我真天書橫空雲似洗龍潭滌硯筆如神興狂更上崇巖望遙見羣鷗樂海濱

桃花洞

王寵麟

偶矚招提境春光點翠微漫誇仙跡古誰解世情非風押溪山韻雲增石洞衣凌
空千仞塔斜影弄晴暉

蒼嶺

劉昭禹

盡日行方半諸山直下看白雲隨步起危徑極天盤瀑頂橋形小溪邊店影寒往
來空歎息玄髮改非難

蒼嶺

杜師旦

人云蜀道苦難行我到雲間兩脚輕山險不如心險否心平履險險須平

蒼嶺

陳公輔

行到危山僕已痛此身強健不須扶回頭指望重崗處得似人心險也無

東嶺旋憩亭

張景修

東嶺新亭喜落成山凹突兀煥文星遮藏月色天分秀聯接岡巒地借靈欲訪隱
萬歷仙居縣志

卷十一

二

仙居叢書

仙凌彩霧待看出日轉洪溟他年瑞應誇東浙好屬如椽巨筆銘

東嶺旋憩亭

張朴

出郭不一里相違已十年未知何日是還向此亭旋鳥語雲根落桃花嶺上妍深
慚頻作客鄉國莫留連

景鳳巖

吳時來

十載已成巖穴士尋遊到此若爲驚雲中似啓朝陽戶嶺上猶傳景鳳名魏闕難
忘牟子意華陽偏稱隱君情坐來回向心俱寂碧水泠泠一鏡明

水簾

吳時來

飛泉一道散天漿秋日來尋興獨長古樹逗雲迷怪壑迴風拖雨落空牀祇疑騎
鹿來匡阜還是尋花到石梁二十年前遊息處良朋此日笑携觴

水簾

吳炳思

絕壁開幽洞飛泉掛石欄日出半空雨風迴六月寒玲瓏簾不捲噴薄練長攤啣

芝心自洗欲去且盤桓

景星巖

徐慶亨

孤亭閒獨眺細數亂峯奇飛鳥不到處歸雲半落時溪光寒潑玉泉韻巧爭詩此
景無人寫慚予着步遲

景星巖

葛元

來觀巖頂飛星石愁話旄頭慧紫薇思向林泉通世網飽隨僧臘脫天機開罇一
覽湖山小撫事俄驚歲月遲杖屨相從揖阮桃溪雲碧迓清輝

景星巖

行機

有客酬佳節攜壺扣竹關鳥拖秋色去人帶夕陽還景物催詩急乾坤借我閒了
無塵世事終日坐看山

景星巖

李一潮

汨汨塵世岐迢迢景星路飛雲絕壁開啼鳥空臺古朝觀海日來夕撫斜暉駐林
萬歷仙居縣志

卷十一

四

仙居叢書

藏萬樹秋天壓千山暮剛餘兩目清暫解萬緣苦故園咫尺間長安渺何許坦然
念人實攜書出山去

景星鹿巖

吳炳赤

昔年羸氏失其鹿天下英雄競追逐兩兩奔渡江南來脫生隱化星巖谷藏頭斂
角不露身惟見大小頸雙伏毛骨稜層臥雲霞奇觀變態千萬斛我嘗讀書梅龍
軒偏愛鹿頸登其巔抹月披風無盡興吟詩酌酒渾忘年鹿兮鹿兮何久沉爾不
化羊焉假鞭喚爾醒兮爾醒否千年舜侶今重緣爾非我兮誰玩跳我愛爾兮供
笑傲爾無心兮我有心有心不若無心好爾無知兮我有知有知不若無知妙我
將與爾共忘機日斜西山鹿巖照

觀音巖

余世忠

暑縱觀山步風雲芝畹芳奇峯新楚思高節舊秋霜瑞氣無虛歲心苗向大方竹
林初着眼翠滴紫雲鄉

麻姑巖

葉發

怪石倚空碧傳有神仙迹元放古來遊孝先應曾歷山前無斷碑往事杳難覓麻姑去不來青鳥無消息

括蒼洞

劉光

古洞藏真不記年翠巖蒼壁故依然怪來一夜清無夢人在仙家第十天

括蒼洞

張望

他佔仙居勝名參洞府高夜壇留鶴馭春水泛溪桃路轉迷南北巖空冷骨毛我來驚悞入回首歎塵勞

括蒼洞

林侍晨

落日泉聲寒遠宮倚簷山色翠摩空劉晨去後門長啓時見桃花滿地紅

括蒼洞

吳芾

欲遊此地已多年今日同來亦偶然洞裏真人雖羽化蒼蒼舊嶺自參天

萬歷仙居縣志

卷十一

五

仙居叢書

括蒼洞

吳詠

玉靈隱隱誇層空路曲溪山一徑通夜半彌明詩太捷古來常岳道難窮桃源花漲門前水石壁雲留洞口風妙處苦爲容筆舌尙能收拾付胸中

湯公洞

張同甫

萬點波光映古邱林深雲鎖洞門秋是誰訂我重來約携手相將到白頭

柘溪漁火

蔣晉

玉川一帶光涵秋漁艇縱橫網罟稠西風日落寒烟暝煌煌燈火明中流數點如螢走絡繹影趁浮雲瀉金液一聲歎乃明滅間鄰雞又報東方白

西巖勝水

蔣晉

柘川之西有削石屹立巍巍峻如壁下有滄浪百尺深澄清恰似秋天碧逝者如斯竟不停孺子長歌堪濯纓故知源頭有活水支流分派迢迢清

鯉嶼浮嵐

蔣晉

天地造化真何如幻就青嵐如鯉魚初疑孝子感天意復恐古人傳素書嵐氣時
浮北烟瘴縹緲奔騰似吹浪遠跳深驚欲化龍故有飄飄五雲障

翠屏列畫

蔣晉

青峯如屏高插天懸崖積翠生雲烟誰把王維舊墨跡巍巍高掛安居前勝景應
知世稀有妙學丹青乃縮手嗟哉畫有蠹損時斯圖壽比南山久

葛井仙踪

蔣晉

誰鑿雲根清氣洩混混源泉流不竭味極太古比龍涎飲之令人骨清徹父老爲
云有葛仙丹成此地經多年寂寞烟霞洞雲靜惟留斯跡令人傳

孟溪

張成德

神哉二女欲何從羽化仙洲第一峯香魄不因天地老至今流水帶清風

三井潭報雨

陳襄

曾禱神龍井雲森杳莽間蘋蘩朝薦廟風雨夜離山百里田疇熟三年囹圄閑因
萬歷仙居縣志

卷十一

六

仙居叢書

循失報謝石險路難攀何年修廟貌棟宇已摧殘牲帛三時少風嵐四月寒野僧
多稔禊古木有杉鬱深欲重修葺蹉跎已解官

三井潭報雨

唐仲溫

夜宿精蘭百慮清晨移祠下勺涵亭須臾水府收溫刺始信神龍果有靈

馬篠潭報雨二十韻

陳襄

皇祐歲庚寅陰陽久鬱堙三時愆雨澤百姓盡膏屯米價方翔踊民言備苦辛原
疇無播種道路有饑貧縣令進忘食齋房退省身朝居占甲子暮出看星辰埜祀
曾邀福雩壇示禮神祈求觀古法詢訪得龍津遣吏蘋蘩潔齋書肺腑陳靈泉汲
坎甃仙杖下嶙峋雷斧潛噴樹天波忽洒塵陰官沈吹鼓市戶濕衣巾降應聲何
遠盤旋志未伸經綸維四日滂沛卽踰旬萬古仙源發三農水利均趨田多易耨
入里少芻薪苗稼晨爭插坊墉夜不巡謳歌與父老燕喜入親賓捐瘠蘇中壑生
成賦大鈞邑人忽忘報世世荷新恩

廣度寺

鏡渠按原本作廣慶寺今改下同

郭三益

羲和均四時曜靈有急節沈迷簿領書坐歎春事歇及茲新雨收西郊輒初發蒼
頑山氣嘉奔悍溪流活風驚麥翻浪水靜秧抽髮漸窮蕭寺幽頓使煩襟豁風喧
釀蜜翅鳥落啼林血高僧日無事種朮畦畝闢綠苗已紆紆紫花行復結吾欲訪
長生終歲期採禩

廣度寺

張埴

踏到青圭始見高心神從此脫塵囂回頭已覺羊腸遠着脚放開山路遙落日斷
霞千尺錦穿雲高鳥一梭拋山僧也識儒家味故把紗籠待我曹

廣度寺

湯聘尹

青圭山後籙山前縹緲雲端一洞天龍觸鐘鳴因聽法鳳啣花舞爲參禪香巖丹
桂從天植木井靈泉共海連何用桃源訪劉阮登臨此日卽爲仙

廣度寺二首

張儉

萬歷仙居縣志

卷十一

七

仙居叢書

名山自昔經遊地此際重遊惜別難敲句幾宵清不寐談禪一榻坐來安明時促
我登途急匹馬穿雲冒曉寒此去直完塵世事更從應約的無歡

久慕馳名紫籙山籙山萬仞路行難曇華貝葉春長在禪榻蒲團夢亦安木井泉
香雙眼豁鳳凰亭插兩峯寒我來得聽梵音處漫促行鞭且盡歡

殊聖寺二首

陳公輔

竹嶺雲岡翠接連梵宮色構紫巖前夜長鐘鼓敲明月日暮樓臺鎖淡烟大抵登
臨須有分不因遷謫到無緣一程已見佳山水何憚東川路八千

我愛青山着意尋每聞佳處便登臨寒牕夜久陪僧話一陣西風月滿林

殊聖寺

胡經仲

不是等閑到須知會合稀水行清骨髮雲臥冷裳衣桐掛秋陰薄松寒露氣肥共
吟有佳致何苦祇言歸

殊聖寺

吳詠

院靜僧疑少門開客自稀山寒雲近屋徑狹石鈎衣松蒼蒼鬢古薑牙紫笋肥騷人詩戰罷踏月夜深歸

福延院

許操

一山屈曲如同肘前有虎眠當水口陰森萬木綠參天秀色崢嶸欲飛走神仙渺邈不可問簫鼓尙能喧耳否朝風暮雨無歲年應是蒼苔暗科斗

萬安寺

孟大武

十年不到此山來依舊青山好在哉眼逐春風驅酒病却驚身世得愁媒禪床倚枕眠初熟山鬼嫌人夢却回明日拂衣還出去桃花地上欲成堆

崇相院

孟大武

一春無暇到雲峯今日乘閒叩梵宮簷鐸聲呼山鳥和石橋影照落花紅客衣欲濕蒙茸雨佛篆時飄旖旎風爛醉扶歸天向暝接籬倒着似山翁

興道院南塔

陳襄

萬歷仙居縣志

卷十一

八

仙居叢書

今日登南塔愁懷不自勝年華催鬢髮身計憶巖稜道學愁諸子根源畏老僧何當論去就細得問龜明

殊聖院

孟大武

路入溪聲遠秋聲樹影稀曉雲藏鳥語松露滴人衣詩戰蜂腰怯茶分粥面肥勝遊殊未厭肯爲夜寒歸

大興院

陳襄

松柏原環路屈盤像堂僧室枕屏巒泉清翠茗臨烹易地僻紅塵欲到難樵斧伐雲春谷暗魚榔敲月夜溪寒我來未盡登臨興欲去徘徊更倚闌

凝真宮

章憑

昔人騰碧落余地掃巖隈石壁雲長在松梢風自來暗扉通浩蕩古蔓接崔嵬更欲窮幽隱仙源路已回

凝真宮

張無夢

五雲深鎖洞門深躡履攀蘿特地尋
烟霧不藏塵外路神仙遺下水中金
喜遊汗漫華胥宅重憶崆峒至道心
不得方平同一醉紅霞零落我罇琴

隱真宮

曹唐

好風吹樹杏花香花下尊人道姓王
大纂龍蛇隨筆札小天星斗滿衣裳
閑拋南極歸期晚笑說東溟飲興長
要得麻姑同一醉使人除酒向餘杭

隱真宮

蔡向

福地流傳號隱真麻姑曾款蔡翁門
白春雲子自堪飽井溢丹泉飲可吞
山露五峯疑指爪溪盤百疊想裙痕
我來既躡靈踪後知是仙家第幾孫

巖老堂

陳襄

手持養性書此地學樵漁身類龍蛇
蟄情深木石居先迷成遠復靜正得
中虛何必求深隱幽蒙是所廬

陳鄭雙節詩

黃議

萬歷仙居縣志

卷十一

九

仙居叢書

芬芳桃李年愴怳冰霜苦丹心誓靡
他願言九泉赴孱孱兩嬰孤誰人可
振樹堅忍殉未忘柏舟日慶賦食貧
性所甘辟纊營布素穆哉清門風過
者式以慕訓迪範丸熊期培玉堂祚
婦操兼母儀發源祥難訴淑行格幽
徵鬼神事呵護粉梓籍旉幪寇來免
惶怖維世有徽音澆漓起僮仆者歲
倦含飴祥光迓仙輅游衍在西池豈
云溘朝露烟爛彤管編懿德千年鑄
表閭當匪遠龍光俯來注

我愛仙居好十一首

陳襄

我愛仙居好隆儒尠大方諸生令講
藝童子俾升堂買地興民學驅車下
黨庠三年邑未化官滿意徬徨

我愛仙居好民純不用拘閹閹興禮
遜囹圄長榛蕪網罟奸逾少風恬惡
自無一年人已信感激謝張弧

我愛仙居好三年理尙寬民雖羅網
罟政未息風瀾憫物刑多省勞心席
少安祇慚無惠術求配古人難

我愛仙居好臨民必以誠簿書無日暇獄訟積年生

豪以積習憑折細民土田予治而歸之分戶二千凡有產而無業積年空

納其租訴而還主者不可勝數

百病求箴補千鈞待準平嗟予不知古斯道未能宏

我愛仙居好安民去百奸誠心雖照物政體味循環喜有綱條立慚無教令頒二
年憂且病王事豈能閑

我愛仙居好慚無德政馨下車時問疾治獄日空囹老吏貧歸里

有老吏金彬者貧無以自給每歸耕

田里數月而後出聽之

蒼生餒在庭惟憂澤未至豈敢瀆邦刑

我愛仙居好園池日退居馴禽來鶴鶴野水進徐徐

園鑿新沼引水經竹林間以環約翁臺習坎嘉魚二亭

草木

通樵採

園有短垣薪樵桐梓之屬時為邑民所採

桑麻有老鋤猶言民未樂更欲寢刑書

我愛仙居好家無十數人民窮惟有疾俸薄不知貧弟叔閑成癖妻孥老未淳自
餘無所恨寸祿及偏親

我愛仙居好公餘日在房憂民極反覆責己未周詳法律行垂手詩書空滿箱老
來須向學多病喜平康

萬歷仙居縣志

卷十一

十

仙居叢書

我愛仙居好經營盡國工庶民心喜悅小邑勢尊隆萬瓦如雲合千題不日躋自
非仁惠術愧子一觀風

我愛仙居好官卑分已盈才非漢循吏道似魯狂生擊柝心雖樂觀風志未平寧
如孟夫子不食去齊卿

和前韻十一首

鄭穆

我愛仙居宰隆儒起四方

述古儒者始至本州而縉雲建安諸郡舉子相次而至慕義講學

青矜遊戶闥逢掖在軒堂在

昔風蠻貊于今邑校庠賀衛聞勸學者耄涕徬徨

我愛仙居宰渾渾政不拘縱民如野鹿任道若荒蕪訪境土皆闢訂風惡亦無平
生志嚴整伺隙莫操弧

我愛仙居宰巖巖器宇寬百筵微出響萬楫一生瀾邑小天為壽民愚地與安經
年不相見已見欲躋難

我愛仙居宰接人推至誠一官牙岸絕百志惠慈生啓予才力薄干戈且瘵恫素

志苦難展晨夕悵此衷猶幸士知學械樸多英雄民生樂甯靜無間叟與童風俗
漸更改匪曰今古同茲轉地曹去雜客殊匆匆臨風拜祠下紀我景行踪

五禁

顧震宇

蓋詩人之義美刺並陳美以勸刺以懲意同歸於厚也仙俗夙稱淳美古靈纏
灑諷詠若遊華胥今國家休養累世俗稍漓於昔矣余目擊其弊凜凜爲之堤
坊夫亦嘉禾去莠材木去蠹意歟倘曰治不易民胡不趾前人之咏而癢是索
則何以謝我父老之口

一禁溺女

貴男賤女謂曰人情屬毛離裏一體同視本縣僻處民上聞民間溺女輒管爲心致頗爾母子自
動發機呱呱之聲氣息猶屬管爾就斃問之水濱矣此無論忍心恣虐所當禁革即十年生聚民
庶蕃育實如基之若虛婚嫁傾貲猶屬迂鄙刑釵裙布較活命之恩所存孰多今後民間產育許
左右地鄉親往遠聞如再行洩溺者指名呈首并收生婆一體重治不貸歌曰

萬物各有族牝牡不相離生男不生女娶婦誰結褵嗟哉此薄俗造孽類窮奇呱
呱纔脫腹漂泊泊川之涓那見獸不仁那見鳥無知牛深舐犢愛鴉護落巢兒爾民

萬歷仙居縣志

卷十一

十一

仙居叢書

識太短豈在嫁無資荆釵與裙布終作我門楣况有緹縈女生男反不如予慚爲
賈父驅車悔已遲

一禁賣妻

人倫之首莫先夫婦况爾小民晨耕暮織辛苦相倚尤當白首共之訪得本縣之民甯嫌曠不顧
室家射利販賣視同菑蓋甚者抱病床褥未暇兩目已視二天又其甚者鴛鴦無孤而以中年之
婦自給之產私行招贅如長平之入主家衆不稱怪俗之醜陋何異戎狄本縣已痛懲一二外今
後如有無故賣妻者許內外宗親公行呈首以憑開遣已賣復告者重責枷號不貸歌曰

上有比翼鳥下有比目魚夫婦共衾綯百年永不攜爾民只見金魚鳥反不如糟
糠同苦樂耕織借勤劬一朝生離別委棄如泥塗結髮誓一天今乃人盡夫廉恥
道交喪不肖懷奸圖紛紛爭交訐猶復利錙銖風俗已如此何異蠻與夷我申七
出條非此孰敢渝

一禁鋼婢

男女室家人之通情愆期有待祇開淫竇訪得本邑士民之家私蓄女婢垂曰無夫如其循法守
正恐滅欲非情倘必借還私通則誨淫非禮奪人父母之願鋼人男女之欲而浸假於風化者也
除已往不究外今後民間女婢二十以上悉令配夫仍聽主役如過時不嫁許父母指名呈縣覈
發還家無父母者兄弟伯叔鄰人代首違者坐罪歌曰

歎息宮中女紅顏成白頭陰靈生戾氣天子出幽囚如何民間賸老大無匹儔傳呼通內外有餌必貪鈞豈伊獨廉貞而不思好速床頭苦徬徨寤寐成咿呦隻影生無侶孤魂死孰收主人亦太忍乃作怨女仇試看花間蝶且聽林外鳩眼前多感觸亟與嫁還休

一禁包攬

有身有庸有戶有調食土之毛力役非疲本縣一應征絲爾民業已承認即當正身聽候以憑點撥必親必躬庶杜弊孔一行包攬彼無籍之徒種種耗費利則漁之害則聽焉在本縣只問主者彼輒漏網去矣此時身家不保嗚呼無及即小民畏官納縮首鼠規避豈本縣一種慈和尚未爾乎耶况果奉公勤幹定當優待再用包攬次身依律問罪本人嚴提究責不貸歌曰

民間苦征絲日暮無休息父母念子勞亦願遺之佚有身必有庸規避避不得一
一自親嘗還勝倩人力人情懷首鼠恆畏官府責女不悼賢勞愛護如卵翼包攬
奸之四弊孔恆百出一朝問主者網密獸安逸輕者苦鞭笞重者城旦役胡爲自
懷安不爲身家惜

一禁班銀

萬歷仙居縣志

卷十二

十二

仙居叢書

金有三等白金爲中官民交易泉流無滯間有折耗九成爲止本縣民素刁詐假銀哄市尤屬奸
用用銀五分或二三分傾入銅鉛奏用一錢真假相冒莫可辨詰即點者難欺而愚民受給何異
蒙其目而劫之財乎杜偽造奸莫要於此示仰繁縣軍民人等今後一切交易務要足色銀兩如
仍用班銀不時連人糾舉并追銀匠姓名一體架號問遣歌曰

金用垂二等白者如流泉鎔鑄無奸弊紋絲細入旋獨爾僞之首攙和銅與鉛魚
目豈類珠唐突遍爾慶真假從此溷行將廢五權愚民一受給力作俱枉然物情
不可齊物價亦變遷相蒙以成俗豈非亂之淵許子比精粗孟氏深惡焉今懲作
俑者何人敢擅煎

重修縣治記

馬 濂

仙居之建其來久矣宋古靈先生蒞後法令寧一風俗淳茂台州六屬惟此最稱
易治古靈之政遠則禮讓之教息寧一者或遷而擾矣淳茂者或遷而澆矣昔之
稱易治者又安在哉嘉靖辛亥予奉命來茲蚤夜怵惕惟弗克供職是懼竊謂斯
民也三代所以直道而行豈古今人終不相及居古靈之位治古靈之民獨無古
靈之化之思顧今之民即古靈致治之民而今之時與勢則非古靈之世之比如

國計之分派庶尹之供億簿書之往來期會之督促禮義之交際獄訟之構結繁簡寬刻較古靈之世或相倍蓰什伯是故可以師其意不可以泥其迹也可以明其政不可以拂其宜也淺見庸識誠有志焉而未逮但夫氣精神招徠感召亦若有不可誣者寧一淳茂之化雖未必盡如古靈之世而其遷而爲擾遷而爲澆者抑或釐別萬一可以改觀易聽維時上下相安政事頗簡度民量已有恢宏物采黼黻皇猷之念乃審方面勢鳩匠選材因廳事之舊稍更新之仍於縣治左右建二坊門左曰承流右曰宣化治之後有堂名曰景陳堂之後有軒名曰環翠工完告成又次第緝射圃於縣治之西緝啓聖公廟於文廟之後科目建匾名宦建祠庶幾典章漸舉人文漸著羣邑之子弟於俎豆春風之教而不知淺且庸者之未可勝此然有司之能事不止於是夫苟由是充之等而上焉追古靈寧一淳茂之化而後先照耀俾古靈不得專美於前可謂繼此而興者終無其人也與哉

寅賓館記

應存卓

今天下治署每往來孔道及冠蓋繁盛之地而交接旁午者則設寅賓館而簡僻之地多缺焉緣是仙居舊無寅賓館前令尹雲鶴金公議創館於儀門外度地聚材工役方興金公以內銀行其事遂寢今令尹思塘王公蒞仙居歲餘政通事暇乃復命工竣是館之役及落成王公授簡於予使爲之記予執簡而歎曰王公之愛民也深哉客有難者曰館以禮士也而子以爲愛民奚居余曰子未知所以禮士意耳知其意則愛民之政孰有先於禮士者哉昔子奇年十八令東阿而得白首者與俱少決老知相濟而東阿理曹平陽以武將相齊遇蓋公而用其黃老家言發揚之氣濟以清靜而齊國治平蓋一人知識有限而爲治者必集衆思而政始粹此愛民之所以必先于禮士也苟爲民而禮士則賓館之宜設豈以地之繁簡而有殊哉夫惟以地之繁簡而殊則所以交接者爲彌文也非爲民也大易於豫之九四論大有得必由于朋合譬若子然無朋而能使人之獲其豫也其可得耶夫居官者視事堂上文牒方披吏民擁立賓客適至不暇卽迎而闌人或從而

阻撓之未免趨起前却於門外此爲俯仰逶迤爲饗餐計者之所能安而有道者愧矣夫有道之士有以自重而於人無求守土者折節禮之猶恐不就而能趨起前却於人之門耶譬之釣者不以禮而強合者投綸卽吸之鱗也非禮莫致者若存若亡若食若不食之魴也然內博厚味則魴獨稱珍而鱗不與焉知釣之貴於得魴又知魴之不可易得則知寅賓館之建不容已矣是館旣設則賓客及門旣得人憩於中主人漸東文牒屏吏民而後出以延接則賓主俱安而閭閻疾苦施爲緩急皆得優游咨訪而所裨治道不少也夫人才亦難矣士之賢而可資以爲政者如艸之三秀龜之五總可僅見耳豈可以常得哉則所接者誠不能以皆賢也然惟處之有地接之有禮則間有賢者始不深避上焉訐謔石畫足以定國是而濟時艱次則一得之明雖非粹白之狐亦可集之以爲粹白之裘縱有逶迤俯仰爲饗餐計者且有所感亦漸沮而不能肆矣不然則雖軫轍相接跛踦逢迎吾恐鱗雖就綸而魴且揚鬣於東海之濱也將何所資以善其治耶蓋治道大要曰

恭曰儉恭得士儉得民然得士而後可以洞悉民情得民而後可以感召高士故論治者於恭儉二端每並言而不以相離也王公軫念民艱絲毫必節儉也然於是館不靳少費恭也恭則益成其儉余故以是而謂王公愛民之深也客曰唯唯禮士所以愛民匪迂哉

重修東衙記

顧震宇

曩余司教瀛滄苦其地斥鹵恆從數里外舁沃土壤之雜植花木以自娛每憑檻寓目忘其身之去舊都矣已而有樂安之命私懼令與博士勞佚勢殊不復有披襟解帶之適旣至而喜其地之僻事之簡也爲之期年而讓民稅法稍舍故而於新余庶幾思有以息游者而得所爲東衙焉蓋昔吾郡覺軒湯公以黃門出知是邑政成而葺之以寄傲者也公去而室宇圯廢鞠爲穢虛久之疑有神物憑依是者遂繚而絕之於官署之外余從事於此衆猥以神告予弗爲恐排惡垣刺與艸而公之亭出矣於是經工庀材榱桷之殘者革之圯墁之脫者綴之聖護之溲者

妍之瑩石爲砌如環種竹爲屏如帶綠竹徑亘廻廡以避風雨南向敷高臺延爽氣四望青山烟蜚雲駛在襟袖間翠柏干霄匝路翔舞漾月錦而奏風琴搆吳中佳花如錦邊蓮三醉芙蓉列時時之夸香競艷四時之卉佐之而增其美矣夫今之芳華歷亂迎目獻笑者蓋昔奔乘而荆據者也今之飛鳴翔集移耳動情者蓋昔鬼嘯而狐號者也今之挹遠岫送歸雲欲辯忘言者蓋昔塵迷壘翳人望望而去之者也嘗觀古之君子宦轍所至往往開搆勝游若將終身焉今世仕者多隴蜀之思唯朝至而夕不得遷也安肯爲此迂拙之計乎哉然使予得煩劇之邑方束縛軼掌之不暇求如今日之優悠閒曠有不可得者以此知人與地相遭信非偶然而已也萬歷三十六年八月望日記

平政橋記

王明整

縣治之東有白水溪其源來自孟溪盤城而南與大溪會水峻地瀉雨集則澎湃洶湧民苦難涉客爲留車壬辰夏不佞始蒞茲土贊府曾君首以此事建白不佞

萬歷仙居縣志

卷十一

十五

仙居叢書

壯而許之捐鍰資之命僧圓珪屬官張仁夫老人王錫募衆成之遂登石立基懸石爲梁橋成名曰平政取其爲徒爲輿民無病涉創始於壬辰之秋落成於癸巳之冬立石紀之以垂不朽曾君諱學周江右之南豐人以廉能佐邑有聲此亦見

其一班云

鍾渠按本文首句原本
自萬曆乙酉四字今刪

三橋記

王存忠

邑治三里許有水介於通衢溪窄勢涌不可舟舊建歲久傾圮當春水起兩涯阻障行者趨避莫前迄冬水涸冰霜寒沍類揭蹠以進若履及載然人病之宏治乙丑邑侯錢公世資以賢科優等被遴選奉命出宰於茲慈祥愷悌民安其化強狡帖凋瘵蘇邑中大治甫期月乃達觀四境至是輒興嗟曰輿梁徒枉王政所係此而諉之度外責將安居爰請於郡侯西蜀徐公鳴舉允之復白諸僚采花君時劉君祥咸唯唯式從然民間財力匱甚詎忍歛乃捐俸并以公需之餘命義士幹敏而有操略者張忍張樞司其出納度材鳩工仍舊址而一新之敞洞虹垂鈴鍵絡

繹衡檻夾翊嶠級鱗次往來行役若履坦途侯之功信不可泯也忽等屬予記之
余自筮仕及今投紱而歸耳目亦寬矣如侯之所負所施正謂令終有俶也義豈
容默竊慨世之爲政翫歲惕日以所至爲傳舍漫忽者之所爲也蠅營狗苟假興
作爲窟穴用一書十冒昧者之所爲也締構追琢之功斬恭儉純懋之德喪勞民
傷財不協矩度好名者之所爲也若侯是舉去民之所惡而利其利了無一毫係
累其誠父母斯民者與此特其一耳他若蒞學宮復盡美亭一切興廢補弊舉多
類此可謂惠而不失爲政之體矣侯器宇宏深祿位未艾擴是心也隨遇而施克
終厥德且獻天子而溥之八荒王政其新矣乎予尙冀之哉是役也費頗多功不
少叻於正德丁卯十月十五日成於戊辰之春三月初一日橋以孟溪馬鬣張阜
三山水合流於是橋以三名余因之長九丈四尺廣一丈二尺侯名世資字汝溥
湖南祈陽人宜民之政灼灼多可道云

重建白水溪橋記

顧震宇

余治仙者踰二禮倉庫葺學校修官廨理邑父老更以白水溪橋請曰溪居下流
洩天台諸山之水狂潦淫雨時佐其武洶洶焉舟筏無所施舊有橋高巨兩崖歲
久圯塌往來者就高阜壘石以濟每遇水溢石沒則洪波瀾漫畫若兩域公私迫
於水火而臨流浩歎習不得營又邑之羣士謂地當卯方形家指爲文脉宜隆起
自橋之廢邑中科第漸衰蓋無不引望於此橋之興者昔孟子謂乘輿濟人惠而
不知爲政王周亦云橋道不修刺史之過然則令於封內之舟梁法當舉而修矣
先是汪王二公亦嘗銳意復之而隨築隨嚙迄無成功蓋溪之上流散漫驟束之
其騰湧之勢必合而偏注往往潰防而奔余先令築小堤檢匣支派以殺其威後
於水涸時堅築數埠轉石板覆其上其中埠不續者暫以木板貫之蓋不三月而
溪之涓無病涉者矣問材焉儲則令之俸問工焉餽則贖之粟問役焉鳩則官之
募於是士庶羣然忻舞於途而令與簿尉亦喜其事之有成也夫爲政者非利之
所必舉而民之所樂趨其績效未有若此之易易者矣

濬復習坎池記

黃 議

仙居縣治之南建以譙樓樓外僅數武有池一區延袤各數丈甃以貞石故迹俱存越歲既久汙穢不治瓦礫填委夷而爲途予出入諦視心竊計曰池以潑水水尙清冽淆之使濁已失本真矧汙穢不治乎緬維古人志存匡濟登車攬轡卽有澄清天下之志邑門之外視天下何如也治邑者有餘愧焉爰鳩工役具畚插屏其蕪穢芟除瓦礫隘者闢淤者疏開濬叁日故址宛然旁有石柱崑峙上鐫歲月乃宋哲宗元祐二年也清流滄瀟查滓靡遺皎如涵鏡可鑑毛髮予作而言曰天地之氣融而爲川萬派千流湍奔濤湧衝砂激石逗浦朝宗左右逢源取之不竭隄防四壘一泓清沁坎止流行惟其所適水何庸心哉覽物會衷尙象觀理在人而靜者心之體感物而動者心之用無將迎無留滯無偏主以是而達之於政是非曲直據理折衷則亦明鏡止水隨物應之妍媸在彼水鑑何私焉茲池之復詎萬歷仙居縣志

卷十一

十七

仙居叢書

非治邑者澡身浴德之一助耶粵稽郡乘謂皇祐元年古靈陳公宰邑嘗鑿池引水以習坎嘉魚名亭不知在縣治何所今不可考矣予茲池實公所鑿也引水必於溪今孟溪在邑之背水自北至南以入邑東注於河習坎在此何疑焉且元祐去皇祐餘三十年矣又安知嗣公者不以修築歲月記之乎自元祐迄今餘五百禩矣去汙穢而還澄澈實有待也易曰習坎君子以常德行習教事治邑切務莫先於此予嘉先生命名之意爰仍其舊稱或者病予考據失真以此易彼又安知無解嘲者曰蔽芾甘棠勿剪勿伐竊比之何嫌哉予旣濬之矣懼其久而湮也上覆以石僅呈一竇以示瑩冽且符習坎云

重修學記

黃 拱

爲教之道發號施令嚴刑峻罰是所謂治民非所謂親民孟子曰學則三代共之皆所以明人倫也人倫明於上小民親於下大學又曰大學之道在明明德在親民是學者所以親民也夫民之所以陷溺其良心不知禮義廉恥之習恣已所爲

一日自蹈刑辟爲政者不得不治之反懷怨嫉視若讎敵所謂盜憎主人民惡其上故俾爲政者不得行其親民之道此無他學之不明故也若夫學之既明父子兄弟相勉爲禮義之歸則不善之習未嘗敢萌於心况行於事爲之間如是不特善一身又可善一家不特善一家舉一鄉一邑皆化而爲善則怨何自而生怨之不生無非所謂相親愛之道此其所以親民無出於學也余聞仙居之民昔未知學自陳公襄令於斯作勸學文以告父老自是人知學之爲美登科第躋膺仕者相繼距今八十餘年雖田野之民猶知稱道陳公之德惜乎其學經魔寇之難悉已焚蕪惟夫子廟尙存予自來此謂此邑仁風之盛韋布動皆成列而邑序不修亦皆闕事前年冬遂興役士亦翕然樂輸所費以就其事而邑宰楊公筠崇儒樂善從而趣其成自直舍講堂挾屋齋廊門序一時輪奐之美使人改觀學徒復有講習之所他時更能延經明行修之士以掌其教則士風又愈今日當有異人輩出矣予來此三年熟知此邑之風俗然士風雖美而民俗尙有可病者蓋其好爭萬歷仙居縣志

喜訟不論理之曲直但以己爲是期於必勝而後已其所競之利或甚微雖至於傾貲竭產而無悔又好持人長短以告訐爲務此民俗愚冥尙未悛化他時學風既盛何慮不併善之乎則斯學之建豈少補哉紹興十六年正月十五日記

重修學記

余闕

邑有學古也古者黨庠述序之制明由鄉舉里選者皆德行道藝之士春秋時鄉校猶存鄭人欲毀子產不可當時有教我子弟之歌後世有我思古人之頌皆取其得風化之權輿然因其未毀不若作新於既毀存之以議執政不若人樂於作新以今揆古而爲古人所難非主張吾道疇克爾仙居在丹邱爲勝地皇祐初陳公襄宰是邑首創學宮勸之以文人始知教歷時茲久隳於邱墟宰三衢留公立賢下車謁廟悽愴久之於是計徒籌材命邑之士夫王居中郭晞宗董其役先廟後學葺兩楹繪從祀講道之堂屹於中肄業之舍翼於左右宿直有廬職掌有位皆倣舊記而廣之下至庖爨器用靡不畢具不糜官不病民功告成視學廩則闕

如乃合鄉之賢巨室議時閣學吳公芾守當塗聞之助三百緡爲之倡衆遂翕從專以廣膏腴不足復闢閑田日費之資咸有經理乃遴學職舍生員嚴教育之式學者肅然歆慕初學興在戊子會秩賦計偕及明年春登第者俱甲於他邑父老皆謂有所自噫學興而風俗美人莫見其學之功學廢而人不知教然後知學之有益於風化吾夫子嘗曰十室之邑必有忠信夫人人有貴於己者患無以淑之今夏弦春誦言言秩秩乎其中風動百里孰非忠信之士致君澤民要當不負吾聖人語豈止於取科第異時人歸功於學尙何遜焉乾道六年六月記

重修學記

王士昌

仙居掌教謝檢章先生以三吳人傑標六合師摹初厄數奇屈就一貢輾然曰一第腐鼠奚嚇鳳爲顧自豎謂何耳謁選執秩授吳庠訓以出泚橋門閉戶讀書飭躬範士外事一切勿問中嚴外和了不作尋常伎倆偕庠彥手校藝膳餼脩建諸費具出自橐中裝久之文盈齋案選鏤月課若而帙諸廣文薦紳率鐫先生近

萬歷仙居縣志

卷十一

十九

仙居叢書

藝冠之比懸國門紙價爲踴咸擬首騰薦剡以直指使闕勿及露章僅如常例遷掌仙庠其至仙之教猶在吳時無兩仙士貧殊甚不惜重捐廩人爲之賑畧學宮傾圮心惻惻不自安爰計以次飭門墻築衢道煥然一新彝堂不蔽風雨幾連棟薨以壓復慮司教無地庀材鳩工昕夕督理靡倦總不問自有主者今之巍如翼如繫誰力也至臯比或穿苜蓿盤罄祇付之一嘆怡怡愉愉悠然自得庠素無土地祠獨爲之鼎建宮墻大壯偉觀夫先生一廣文尙肯出才謂幹濟爾迺倘晉而爲邑爲郡不知其作爲復當何若僉擬國博倅令當洊及先生乃銓曹謂蜀變甫定借君重訓而柔之以需大用多士悲失所皈依謀鑿贊勅貞珉垂不朽并識去思走請不佞爲之記不佞弟侄輩僉沐先生春風化雨稔聞之已熟故喜爲書其厓略如此先生諱汝嘉字國聞吳毗陵之錫山人

儒學土地祠記

謝汝嘉

聖宮曷以有土地祠曰護聖也聖何必護曰萬古不磨者大聖人之精神也精神

於昭流動充滿對越凝承神人亦有間耳故於穆中以神事神此後學昭虔無已思也仙庠舊無祠余泰昌冬蒞止此土矚宮墻幾草莽若墟野然惻然動念先爲置柵欄司鎖鑰以嚴內外之防創率諸生鼎新文廟爰私自捐俸脩葺彝堂二庫及衛宇儒門墻垣衢道粗就整頓漸將議廊廡啓聖宮矣邊順慶有命勿違畢舉於是環視櫺星門庀有隙地架數椽爲土地祠庶藉之以朝夕凝承大聖人俾大聖人精神充滿仙庠者耿耿如在孕靈毓秀諸士子行且龍躍虎變濟濟翹起一振文運在茲舉也是爲記

重修學記

周必大

孔堂高第猶分四科性與天道未嘗輕言世之學者乃欲德行言語政事文學兼而有之其不可得而聞者每求於議論之間往往名是實非言出而躬不逮此今昔通患也古靈先生陳公諱襄字述古福州侯官人時方以雕篆爲學獨與陳烈周希孟鄭穆唱道海濱鄉人化之號四先生皇祐中令台州之僊居篤意學校首

萬歷仙居縣志

卷十一

二十一

仙居叢書

爲文勸人讀書次論以禮義之俗又擇明經之士朝夕講說詢問大義間習程試高不躐等卑不流俗示之以方期造於道而進取亦在其中士民懷之奉祠今百五十餘年嘉泰辛酉夏通直郎四明林岳來治茲邑歆慕前哲凡庠序堂廡門觀舉新之厥初祠宇庫下遷置中門之右極其嚴潔刻公遺文二十五卷得謝雨詩于斷碑增置集中學有射圃淪棄榛莽亦加雉葺列市民居勗觀德亭總爲錢千二百緡皆出節用籍賦田十八畝輒務場餘財月萬錢以贍生員請尉簿嘉禾錢撫專主教導於是學職林宓呂咸陳穎王杰不遠二千里以記爲請夫教人必以聖人爲師古靈學夫子者也林君希古靈者也學者誠能各因其材孜孜弗怠尊所聞而行所知豈特無負賢令亦將無負先聖可不勉與按國史古靈傳惟載其宰河陽與數郡所至必務學校而令僊居則略之尤不可以不書也嘉泰三年十一月十二日記

重修學記

陳耆卿

道無存亡也而教有廢起起之於未起與起之於既廢其功同也僊居縣舊無學古靈陳先生爲令卽廟建焉又爲文爲詩歲歲訓而民大勸始盛有儒雅有科目至今論所起曰先生云其後士浸多居浸隘養浸薄或加田而不屋尉余闕也或增屋而不田令徐枋也其矣居與養之雖備而起者之易於廢也丞劉君厚至歎曰廢不可起耶乃遵約勸相治屋百楹營田五頃居養備而廢者復起矣其言曰吾之學文公之學也文公之學卽古靈之學也昔公奉使浙東嘗訪其祠而行拜起之禮也吾今祠古靈且以公配蓋將以公之教我者教人而又以古靈之望昔人者望今人也余曰善哉孔子曰食無求飽居無求安此言居與養外也而非內也其內孟子言之矣曰居廣居曰養大體是也蓋居莫隘于宮室莫廣于道養莫小于口體莫大于心道之妙難持而心之靈易逝不養則肆力養則摠而其要在去私欲譬之養木去其荆榛可也譬之養苗去其稂莠可也夫吾何以知其荆榛稂莠而去之曰窮理也窮之至則見之明見之明則能判公與私辯道與欲故其萬歷仙居縣志

重修學記

王士性

僊居之有學舊也圯于歲久至萬歷壬寅秋仲連楹棘以壓焉松株敗瓦尺寸不當于用晉江王公初蒞任詣學徘徊四顧而歎曰是有司者責也則爲鳩工聚材經度而拓架之殿堂巋然廊廡翼然鐘鼓琴瑟衣冠几席丹堊綵髹燦然具矣此數十年創見也博士胡君濂金君湯呂君性祖率弟子余鼎等謂不可以無言命張鍾綰王汝令朱光胤王懋卿余承謨朱光紹來徵余言記之昔者太史遷讀功令至廣厲學宮之路未嘗不嗟悼于王道之微也予記僊居學而于今昔有深慨焉說者謂古人自志學至仕閱二十五年無他利祿可趨今人父兄帥弟子一惟

富厚顯榮是冀是教與學皆非也抑非獨此也古者憲老而不乞言故天子袒而割執醬而饋執爵而酌以教諸侯之弟也今少年浮薄之士以傲骨相雄長皓首抱遺經者狎侮而嘲笑之令畏避而不敢前不則摩肩而唾其面古者鄉簡不率教者至于四不變而後棄于遠方小學正簡國子之不率教者止于二則屏之凡以匹庶之治易膏粱之化難也今博士與弟子相維以虛名若秦越然魁壘紈綺之豪則磬折禮之貧者頓指而使惟羔雉是問是教與學非之又非者也僊居僻在山海冠裳始漢唐間不聞古教學之意古靈蒞是邑崇以孝弟忠信示明倫之本邑民始脈脈向善不啻文翁之化蜀也至今其俗丕變少者見長者偃偻而側侍私語及之稱先生而不名膏粱閹閹子弟不敢以父兄氣勢而驕其師帥是獨仙邑能他郡邑所不得並也則古靈之遺化在矣邇者教道弛鮮良有司者移易之王公甫下車問民疾苦卽以風化爲己任進博士弟子而詔之聲聲爲譚經課藝使人端本于倫理不數月而學士彬彬然改觀其與古靈之教異世而同軌也

予固因修學而及公立教之意使羣弟子知公之加惠學校者不徒在雕鏤藻繪之間則諸生效法夫子而無負王公師帥之心者必使邑之流風遺俗百代存之而其所以志古之志學古之學當有進于往昔者是役也庀材于山公出俸金若干先之議以編賦足之間出贖緩助之佐貳曾學周禮公意而以清勤佐之起于癸巳歲四月卽以七月成銀以兩計三百夫以頭計千餘公名明鑿字懋良聞之晉江人與古靈先生同鄉云

重修明倫堂記

應存卓

汪侯章紳明經文帥彝倫冠冕奉檄令僊居甫二周星百廢具舉尤屬意黌序甄青衿時明倫堂圯壞不支侯瞻視咨吁曰政有大於此者乎學之堂皇家塾也青衿吾子弟也家塾頽廢子弟安歸民安嚮風謀葺煥如燁如蓋安洲倫常若待侯聿振之也不佞走旬宣役黔陽別侯年餘矣學博周君大時馬君效成黃君世廉偕諸文學介紹余君鼎走書徵言勒貞珉垂不朽述侯覽邑乘慨然慕陳古靈政

務大體諸如訟牒遺決稽逋輸最省徭薄役約已植民他無具論其大者則明倫堂之葺侯洵用意弗顧厚哉侯意天生兆人決有恆性五行五常天以之成歲人以之成品故君臣父子兄弟夫婦朋友五者天下之大倫也倫不明性薄蝕性薄蝕則徒覩然人面耳雖下民冥頑乎實司風教者責也侯念安洲東南舊邦家拉戶誦士紳頂趾相望敦倫不乏人獨編伍庸齒不觸不興不提撕不論往往弗孫于倫或悖公執法跳梁自逞罔知有忠者或天性相殘乖忤親志罔知有孝者或鬪墻秦越貨賄爭奸罔知有弟者或閨慚鴟張逆曳牝鳴罔知有別者或恆居出肺肝矢天日纔少利害厘毫髮遂下井傷率弁髦視焉安得有亟亟明倫如汪侯者不佞三復若言矍然起曰侯詎流俗功名士哉三代而還吏稱循良者若李離石奢第督文綱距明倫雅化遠甚彼卓茂魯恭奉職循禮樂教化謙讓未遑沿千百年彝倫如綫侯繼李石卓魯千百年後力挽倫常振刷民德今吾仙民象指奉令臣臣子子兄弟弟夫夫婦婦友誼不衰則斯堂之葺非萬世作新之澤

萬歷仙居縣志

卷十一

一十三

仙居叢書

與茲敬次侯政之大者鐫之石侯名夢說字良弼領薦南畿乙卯賢書爲晉陽令仰浦公子司徒秋浦公裔孫擅池州世族云若其效勞董督佐竣厥工者則典史張大恩也

重建明倫堂記

黃景星

僊居之有學宮自宋令陳公襄始也厥後紫陽朱子一再過之規制多所更定而人才日益盛云國朝文德誕敷學宮徧于天下嘉靖之季斯邑闕于島寇而學宮燬歸然若魯靈光者獨聖殿耳于時貳守毛公德京仍舊址而剏明倫堂翼以左庫右厝繚以垣墉頗稱宏壯至于今五十餘年矣殿廡齋舍日就傾頽而堂之不支尤甚向時賢令蓋嘗加葺頃來弁髦學校者或外飾而在其中廡或乾沒而託之繕修均之若搏雪壓衝何怪乎隨修而隨圯也萬歷乙巳崑山顧侯來爲令顧侯者太保文康公之孫也文康公光輔肅皇勳在社稷侯業承劍履譽擅菁華及茲出宰益注意於庠序甫下車而登斯堂徘徊四顧慨然喟然曰以予之不敏長

于茲土而明倫堂至于此使爾諸生曾不得絃誦而託處焉誰之咎也亟欲謀修屬歲侵而暫輟又明年戊申侯乃言曰是當改作何以修爲然時詘舉羸議者難之侯謂修則觀美於一時費輕而力易造則獲安于久遠費重而力難吾爲學校久遠計當任其難者耳乃捐俸若干贖鍰若干庀材鳩工撤而新之經始于季夏落成于季秋而不佞適過其地于是邑博吳君維翰張君崇聖王君湛率諸生請不佞言以永侯績夫我朝以經術取士咀孔孟之精英固非詞賦比而究其所見長豈能出于文字記誦之外乃于斯堂獨揭而名之曰明倫豈非以明倫者政本歟故曰勸學修禮崇化勵賢本人倫以風天下太平之原也有味乎其言之矣僊居自洪永以來有忠臣有賢相有名卿執其他臺瑣曹郎藩臬守令炳炳烺烺後先輝映孰非出自此堂而顯于當世者乎故斯邑磽瘠寡產些窳多貧較之六邑爲最下惟是先達諸君子在焉盛遂埒于臨海則信乎地以人而重也雖然昔也傾圮今也鼎新燿燿翼翼驚目快心者侯之功也藏修于斯游息于斯顧名思義

砥行敦倫者士之責也諸生勉乎哉行將通籍展采爲瑞於清時庶幾無負國家育才之德意與賢令興學之盛心而媲美于先達諸君子乎若玉表石裏有玷于此堂而徒攜華揆藻以飾無端功名也者非夫也于是諸生皆唯唯稱謝已又進而言侯慈祥廉潔節儉溫恭嘗頒五禁以勵編氓而修城繕倉造橋葺署善政非一而飭殿廡營齋舍重建此堂特其大者已然則侯誠賢乎哉他日傳之循良卽與陳公襄並千秋焉可也第不佞誦法朱子屢經其過化之地而曾無絲髮之益于學校則不佞媿矣則不佞媿矣侯名震宇字字清曾以易魁南畿而督是役者爲主簿吳道遵典史鄭同文例得并書

重修文明樓記

張熙

至正二十三年陳侯天吉以承務郎浙江等處行樞密院照磨兼承發架閣庫奉省院命總督仙居事時邑經寇燹餘公私廩舍莽焉邱墟惟吾夫子廟獨存侯撫綏凋瘵未數月慨然以興起斯文爲己任則歎曰殆天將啓文運而教基之弗墜

耶由是聿新文明之樓按邑城樓在治東文廟樞星門左橫跨通邑大衢其在宋世扁曰登龍翼然內拱凡安洲之勝合形轉勢爭效奇獻秀于几寫之下蓋昔人以扁縮風氣時節觀遊者也我國朝憲臣高伯元始命肄學肇錫今名以爲博士弟子游歌之勸今雖幸不毀于寇前此亢是邑者玩歲愒月瓦圯桷腐漫莫之理遂乃風雨震陵壞不復支俟旣成民神報之稔載謀載惟鳩工度材弗愆于素髦士競勸民不知擾縣尹昆陵蔡君國賓和恆閱敏敦尙禮義專意恣力恪蒞其事監邑哈散沙協恭和衷克贊襄焉俄而輦飛連雲丹艷煥日顯廠宏麗視昔有加經始于壬寅九月竣事于癸卯二月旣成會寮衆耆耄縉紳之士以落之邇遐拱境若增而勝罔不愕眙感歎曰不圖今日復見斯邑之壯麗天台張熙揚解而言曰自國家失太平天下學舍頽弛墜頓不獨遐壤爲然雖有良牧奔走乎期會調發之不暇夫孰知學校綱常之不可泯哉侯乃獨能於勞來安集之餘身爲表倡昔之鞠爲園蔬者今則實實枚枚宮墻有恤焉昔之倚席不講者今則魚魚雅雅萬歷仙居縣志

卷十一

一二十五

仙居叢書

傳淑有人焉丹洿湧漣我其易之肖像默味我其飾之于是而藏修于是而游息則斯樓也信綱常之標表邦邑之觀瞻其有功於民教大矣夫豈齊雲落星誇山川之秀以快耳目之私已哉矧夫興廢舉墜猶於是乎權輿意者天運中興太平有象戡干戈而肆文德其兆不見於斯乎易曰見龍在田天下文明蓋深有望于乾元九二之大人者觀侯之政可以知侯之志矣於是咸歡欣蹈舞願勒金石以著厥美而屬筆於熙焉侯字文祥永嘉人慈祥溫良廉明而識體要其爲治也務在敦本故民感樂而安之是可歌也已乃作詩曰惟茲泮宮振古所崇巋然獨存高明有融門曷以起庫俟而穹翼翼壯觀陳侯之功昔息所事嗟彼震疊承君劬之不擾不攝旣奠是居旣鼓爾篋莪莪章逢肩摩袂接昔有古靈屬時太寧侯繩祖武克廣德聲車書載同爰攷休徵大哉乾元天下文明

重修文明樓記

楊守陳

古之君子登高明遠眺望所以闢耳目之塞滌襟抱之煩擴志趣之隘以進于道

也孔子琴于杏壇遊于舞雩其進子弟于道與台之僊居縣學文廟樞星門之左有樓橫跨於衢途其始宋考亭朱文公創之榜曰登龍元浙江行樞密府照磨陳天吉撤故鼎新廉訪副使高伯元易其名曰文明隸于學東以爲振作文明之所久而寢圯迨國朝永樂間弊簷敗瓦蕩無子遺獨其址巋然如故露草烟蕪交蔽其上今提督學校浙江按察司副使劉公鈺按部嘗以茲縣士風稍衰而科第久曠喟然興歎父老或言茲樓所以棲風氣而樹觀瞻士之盛衰所由繫者公乃登其址欲復之士民獻金以資營構時典邑者非其人弗克就於是知府阮侯勤主之同知林君儼相之知縣彭君鼎至承之材甃乃備始成化丁亥之冬迨己丑之夏而成棟簷高翔門楹洞啓挹澗光於雲端納山輝於天際穹臺傑閣莫或與抗者諸士子登之仰青圭景星張阜諸峯則曰彼高屬霄漢吾德可崩施耶俯白水一溪則曰彼萬派必東吾行可濡滯耶睹雲靈萬象花木羣約百族則曰彼華采炳煥吾文可漫漶耶瞻昔賢之墟望先達之里則曰彼奮英揚翹流芳馨永世吾萬歷仙居縣志

徒可懈弛而不嗣其芳耶東指台西指婺則曰彼俊髦稠而科甲盛吾邑可寥聞耶其必惕然而省毅然而奮崇其德若峯果其行若流郁其文若雲霞花木羣約聲實超於昔賢先達而科甲莠于鄰邦則夫高明眺望進道之真以副朱考亭昔日振作之夙心者不在茲樓乎夫操縵所以安絃雜服所以安禮藏修游息無非學也或徒登眺而不進於道甚者酣觴博奕以爲娛則豈所謂士哉昔樓之廢也士之不振可諉曰風氣宣洩之故樓今復矣士可不自勵也與茲奉阮侯之命遣閩塾師張槩陳澹來徵記視憲使郡守興學勸士之意可謂盛矣故推其意而備書之

重建文明樓記

劉舟楫

考亭朱夫子過化僊居傳者謂今庠迺夫子卜遷門左建樓以爲護所以收地勢之全氣也樓立淳熙人才特盛于宋故時人以登龍名樓元季樓圯運亦中衰至正二十三年總縣陳公天吉縣尹蔡公國賓復之憲臣高公伯元易樓名曰文明

又一新也我國初樓廢而科第亦乏成化丁亥學憲劉公鈺台守阮公勤縣尹彭公鼎建皆隆麗歲久而又圯焉時大司寇應公大猷方伯應公良大參張公儉少參吳公廉正郎蔣公泮金公克厚在庠乃出已貲鳩爲材坊以覆其址未幾諸君遞登甲科位望相繼斯樓之係文運應若呼谷歷歷可徵也嘉靖以來坊頽址在二十九年庚戌吉安廬陵曾雙羅先生可耕以鄉進士授諭仙居抱宏學期斯皇多士凡可以振興而禪學校者靡不究心聞樓有繫學之謠進悉前迹迺曰不可以無樓也遂集士議復不欲煩民捐已俸廣木石時師訓萬安蕭先生遷高安梁先生廷璧亦出助邑宰安福謝侯德聰貳尹海豐蔡君淦聞而是之各致金贈適有無錫馬侯濂以明進士繼宰加意助成諸士捐廩米餘則因家以重輕納碑陰可考也事肇于本年陽月越二月題梁下礮石門跨衢上建樓三間通其中工臻十之八適雙羅應廣南較文之聘壬子八月宜黃一泉劉子舟楫來訓是邑遇常熟趙虞泉先生士端攝庠篆以修樓爲言會雙羅還尋比試禮闈迺以樓之役工

托舟楫遂同泉處各捐俸爲增修計相成諸杰應存卓等益以濟工遂得續瓴葺材并易其所宜易者加以飾繪顏楣煥然成制以繩雙羅之志亦考亭之志也夫樓有禪於風氣也考亭肇之伯元發考亭之意而文之雙羅蓋因文而思繼述考亭者也今觀佳秀聿萃奚啻足以眺山輝洞光盤聯麗趣而已士之登此以會文明道也涵泳于雲漢天章高明廣大之表則心目軒闊消磨隘陋故昔之鍾靈發秀于此者若吳公芾陳公庸郭公磊卿鄭公雄飛吳公梅卿吳公諒鄭公憲王公莊盧公迺鄭公恕王公一寧洎前諸君子皆忠孝節義文章德業炳如日月昭我文明諸士當知今日又一貞會也尙慎勗哉而後之繼今者其文明將未艾哉舟楫幸預良會落厥成諸士復請爲記故不辭

夏日校殿曰序周曰庠此三代在鄉之學也孟子釋之曰校者教也序者射也庠者養也用見古先聖王以道藝教民於鄉而賓興之必求教養之義以名其學非

謂教者無資于養養者無事于教而射以觀德者又可併置教養于度外也今之縣學古之鄉校也教與養可偏廢乎然養之尙易爲力教之實難爲功僊居興學自古靈陳公始公蓋篤志於教養者時則民尙朴野罕知讀書致勞動誘之功其後習俗丕變向學者衆學田僅二頃弗給於養寶慶初三山劉公厚來爲丞乃遵約勸相治其屋百楹又物色征營增彭溪山田五頃於教養不爲無補劉公晦庵朱文公門人也宜其佐邑知所先務如此丁丑兵火邑廩爲墟天相斯文惟學宮端然獨存奈失其籍田地遂多隱沒無怪乎養之寢薄而教亦因之而實弛也吁是必有如子游者爲宰施學道愛人之化則庶乎鄉校之可興是亦古靈所望於後人者皇慶改元眞定曹公質自翰苑出尹茲邑學問源淵有所自矣清和豈弟藹然可卽首至視學大懼士失收養儒効弗彰無以稱上意旨力爲奉行蠲役之詔敦請經師訓迪後進欲使鄉校復聞絃誦之聲爲吾徒者幸得不徵於鄉已裕於口體之養所宜宿春裹糧遺子弟以來學似不常視學供之有無以爲勤怠然

田地隱沒者終不可置而不問繡使行部諭知尹有善教因命以經理之任其散在諸鄉者親與教諭張國珍徧歷檢覈見數田計八頃九十六畝有奇地計一十五頃二十六畝有奇塘八畝有奇召佃立租視舊增穀米麥共四百六十九石七斗鈔四錠十兩有奇其聚在彭溪山者數雖夥而租則輕豪者利其贏且無賦役之及私與鄉民成交有多不以時入若照諸鄉一體定租雖理亦宜然又念其初有開墾之勞於是計其所入定以七分與佃三分歸學養士及民庶幾兩優矣且以儒生今果有幹才委爲總立板籍以防陋落之後弊繼今出納之吝會計之當又在職掌者各爲盡心以無負賢令作成之美意則教養能不有加於前士習能不復振於後乎念昔司業陳公者卿記劉公厚修學復田之蹟有曰古靈遠矣自今論所起當曰劉公今愚亦曰古靈與劉公遠矣自今論所起又當曰曹公云

重修城隍廟記

顧震宇

天子神明御宇通理陰陽所在通邑大都深山窮谷凡有城有隍者必設像而廟

之以爲其神之靈胥蟹而答一切門廡堂宇儼若官府其民駿奔趨走肅如事長吏而過焉蓋其靈爽之所通故有然矣予不佞甫蒞茲土用故事盟于神廡宇昧昧也比謁文廟繼觀公署無弗陋者乃召耆老詢之曰僊自倭寇煨燼之餘雜取山木補搆數十年來聊事塗飾土木爲艱矣予聞其語而傷焉雖然是其土風之朴茂創而新之夫乃令之責歟當是時蓋爽然有修舉之意而未之逮也丙午冬不佞將朝天子良善蔣德佐願任其事乃捐俸資什一而告之曰予方事于文廟弗能周觀回而神之門廡堂宇頽者堅圯者立諦而觀焉則隘者宏昧者丹矣夫仙民守質愿之性好食己力而不欲取餘於天地其於阿堵亦艱矣是役也豈其有神鬼輸之而若是母其性之所往而神明出焉將神之胥蟹而民弗愛其力歟吾夫子之道如日中天而不佞盡其吏之經畫欲舉吾夫子之門廡堂宇擴而新之不能給而神能走其民于數月之間又能出其橐中藏而弗怠嗟予之治其不逮神遠甚自今與神約其母懈民志而永永保佑焉遂鐫石而記之

古靈祠記

張儉

先生侯官人宋慶歷八年令于茲後改河陽熙寧中受知神宗仕至樞密直學士先生道以自任德以化民文以名世忠義以忤權奸安善類迄於今芳簡册噲炙人口予無容喙邑人初祠先生於鄉賢允未稱祀典聞未子登福應覽南峯之勝曰賓主盡東南之美蓋二山爲邑門戶所宜壯觀宏治間鄉大參王公誠之倡議前令李克常建朱子祠于盡美亭南峯猶萑莽也正德丙子予與司理王民望迺商祠先生於其上民望曰嚙服予采予曰六人者義可使民望曰嚙若予守予曰山古剝廢田可耕老僧宗序居之民望喜力主議越歲丁丑六人徐翰張櫟朱堅張煇張燁王信圭相成棟宇旣新宗序又營別業誓守二祠時葺勿廢勿褻煥乎東南之美也未幾民望擢刑曹行且請余記其事嗚呼七世之廟可以觀德令於民若父母父母之欲利子也罔弗殫力矧讐歛以傷之子于父母久而替其祠非孝也先生以子保民民之祠先生豈非宜哉雖然予邑自晉永和置縣縣置令由

永和而慶歷由慶歷至今凡千三百有餘年三百有餘令未聞有祠民豈私於先生哉先生之後有令劉光者民懷惠而畏威有尉徐默成者遭呂師夔亂力戰死民亦罔祠其功德淺深可概見矣予故錄始末以屬今令曹南崗使礮之石或亦相與嗣其美

重修古靈祠記

趙善政

予初拜僊居令客有賀予者曰子令僊居喜之乎抑憂之也乎予曰喜之也客曰邑當孔道僕僕奔走僊居層峻絕巘難于蜀道皇華星輶或月一至焉子是之喜夫亦厭衝繁而樂簡僻乎予曰非也客曰繁華之所人爭趨之僊居舟車不通無綺麗之物且地故所稱瘠終歲勤動斲斲輸租之不給子是之喜夫亦人棄我取耶予曰非也客曰何爲其喜也予曰所喜者先哲之休風在也昔古靈陳先生爲僊居令距今若干年矣猶赫赫照耀史冊讀其教民數語想見其從容在位雅有豈弟之風而其民亦欣欣向化故從古及今慕古靈爲良牧而羨僊居爲善地予

恨不及生先生之時爲僊居之民沐浴教之化也語曰舊令尹之政必以教新令尹先生教民之語昭然教我矧其遺化猶存文章節義後先相望乃今幸爲善地令矣予誠喜哉爲客具論云云予至僊居伏謁先生慨然有今昔之感察其俗朴而尙義啓其良心猶可歆動以故諄諄誨諭勸在刑先居無何訟務漸簡得以暇日聚諸生於先生祠彬彬然考德問業者皆有志士也坐起咏歌四顧傾頽茲非新令尹之責乎乃亟謀新之諸生曰先生與民休息茲舉未免勞且傷也以勞且傷而新古靈之祠吾意古靈弗樂也予曰子過矣子過矣君子於天下事權其重且大者不小利恤也用僊居之民與財而修功德僊居者之祠奚爲不可况祠新而民不知乎予查稽簿僊居雜用均平僅七十金一年之入不足以濟一年之出司邑者恆苦之予刷之明用之省以在官羨餘者請於當道爲之鼎新創工於秋九月竣事於十月廟貌一新而僊之聲名文物若爲之改觀者諸生瞻拜喜色相告樂其成謂予宜有言也予記其事并識予之喜云

台仙居有二忠臣焉曰戶部侍郎盧公迥蕭縣令鄭公恕昔嘉靖初郡守羅公僑始卽郡之城隍山剏忠節祠以祀正學靜學二先生臨海附郭縣也又因縣人請祔行人鄭公華于義協矣尙惜當時咨詢弗周盧鄭二公未及也嘉靖丁酉九月郡貳守朱侯行縣至仙居未浹旬善政纍纍觀聽一新縣廡西有妖祠與縣後堂相直俗稱後堂殿歲時牢醴灌漉若狂瀆亂失經殆數百年侯立命撤之卽其地建新祠祀盧鄭二公前樹之門廷表諸通衢曰雙忠祠後隙地爲寢堂後爲小齋翼以廡繚以周垣因以爲士子講習之所昭勸忠也謂良于二公爲鄉後學知其故爲詳屬之記謹按二公皆僊居縣二十六都人盧公由歲貢革除開歷官戶部侍郎於方正學之門從游最密其死也在壬午夏六月亦與正學同時今其故居曰西廬者久矣爲若敖氏之鬼矣鄭公初由歲貢領訓導陞知蕭縣壬午夏靖難師至率鄉兵拒戰敗而南奔尋被獲以八月十七日誅是都以二公故類抄屢籍萬歷仙居縣志

科糧數倍迄今遺黎困不聊生是以田夫牧豎人人能道之君子之澤未斬也鄭誅稍後而族屬竄匿者赦後來歸椒聊蕃衍故其事彰盧先族誅故其事晦獨吾邑知之稍遠者弗聞也二公之官守有大小世裔有興滅事迹有顯晦而要其精忠大節所以光日月高華嶽震千古表四裔者無異轍焉余因作而言曰節義之氣正氣也鍾毓于天地而培養于朝廷當靖難兵起而蹈白刃如飴者計五十七人賴我國朝列聖褒忠追卹已次第表揚崇祀矣至於寧海之方正學太平之王叔英俱叨祀列獨盧鄭二公未與若非後賢爲之表章不幾淹沒無聞乎迺今郡丞朱侯專祀二公于縣又以雙忠復祔于郡之忠節以爲正學靜學配闡百代之潛光樹風聲于永世而能仰體列聖褒忠追卹之仁有功名教大矣嗚呼前代如汴宋之衰南宋之季孝子忠臣身膏草莽立節不白者者何限雖有遷罔莫之或傳喪亂斯可哀已而五十七人者與首陽餓夫並名異代非我聖明之朝治教隆洽何以有是成周之盛豈專美于千載上哉朱侯且方祀鄭二女於杜氏真僊之

祠祀故守邢公宥馬公岱羅公僑於名宦歎李公顯忠之忠烈而時不遇也因故廟有像修祀惟嚴皆事關世教宜併記之異時國史大書不一書牽聯得書將必有考於斯侯名世忠字良弼豫章人

四烈女祠祀

張儉

吾邑去西北三十里曰孟溪唐天寶中建貞女祠祀杜氏二女卽其得死所也每歲旱禱雨輒應宋宣和民避寇其間寇望山中草木皆爲兵畏不敢犯民德之別建慈感廟於三里之內以便供祀至嘉靖丁酉郡貳守朱公按邑建雙忠祠祀靖難忠臣盧鄭二公以鄭二女禮弗同享徒以配杜二女扁四烈女祠獎忠節也祠初隘陋公拓其周垣大其寢室又置前堂爲士大夫拜瞻之所不勞力重費踰時煥然一新而四女之烈家聞而戶曉也予竊有感焉夫忠臣死職烈女死貞分定故也分定不可以見性乎何也蓋貞女者非學問之羈繫無勉強矯揉之虛飾見明志一舍命不渝自有以合夫天理之公人心之順雖學士經生子然寡儔豈非萬歷仙居縣志

卷十一

三十一

仙居叢書

孟氏之所謂性善者耶故自其揚於家而言則可謂之孝自其揚於國而言則可謂之忠嗟夫世之味性道而而蔑忠孝者比比也仰視四烈以一女子而身繫綱常之重將不愧心而汗顏哉公守台屹然以扶世振俗爲己任自四烈之名一正可以光祀典美風俗勵志節而天下之公是昭萬世之大閑定矣公之功豈曰小補之哉公名世忠字良弼江西南昌人歷官咸著顯蹟此其緒餘云

四烈女祠記

馬濂

嘉靖辛亥秋予奉聖天子命來令茲邑卽政營化首問忠臣孝子義夫節婦惟時民無老幼一辭以對曰某也忠某也孝某爲義某爲節杜鄭四女之行因得聞焉然而未及其詳也明年春例當祭四女於孟溪之祠乃閱其祠之所記杜氏二女則隋大業賣湯餅爲活甫笄父母繼故庖人挑之二女憤激殺庖人遂棄其家隱孟溪溪水驟溢二女死焉唐鍾離介將謁選先日夢二女與言尹茲邑始覓其骸骨爲之祠鄭氏二女則父恕知蕭縣靖難兵至恕死之二女被執亦死嘉靖丙申

台州貳守朱世忠來僊居與聞其事因奉其主爲杜氏二女配予因喟然嘆曰有是仙哉居之多貞列也夫前有杜女姊妹雙節耿光照耀已與日月爭輝後有鄭女又能與杜同德曠世相感至於今聞其行者孰不凜然起敬思欲瞻拜祠下且俗稱地苦旱嘗禱于其廟輒有應茲必有莫之爲而爲莫之致而致者夫四女稟天地之正氣各以貞潔自勵不憚殺身是氣也可以貫金石可以格鬼神是故乾得之以清坤得之以寧四時日月得之以叙鳥獸草木得之以生是故不待生而存不隨死而亡然則四女雖死女之氣真能流行古今充塞宇宙一有感觸未嘗不通民以旱告遂降膏澤亦奚怪哉祭義有曰有功於民則祀之以死勤事則祀之以勞定國則祀之能捍大患禦大災則祀之夫四女特無定國之責耳清風高節足以激頑起懦裨益風化况於禱雨輒應禦災捍患之功又不可誣廟貌之崇春秋之享非報德報功之不容自己耶嗟乎茲一女子也能以其身任萬古綱常之重生氣常存與天地相始終彼經生學士平居無事每宗孔孟談仁義一遇利害輒畏死偷生頽然變節視此不有媿與予竊祿茲土有風教之責故以此自警兼勵茲土之士庶云

烈女坊記

應存卓

余謂孟子性善之說只兩言而定曰所欲有甚於生故雖生不爲所惡有甚於死故雖死不避夫人之欲惡莫如生死乃又有甚焉者蓋天地正氣特出於塵世欲惡之外此本來之性不待學而能者也觀于顧烈女信矣夫烈女閨門女子豈嘗觀典籍達古今哉而一時抗節捐生則有塞乎天地而光乎日月者謂非天植其性而不汨於人者耶烈女性顧名惜寶僊居縣懷仁鄉顧宏鈇女嘉靖中烏倭萬餘經仙居縣入懷仁鄉時烈女年十五未字聞倭至隨其父母及外祖父母母舅等離家避之行數里倭追逼之同行諸骨肉各自逃生不能相顧烈女與使女阿香俱被執烈女美姿色賊操刃拘驅之甚急女私與阿香語曰予二人不幸罹此生惟一死耳白璧可碎不受瑕矣乃佯順之以給倭行百步餘至小橋山側坐口

湖層崖百丈旁澗深淵人不得肩行離倭數尺許女復語阿香曰吾得死所矣阿香曰爾若肯死吾豈獨生乃同投湖中而死倭相顧駭愕者久之少頃白日陰靈風沙障人如傷烈女然一時通邑聞之而薦紳詩章行路口碑稱歎籍籍無不哀且服者萬歷甲午邑令以其事上之郡守轉聞於督學監司暨直指中丞覆覈再四具報如初乃集議題請得旨捐公帑若干金爲之樹楔於坊余因歎曰嗟哉死豈易言哉士人有談說名節而惴惴利害遂奪其志者而婦人女子於變起倉卒乃能毅然捐軀若棄一羽不惟自完其節且同行之女亦感其誼與之俱死此尤難之難者吾台夙敦節義卽往昔杜氏二女暨盧鄭諸公死節靖難時兩氏女亦以身殉之迄今凜凜猶有生氣茲烈女之死真可以追前烈風末俗而愧夫鬚眉男子之懷二心者且烈女之初亡也名聞遠近但以兵火騷動官民旁午於風教事不暇修舉經四十餘年烈女之弟願義派痛姊抱義而死欲以傳之不朽乃捐貲財竭心力以其事哀鳴於官竟得達之當寧而蒙旌異且義派之心尙不能已

又於帑金之外增以己財建石亭於楔側扁曰精貫日月義植乾坤夫兄弟姊妹之情比之手足然人心不古每於生存尙有競財產斬囊橐而排怨若寇讎者孰能於已死之姊尙多方以圖表著之而使傳於永永哉昔李世勣自爲粥進姊以致燎鬚人皆多之然亦友愛於生前耳未能如義派如姊死已久而至情愈堅且閭閻之節竟得達於楓宸則爲力甚艱又不止於粥而已聶政爲嚴仲子報讎其姊不愛其死而彰弟名事亦奇矣一時慷慨之氣質以中庸未必允協豈若烈女與義派之事粹然其無以議乎蓋烈女芳名常存義派實行可法勁節高誼萃於一門其義正其氣剛其倫厚其事難不惟閭閻委瑣之流莫之與伍卽李世勣聶政姊弟且在下風是真可以光青史而維世教者也再廉義派行誼可紀庶幾古之隱士非止一端而多方養母之孝尤人所難且儉于處身勤以力本豐於甘旨愛篤友于鄉評素所推許今家無厚積而於姊之旌楔仍不靳貲力人於是益信之重之也故於烈女碑記末而併及之是舉也中丞任邱劉公元霖直指汝漢彭

公口督學監司宛陵蕭公雍姑蘇伍公袁萃郡守閻公邦豫章簡公繼芳邑宰貴池汪公夢說蓋終完其事大裨風化所可惜者阿香之節與烈女同但不知其姓難以請旌竟不得不已之君子尙深懷憾於此也遂楔諸石

吳仲修忠孝坊記

盧俊民

黃巖州知州吳公世居台之僊居折桂里宋給事吳公芾之五世孫也公胚胎秀異生而警敏爲童子時日記千餘言既長知親書史尙儒雅事親長克盡其職其于宗族無親疏貴賤待之如一鄉里故舊又能周旋委曲然負大志有膂力雅好騎射鄉有強梗弗順者必摧挫之罷弱不能自存者則扶植之煦撫施予周急無吝平居假酒自娛日必飲飲必醉慷慨吟嘯由是人多壯之至正十三年會台城有兵變郡監聞公有氣節遣使禮聘公力辭弗就勉之再四乃起署事黃巖州判官命守台城公鍛勵器械嚴整部伍不弛于律不擾于民由是人益加重焉至正十六年春處州陸溪盜起犯仙居境遂陞公同知州事總制其鄉之義兵公於是

慨然曰吾今爲王臣矣當勤王事况仙居吾父母邦也捕之其可後乎卽修戎器備糗糧招集亡命合鄉兵數千人奮躍而往禦戰於羅漢潭賊危困不敢進鄉民吳奉一者陰爲賊向道賊乃凌晨潛出突圍襲其不備官軍倉卒兵校多散去公獨披甲上馬與之戰手刃數十人而賊衆潛掩其後遂遇害遠近聞之莫不嗟悼事聞元帥府時憲僉伯顏不莊公爲覈其事遂舉公長子熈襲其官旣而邑之士民咸謂吾邑自有元以來幾百年矣民皆安居樂業未嘗識兵革一旦草竊蜂起百里震悼而發憤能先銳志擒賊者吳公一人而已公之心蓋將衛鄉里安民庶以宣忠於國家使其一鼓而得狂寇則吾人均賴安享之利茲不幸而遇害其功亦不爲少矣立祠邑里以帥府議允其請遂給官貲一千緡士民翕然從之乃於邑治之南狀元坊擇地之剛燥夷坦者七百武度材貞以良鳩工勤且齊凡梁棟榱桷門牖闌楯之具皆堅實如法飾之以粉漆塗之以丹雘奢不過侈儉不踰質經始於至正十七年六月訖工於明年正月祠成塑公像其中冠裳嚴肅肖貌端

毅觀者莫不竦敬朝廷遣名臣經理江南贈功褒德有司復上其事贈公台州路黃巖州知州表其廟曰忠烈公諱揚字仲修剛而好禮貴而不驕以公長子襲授其職俊民來尹茲邑邑之士民請予記之竊聞古之制有功烈於民者得配食於社稷受享於尸祝歷數十百載而民神明之今公以父母之邦奮不顧身戰死于狂寇之手其功誠可尙矣公死不踰時而公之仲子燾季子忻負不共戴天之讎立攻戰必克之志集兵賈勇趨搗賊巢生獲渠魁獻馘剖心又獲昔之爲賊向道者登殺以祭其父是雖出於子之志之功皆公之英靈不昧必用除其害於一方而有以陰相其子蓋公之身雖亡而公之志公之氣猶未亡也奉祠於茲邑也又何歎焉功狀上聞天子爲之褒贈殊厚易其里曰忠孝坊以煇龔爵擢燾浙東都元帥兼縣尹忻佐處州府慕燾能清白自守馭民以寬訟於庭者折以片言咸得其歡心邑政大和後亦退處里中乃作新其堂所以彰其親之徽表其昆季之志又扁曰忠孝堂云

馬侯啣德亭記

秦鳴夏

啣德者僊居二十六都人士啣馬侯蠲賦之德而亭之也亭而碑之以永思也初都人有鄭公恕者仕國初爲蕭縣令靖難兵至以其職死之君子曰致命遂志云公死而子姓以謫戍行無有免者幸而免則投竄山谷莫敢自名流離困踣垂十五年恭遇宣德改元始詔復其田里當時鄭氏所留空然版籍而田土山澤悉歸豪右之家矣賦稅之征按籍爲定震餘殘孽誰與申理比有令於其邑者曰鄭氏不堪命矣吾爲若均派之均之誠是也然鄭氏之田不下數千則占甲坐田不下數頃以鄭氏之困而困邑民君子病之正德曹令廷桂定議許以其都夏秋之賦輸折色迨况令一經則嘗併免其均徭之半雖補苴塞漏時寬一分之憂而名存實亡終未免于通圖之累也嘉靖辛亥馬侯以進士高第來牧廉得其情迺喟然曰敝哉爲善者無以勸矣則爲勞研曲究酌其會通以爲經久可行之法是故僉殷實之戶以實其里覈實征之田以定若役查迷失之田以還其舊都有支處則

免輸之官以補各甲之折色靡有隙地則量鬻之民以贖本都之常賦蓋所以優恤者不遺餘力矣夫法行可久則宿弊祛惠出不偏則民志喻於是爲鄭氏都民者曰侯何心哉微侯吾無以爲生矣爲通邑之民者曰侯何心哉損益以平其施固吾濟所爲甘心焉者也越三載而侯以治行旌部檄且至邑民聚而泣曰侯不可留其如吾民不忍侯去何爲今之計莫若建亭于邑治之西礮石建碑丐名筆以載其事庶侯之德與石不磨而後有作者其永永無斁矣亭成請記于予予謂賦役生民之膏血節義天下之大閑故哀多益寡者敷政之常經也顯忠遂良者道民之善物也今夫君子殺身以成仁身且不恤而違恤其後哉乃善宅里以樹風聲則固守土者之急務而不容自後者而况其子孫乎况其子孫之困於賦役者乎易曰物窮則通通則變變而通之與民宜之傳曰智者作法愚者拘焉侯是舉也其有功於風教甚大爲利於邑人甚博民之德之斯固天理民彝之不可少哉是皆可書也已侯諱濂字濬卿號竹崖常之無錫人倜儻明達文學飾治卓然萬歷仙居縣志

卷十一

三十七

仙居叢書

有古循良之風茲特其一節云

馬令去思碑記

徐恕

縣令之職於民最親能親於民民斯親之未有於民不親而民能已親者欲爲聚惡爲去所謂親也合而樂去而思所謂民親之也予於邑侯馬公見不媿厥職於予邑見直道之民侯至自辛亥秋未幾撫按思質王公劍門趙公鳳巖陳公以循良之德純潔之守國珍之器文章政事之才交章薦之甫三載召爲地官尙書郎閩鄙之人士久安侯政忽命下咸皇皇走相謂曰予屬事邑侯多矣愛予邑之深待予邑之厚自侯未之前聞也侯在今恩在予身他日在予子予孫侯去誰復父母予者因扳轅泣下旣拜以別躊躇眺望始返有杖者百餘人返詣徐子猶戀戀不忍釋徐子曰天子置吏詎私一隅課最者進俸厥施疇惟表侯偉績鐫于通衢爾過頌之以慰爾思爾子孫世頌之以永爾思不朽在是矣奚以留爲皆慳然曰自予心愛予身愛予家而莫予遂也侯廉靖率下亘以始終無侈靡縱好無肆

情以求於民厚予財不困者莫侯若也均節勞逸酌量有無勢族無擅利村市無
追呼養予力不盡者莫侯若也昔有精吏治者于教化未遑侯崇鄉哲表名宦佑
善務滋懲惡務斷士氣用勵漓俗用淳凡綱紀文章罔不備具凡舉措因革凡喘
息寤寐念慮罔不在民數年間予得帖然無事熙熙以卒歲者侯賜也亟如子言
差慰予心徐子曰初侯之施予邑非爲今去而爾思也心于爾不置耳爾之思於
今非復有覲於侯也心於侯不置耳施者思者心若是於古之道庶矣哉予嘉其
以古道相與也記所言於碑使頌之侯名濂錫山人以書魁於鄉登庚戌進士第
暫而豐詞氣恂恂然至法所在屹不可撓望之知爲仁人端士也由予邑遷今官
方嚮用未艾云

周臨海均田頌

吳時來

均田頌者頌臨海周侯也周侯爲臨海令僊民奚而頌之也事有一日而舒百姓
之急者雖欲無頌不可得也隆慶辛未天下賦役又當攢造之期仙居適缺令於

萬歷仙居縣志

卷十一

三十八

仙居叢書

時分巡兵僊安福周公雖其事謀於郡守番禺張公假重周侯非侯無足以勝斯
舉者侯辭之不可既又周咨密訪得其罷困之由爲文以白之上官其略曰六縣
俱困惟仙居最甚其父老日望均平若不爲處分則下民之倒懸難解若過爲更
張則豪右之謗怨易興權其所重莫若均田編里者上官咸報可而巡按南昌謝
公初至正欲以均平行於通省主其議尤力侯乃於是年十一月之二十六日下
車吾邑又恐令不便詢之庠士詢之里老既又開陳告之門有窮極利病者聽弗
拒乃庠士乃里老及途之人靡不稱便卒下令通計邑中之田若干頃除官田一
萬二千畝免差不編里寺田一萬二千畝折半論差優免役占照題准通例各以
官級論免其額免外餘田悉與民戶一例編里合該田三百畝充一里長強有力
者不加益貧而愚者不加少焉官戶田多者儘其一圖其田不及與有餘者從其
擇所相願同充又審第一都暨第十三十五十七二十二二十三二十四
等都消耗太甚者九圖歸併之令既下觀者感注不能爲歡莫不曰父母父母各

如令平議以進侯乃爲之揆都量其家定年次先後焉凡經侯所平定者又莫不曰神明神明其丈夫快於途其婦女快於家頌聲一日遍於窮谷卽大旱時雨未足以喻之也侯貞心而又瞻智易若烹鮮本無難者而况以公天下之心行公天下之法民焉有不心悅而誠服也哉夫三代井田公天下之大端大法其初以田授民每夫百畝無非以上而均之下也其後通力合作先公後私無非以下而均之上也井田之廢久矣而賦役均田正三代遺意求治而上望治而下每言及之卒未有見之施行者何哉蓋才與誠每難兼至而兼併之家舞文之口易得而撓亂人聽也卽以吾僊萬山之中無別生理山田磽确功深得淺僅以力稼朴略持其門戶十年以來逃亡過半正由編里不均故耳不均之害多者盈千百少者不及十畝少者力詘則逋逃一戶逋逃而十戶虛賂賂賂之令嚴於上而轉徙流移日相望於道當官者見其逃亡輒曰難治難治抑孰知保安招聚之機在上不在下甚或水深火熱不盡驅之他邦不止也故辦事官金崇厚等奏下戶部准行而

當事者兩可持疑欲行中輟者凡幾矣一聞清審悉挈妻子倚門問路爲長往計不有周侯孰復來甦我哉繼自今居者無偏重之累行者有思歸之心沐浴斯民而更新之則是舉爲之侯蓋有大造于吾仙也士民感懷爲之立石紀思又謀塑像于古靈祠之左席將生祀公以示報屬予作頌予固恥以言諛者樂民之樂不啻口出聞之法施於民則祀之於頌奚有頌曰有美周侯學道施仁清風惠露洽於比鄰我邑缺令父老泣陳愁慘枯悴情理疇申惟茲大造十年利害民散久矣往事則奈上官軫念如溺忠濟假節周侯甘露以霑侯曰吁嗟孰非我民官失其道厥賦弗鈞行將卽事救此方人法窮必變况也持平計畝編里視家定次畫一較然怨懟罔避士民騰歡巨室服義或歌或舞對言流淚昨偪苛令相率播遷二期桑梓借此仁賢盍歸乎來報德難宣傳成一日鄒施百年二旬竣事侯乃返駕老稚扳轅千百不舍而今而後餘年誰假賦薄役輕有田可稼樂此君子宜民宜人窮谷士女流其頌聲胡不太階胡不干齡公侯孫子福祿永凝樂此君子民之

父母一兩三日何澤弗究慰滿三農神功無有此法不磨百代是佑

盡美亭記

張景修

僊居邑之美者也而山盡焉福應山之美者也而一亭盡焉盡美亭者非盡一山之謂盡一邑之謂也朝奉大夫龐公倅台之二年季按屬邑轍環七百餘里可謂勞矣然至於僊居福應則徘徊四覽嘯咏終日欣然忘其歸信乎美哉一日謂景修曰昔朱超石云登北邙遠眺則衆美都盡予於此山見之矣山距城二里崢嶸獨秀浮圖居其上而亭居浮圖之南予名之曰盡美矣子爲予記之景修曰唯唯雖然公之意豈有窮耶不遺一景一物兼收而並采猶東西之不可相無也邑之括蒼張阜紫籜韋羌皆峯巒險絕巖洞環怪而溪流森然烟雲晦冥鷗鷺出沒平波漁唱斷隴樵歸有騷人畫史不能工也已夫豈易名哉邑令劉君夔明雅爲公知圖序以告於是又知福應山者皇祐間令樞密直學士陳公述古名之也陳公賢先生勸學文垂於世踰四十年公實作是亭公賢宰相子名門冠代不驕富貴萬歷仙居縣志

卷十二

四十一

仙居縣志

而意乃在乎山水之間愚將見其美不專在於竹石花木風晴雨雪之際而在乎學者之材也噫美於是乎盡矣

桃花洞記

袁桃

仙居城南有塔雙巘蟠峴古靈祠在焉萬歷辛巳春思塘王侯寵麟修故事往謁之尉夏君希尹先爲治俎豆邑博劉君稔鄭君昌國暨予咸以共事至謁畢侯曰昔者嘗總鹽務求公署得桃花洞而奇之作亭其上題其洞曰桃花洞亭曰觀風亭亦仙勝概也盡觀之咸曰諾乃沿峯而南轉陟嵌竇見靈巖懸峭石室玲瓏卽云古桃花洞洞臨溪匯淵濼成潭中屹巨石柱盤浮星宛然天台之桃溪也入洞凭巖則層巒疊嶂萬葉生聲更碧巘丹旣烟雲萬形宛然金陵之桃花塢也今值春妍茵綺並布芳聲頻飄飛鳥交適農歌於田商咏於舟漁者忘機樵者遜道宛然唐虞之泰和景象也侯與諸君樂之挹酒灑詩願屬予記夫天造神物有待也洞名于古曰趨稼軒又云藍光軒一云涵清亭晦翁嘗游焉遇固奇曠四百年而

王侯遊遇又奇予與諸君因侯而謁古靈得續晦翁遊遇尤奇意者天所待也雖然侯豈逸游者哉侯學術宗晦翁而以古靈治治古靈邑舊所稱雙美者蓋兼之矣美則愛愛則傳異日續是跡者心侯之心則新亭與此洞俱永云未幾侯以陞任去將付之剗而中止迨少尹吳君正大繼尉王君棖繼博馮君韶聿至方咸欲終厥事適湯侯聘尹以司諫出宰是邑下車而立成之殆亦山川之奇遇與

重修顯慶寺記

林應騏

寺始名顯元建於梁天監癸未在紫籙山之陽唐天寶中神光現今址遂徙稱光明山宋祥符初改今額我國朝永樂十四年重修相延爲習儀攢造之所繇永樂癸未上距天監癸未凡九百歲蓋徙者一廢且興者二燬而復新者三又百五十二歲嘉靖丙辰倭寇犯吾邑焚官民廬舍殆盡而寺與文廟城隍之宇獨存若有呵護之者丁巳委官修建城池公署凡燬者咸新之而二廟及寺以不燬故仍舊又若有待焉者己未十月荆門姚侯奉命來令吾邑乃周覽而歎曰城池官署新

矣而先師城隍之廟習儀攢造之所若此豈所以尊吾君師敬鬼神務民義耶越明年政治民懷百廢具舉爰捐俸斥羨修繕二廟而茲寺之役出內橐數十緡爲倡委住僧性聰使得募緣助之不數月而工告竣視昔增美于是性聰謁予徵文記之嗟乎自漢魏以來佛氏之宮遍天下矣在昔君子往往昌言力排欲火其書廬其居卒莫或禁而識者謂宜修其本以勝之侯茲役也無亦修其本以勝之之微意與天下之視上莫尊於君故春秋王必稱天而孔子過魯虛位猶爲之色勃足躩凡綦敬以尊王也上之視下莫重於民故書云民惟邦本而孔子至式負版之夫凡綦慎以重民也佛氏之教乃曰天上天下惟吾獨尊是不知有天矣况於君乎以大地爲幻欲舉一世衆生而滅度之是不知有地矣况於民乎邪說行而人心惑以至萬乘之貴甘舍身爲之奴雖叛俘逆虜指其像而使之拜則拜不肯拔一毛利天下及不顧父母之養者或竭貲自鬻以施浮屠皆溺於習俗不見禮義之舉表儀之著無以感觸其良心耳侯則因其宮而莊嚴之爲天子祝贊習儀

之所因其靡而繕葺之爲吾民攢造黃藉之局由是衆皆曉然著侯尊君之禮佛氏惟吾獨尊之說無所容而僥倖越志之患消著侯重民之義佛氏滅度衆生之說無所容而游惰惰淫之風息一舉而衆善皆集寧非修其本以勝之之微意哉雖然侯夙夜匪懈無一事而不尊君勞心焦思無一念而不惠民固上下皆知而信之者奚俟予言而是舉則侯教化之微權也宜闡之以表侯微邑丞鳳陽鄆君橘邑參蘇州張君元卿邑尉黃州江君沐皆與有贊襄例得并書若夫規制材物工作錢餼施捨出納之詳則系之神陰侯名服璜字廷佩湖廣承天之荆門人

勸學文

陳襄

咨汝邑父老夫人之爲善莫善於讀書爲學學然後知禮義孝悌之教故一子爲學則父母有養一弟爲學則兄姊有愛一家爲學則宗族和睦一鄉爲學則閭里康寧一邑爲學則風俗美厚雖有惡人將變而爲善矣今天子三年一選士雖山野貧賤之家子弟苟有文學必賜科名身享富貴家門光寵戶無徭役庶蔭子孫豈不爲盛事哉予自到任以來居常憫爾邑民不識爲學父子兄弟不相孝友鄉黨鄰里不相存恤其心汲汲惟爭財競利爲事以至身冒刑憲鞭笞流血而不知止予甚哀焉奈何奉行天子詔條不可私恕每刑一人若傷膚髮而汝邑民不知予心乃相扇熾囂訟成獄自以爲能使予日不得食夜不得寢以與汝斷弊略不能改是誠何心雖然非汝百姓之樂於此也蓋不知讀書爲善之故也前年曾有文書教諭汝鄉民令遣子弟入學于今二年矣何其無人也古者十室之邑尙有忠信况今百里之邑良民之子弟不少其間豈無聰明環茂朴美之器可使爲公卿者然而不使之爲學真可惜也今汝父老歸告而子弟速令來學予其擇明師而教誨之庶幾有成如前所說予明年十二月官滿卽去汝父老亟其聽予言

勸俗文

陳襄

爲吾民者父義能正其家母慈能養其下兄友能愛其弟弟恭能敬其兄子孝能事父母夫婦有恩貧窮相守爲恩若棄妻不養夫喪改嫁皆是男女有別男有婦女有夫分別不亂子弟有學能知禮義廉恥鄉閭有禮歲時寒暄有以恩義往來燕飲序老少坐立拜起貧窮

患難親戚相救

借貸錢穀

婚姻死喪鄰保相助無作盜賊無學賭博無好爭訟無以惡

凌善無以富吞貧行者遜路

少避長賤避貴輕避重去避來

耕者讓畔

地有界畔不相侵奪

班白者不負戴於道

路子弟負重執役不令老者擔挈則為禮義之俗矣

紀遺

志之闕文為傳信也事不足以信後世則志不書而或有所見所聞所傳聞藏于故老之家藏于稗官之籍其事同而首尾互異其說異而大略多同者而一切闕之母乃沉前人之彩而史幾隘乎然以百年幾絕之跡而欲信之一日之考則吾豈敢作紀遺以俟後之君子

朱文公提舉浙東常平又主管台州崇道觀兩經僊居以縣治向獅山乃造橋改街為弓弩之形濬七井鑿青圭塘以禳火星又以學宮地脉垂盡于東立龍頭

石于綵紉東嶺南峯各泐浮屠以助其勝夫公百代儒宗過化之地即為增重

况垂規畫以福斯邑乎

萬歷間知縣湯聘尹建鳳岡亭于縣南以障缺山而平其橋

萬歷仙居縣志

卷十一

四十三

仙居叢書

書院

桐林書院張震龍所闢以教鄉之子弟者也文公行部過之為書一門文教

上蔡書院去縣南五十里馬鞍山之下宋寶慶中趙必昇以浙漕准遣引年而

歸郡請于朝為上蔡書院 龍圖吳芾園在縣西臺亭數處頗擅湖山之勝文

公常遊其中 提舉陳章園在縣東芳亭羅列碧水縈迴亦稱幽曠 安撫陳

仁玉園在縣南臺榭甚盛又有碧西山房在南峯之下林木翳然理宗御書扁

以賜之而蔣氏鑑玉堂與之相近或贈以詩云藥鼎香聞栖鶴寺書堂影壓釣

魚船 處士郭嘉卿園在縣西南中有冲菴其扁亦理宗御書也

縣治中舊為亭者十曰真趣青青習坎嘉魚凝香送紫列遠三益停松第一香為

堂者九曰真清二松思政安樂愛山秀岐衆樂景陳而巖老則陳公襄所建也

其詩云手持養性書此地學樵漁身類龍蛇蟄情忘木石居又有齊清樓釣翁

臺松柏林春臺學宮有沂詠亭觀德亭當時亭榭之盛如此屢經寇襲勝迹湮

沉昔人卜盛衰于洛陽園囿不能不有慨于斯云 陳公襄不獨循良標譽而于山水興復不淺建亭于景星巖刻石於天台山韋羌南塔石牛皆有登臨之作後世想見風流何減叔子之于峴首長公之于西湖或以游觀爲非政豈其然哉

韋羌山一名緯鄉一名天鼓臨海記曰衆山之最高者韋運舊經曰運羌山亦名天姥在僊居縣東連括蒼高僧支曇蘭傳則云緯鄉山在樂安陶宏景玉匱則云括蒼西南一百餘里有偉羌山登眞隱訣則曰偉羌山多異神之事巨石森聳奇怪萬狀其中一石如笋高萬仞俗呼抱兒巖上有石室戶牖樵者每聞簫鼓聲蓋神靈所宅一山而九名豈羌鄉姥鼓音相近羌美韋緯偉字相似而訛耶

括蒼山一名天鼻寰宇記云高一萬六千丈周回三百里與韋羌山相接唐天寶中改名眞隱道書云括蒼山在會稽山東西五岳圖序云括蒼東岳之左神邕

萬曆仙居縣志

卷十一

四十四

仙居叢書

圖云括蒼凌映桐柏登之見滄海以其蒼蒼接海故名神仙傳云王方平居崑崙往來括蒼石壁上有科斗字高不可識宋元嘉中遣名畫圖於團扇赤城志云臨海眞隱山本名括蒼羣山中最號巉絕有八面焉一向凝眞宮其七則臨海黃巖仙居永嘉樂清縉雲東陽七縣界皆山脊綿接今縣西蒼嶺亦其所通也山中有洞與處州之玉虛宮通自嶺而言則東屬台西屬處是謂天門地戶故不特處名括蒼而台之括蒼門與此邑之括蒼驛亦皆以是而名但郡志云一千五百丈與寰宇記不同未知孰是而石壁科斗羌韋山亦有之豈兩山相接而訛耶

宋宣和四年呂思囊作亂以縣治仙字大已爲犯諱焚之執士人蔣煜欲妻以女煜罵而拒之遂被害景炎二年縣治燬于亂兵元至正十六年處州山寇尹亞大又以仙字西大類亞大焚之嘉靖三十五年倭寇猖獗浙東騷動六月賊漸迫知縣姚本崇令戍卒賊不犯城而去者鳴鐘三聲爲號賊已過而聞鐘疑官

兵追已遂攻城陷之焚縣治殺居民極其慘酷後四十餘日郡守譚論始以兵至驅而殲之

宋有土軍寨白塔寨鎮守上營土軍教場白塔巡檢司安洲驛蒼頭驛戴村站俱在縣西弓手營舊教場弓手教場俱在縣尉廳東大官牆在縣北小官牆在縣東元所剏鎮守下營在縣治後

宋之巡檢鹽務皆武臣寨兵八十人營兵七十五人元有鎮守千戶巡檢司弓兵三十人尉司弓兵三十人國初設田市巡檢司弓兵一百人後裁革而機兵屬之典史徒有其名耳典史不知訓練爲何事機兵不識弓矢爲何物武備之弛未有甚于斯邑者也嘉靖丙辰之變殷監不遠奈何不思患而豫防也

唐天寶元年李生葫

國朝萬歷三十五年秋芝生于儒學東齋之冬青樹三本大者五層玉色而紫紋時或變而微紅

萬歷仙居縣志

卷十一

四十五

仙居叢書

邑自宋迄今大水十有五惟政和二年溢而壞城正德十三年民多浚死旱而饑十有六其尤甚者洪武三十五年蝗自北來食禾穗竹葉殆盡嘉靖二十四年饑民至搶商米下獄以死萬歷十八年推官王道顯奏請發帑以賑二十六年知縣汪夢說捐俸煮粥仍申撫按發各倉濟之

斯邑萬山夾水官路在於水傍田之統路近水者膏腴而少沿山附石者磽瘠而多且雨少卽槁雨多卽穰官府踏荒徒見路傍之膏腴不覩山間之磽瘠也故以荒爲稔者容或有之宋尤公表詩云一雨淋漓已渺漫未晴三日又言乾從來話道天難做天到僊居分外難

毛公德京多才足智廉勁不撓倭變之後凡城郭縣治學宮經營規畫爲之一新顧時紕舉羸不無嗟怨竟被謫罷去至于今五十餘年民顧思之豈非私怨激於一時公論定于異世耶夫任事之難自古爲然豈獨毛公哉

萬歷仙居縣志卷之十二終

跋仙居縣志後

予不佞不能周知天地之廣大而獨好觀古今所載星土方俗人物得失之致耳目覩聞輒生感發以爲人心世教端必有賴乎是乙巳謁選人得台之仙居私自念此古靈晦庵二先生所蒞之區也文獻其有徵乎比至見其山川秀美土風朴茂賢士大夫多光明俊偉能世其業卽編戶之民類不能具什一以求尺寸之贏于四方予心安焉每自公之暇輒求前世之遺蹟不可多見退而考之故府簡策缺然未有志者豈先輩從事于茲樂其土俗之淳未遑紀述將二年殿最輒遞代遷去有是念而未之就歟不佞慨然久之乃搜剔舊聞旁求故典與學博王君綜其可信可傳者彙集成編凡幾卷將刻而傳諸世一時學士先生父老子弟樂仙志之有成也謂主者宜有一言弁其首予惟郡邑之有志猶國之有史也史核則傳志該則遠周禮旣設有職方氏以掌天下之圖辨其邦國都鄙財用穀畜之數以周知其利害而又有外史以掌四方之志土訓以詔地求誦訓以知地俗此皆萬歷仙居縣志

跋

仙居叢書

因俗爲治之意而人心世教所攸係焉者也後世訓史之職廢而政多苟簡然則郡邑之志所從來尙矣仙故居萬山中其廣不當台之什一而星野災祥之數戶口田賦物產古蹟之遺城池官署學校鄉社陵墓寺觀之蹟與夫名臣宦蹟忠義孝友儒林文學隱逸僑寓列女仙釋之流種種清嘉未易殫述試陳是編而縱觀之足之所履不問而知其處目之所周不辨而識其人其措置可以合人情而耳目可以俾懲勸一方之書千載之業端有籍焉顧予德薄能小不能有所闡明以激發後人之志氣而惟是二三君子相與考覈甚詳商確且久其文則略其義則該庶幾可備它日之掌故云爾後之君子更斯土者尙憫予之不文而刪抹潤色之萬歷戊申七月旣望吳郡顧震宇謹跋

余纂僊志會台郡無善手可付梨棗乃捐家貲刻之吳中工旣成余又解組謝事則名山高閣任余藏拙可也而僊人士力請傳之因載其板歸僊俾僊人士聊寓目焉若知我罪我一付之悠悠之口我何與己己酉十月朔日附識

舊仙居縣志跋

邑之有志始於明萬曆之三十六年卽此志是續修於本朝康熙之十七年司其事者爲明焜徽謨兩張先生時兵燹初平文獻無徵不無舛錯遺失之處朱莊菴與之同時著山人問答一書以糾其誤乃故老相傳謂修志時出重貲以廣購舊志欲俾舊志隻字不存庶後日無以證新志之失是則恐未必然果出重貲廣購勢必不遺片紙胡此一十二卷獨能流傳無恙耶得毋如秦政焚書不能禁圮上之私相授受耶書係夏閣應君履塋家藏僉謂不可以不存也爰向家大賓叔支公項錢十餘千俾梓人以畢昇板印二十餘部字有脫者與逢釗侄查補之庶後之修志者有所考證焉道光十八年長至日邑後學杏邨王煦謹跋

校勘後記

右萬歷仙居縣志十二卷明顧震宇纂光緒志誤爲十六卷原名仙居縣志鏡渠爲之補冠紀元以別於康熙光緒二志震宇字清曾崑山人萬歷三十三年以舉人知縣事興教勸學政法古靈此志之修使仙居千數百年文獻賴以不墜厥功甚偉光緒志叙例謂雖署訓導王澁同輯然皆出顧令手筆觀各門小序可見云云其言誠然自來各縣修志知縣事者類多徒尸其名罕有秉筆主裁有之惟陸清獻靈壽縣志此志爲顧氏親纂斯則尤難能可貴者全共二十有七日卷首無輿圖餘亦簡略然記載有法議論不苟要不失爲明代方志中之佳構其卷八官屬門知縣及續補敘論中列入萬歷三十七年後歷任姓名下逮天啓二年止當爲後人竄入無疑今悉不加芟削以存其真原刊每半頁七行行十八字前有邑先正應存卓及知縣廣陵鄧應璧序末有震宇自跋考千頃堂書目及省府志均曾著目光緒台州府志已謂未見予家自 先曾祖孝廉天隱公 先王父明經

萬歷仙居縣志

校勘後記

仙居叢書

散仙公逮 先考真吾先生累世蒐藏鄉賢著述卷帙頗多孝廉公且與王徵君子莊同纂光緒志而蘭雪堂藏目竟無此本同郡之以富庾鄉獻見稱若臨海項氏寒石草堂黃巖王氏後凋草堂暨溫嶺金氏鴻遠樓陳氏枕經閣等亦俱未見著錄予頻年于役武林復曾多方徵訪不獲居嘗引爲憾事客秋既有刊布仙居叢書之舉深以此志攸關全邑文獻不可不重爲蒐求以實此編爰於公餘走謁省立圖書館館長陳先生叔諒閱覽組主任王先生文萊承爲遍檢海內公私藏家目錄始悉吳興劉氏嘉業堂尙有此十二卷秘笈而國立清華大學圖書館亦藏有道光十八年王杏村先生刊本重荷慨允轉向劉氏傳鈔以歸生平所願見而不得見者至此竟如願以償快何如之顧劉本自卷十二詩文門謝汝嘉儒學土地祠記以下迄紀遺均付闕如嗣復懇叔諒先生郵假王刊本鈔補始成完帙相互參稽于魚魯之訛是正亦多而同邑張先生藻香願任繕寫縣長湘潭劉先生君德慨允籌募印資此十二卷秘笈遂得重流天壤諸先生贊襄之功爲不可

沒也抑鏡渠尙有感者新志告成舊志覆瓿固爲情勢所必至顧吾人讀杏村先生所爲跋知康熙時續修縣志此志不幸爲司事者所忌竟有祖龍之厄故流傳甚稀然終不至泯沒以盡則殆有非人力所得幾及者杏村先生圯上傳書之喻甚爲切至有味今君德先生既有重修邑志之議後之秉筆者宜如何一秉大公以期信今傳後庶不致重蹈康熙志鹵莽滅裂之失此則不肖硜硜之私所欲與全邑人士共惕勵者也建國二十有四年歲次乙亥夏月秋禪李鏡渠自識于武林寓所